


舊京文存上冊
鑄翁自署

PL
2808
.X5
v.3



Digitized by the Internet Archive
in 2010 with funding from
York University Libraries

JUL 03 2001

EAST ASIAN STUDIES

舊京文

舊京集之二

存八卷

辛未孟夏
師鄭
自題

詩存文存合售
定價六元預約六
折郵費如一

北平

宣外西磚胡同卅
八號常熟孫寓
廠西門外華齋
南紙店

寫印舊京文存緣起

顧亭林先生與人書云。能文不爲文人。能講不爲講師。不佞愚劣。不敢自詡其能文能講。而不爲文人。不爲講師。二語則固服膺弗失。守此垂二十年矣。亭林先生又云。凡文之不關於六經之指。當世之務者。一切不爲。而旣以明道教人。則於當世之所通患。而未嘗專指其人者。亦遂不敢以避。雄也不敏。請事斯語矣。

劉融齋先生藝概云。歐陽公五代史諸論。深得畏天憫人之旨。蓋其事不足言。而又不忍不言。言之怫於己。不言無以懲於世。情見乎詞。亦可悲矣。不佞二十年來。所爲詩文。頗同此感。

孔子刪詩。終於商頌。又云。吾學殷禮。有宋存焉。又論周文王三分有二。以服事殷。爲至德。復褒微箕比爲三仁。贊夷齊爲求仁得仁。均示不忘故國之意。兩楹坐奠。更明詔弟。子以丘爲殷人。其意更可知矣。曩時所印禹齋文存。於辛亥殉節守土之吏。均爲表揚。茲編所錄。未改斯旨。且於庚子殉難之崇文節王文敏。並爲紀實之文。以昭信史。蓋國於天地。必有與立。臨大節而不奪。經歲寒而不凋。斯爲君子。若舉世皆隨波逐流。善背。

反覆之徒。有國者將誰與圖治乎。

論語言興滅國繼絕世舉逸民。天下之民歸心焉。宋儒楊氏釋之曰。有國有家以傳其後。皆有德在民。而民沒世不忘也。逸民亦民之望也。因民之不能忘而繼之。因民之望而舉之。故天下歸心焉。有國家者亦與民同好惡而已。明太祖之詔修元史也。諭宋濂王禕云。元君臣言行多可稱者。爾等務直陳其事。無溢無隱。洪武三年平定朔。漢羣臣稱賀。中書省草詔以進。語涉誇大。太祖因責省臣曰。元主中國百年。朕與卿等父母。皆賴其生養。元之興亡。自是氣運於朕。何預而以此。張之四方有識之士。口雖不言。心未必以爲是也。可更草以進。大哉王言。真有君人之度矣。後之修史者。宜三復斯言。

舊京文存初意亦擬僅印二卷。嗣由兒子炳黃錄寫舊稿。積如束筍。不忍棄去。因隨錄隨印。愈積愈多。遂成八卷。倘邀天佑。假我十年。專心撰述。文字或有進步。他日當以鑄翁類稿六十六歲以後所爲文均入鑄翁類稿及此編合之。從前所印師鄭堂集四十年前付梓又鄭齊類稿三十年前北洋鄭學齋文存十年前禹齋文存五年前印行在五種彙爲一編。如何分年分體。悉聽炳黃爲之。然世運泯。禁人事變遷。正未可料。此時姑爲預

言以快吾意而已。

昔唐子畏才名震世。明代同時詩文集之序多託其名。子畏一一自承。皆不置辨。裴建誠同年汝欽褒其雅量。謂賢者固不惜損己以成人之名也。不佞初無才名。而乞爲詩文序及題跋者。不乏其人。拒之不應。或且自爲之而假吾名。自媿器量褊狹。未能效子畏之一一自承。以竊不虞之譽。致違自欺之戒。故寫印此編。以質當世。閱者一覽而知無俟斷斷證辨矣。陳伯嚴前輩序范伯子文集云。留子遺之軀。懸禍亂之會。老不媿恥。猶以未死之日。役於文字。得錢求活。其所遭之身世。真極古今之至悲。不佞學行不敢希伯嚴前輩之什一。而身世迺與相等。邇年以鬻文自活。此編之付印。半由來鬻吾文者再四要求。以爲傳世之券。而防魚目之混。故不憚醜縷述之。昌黎諛墓後世所譏下非其人。雖黃金萬鎰亦視同土芥。而標使者於大門之外。此固曾見諸事實者也。

孫芝房先生與薛曉帆書云。古今能自樹立。不隨俗飢餓之士。未有能取容當世。不致罵譏笑侮者也。先生此言。雖似牢騷鬱勃之語。而實蘊有至理。特古聖賢立言垂教。以和平出之耳。易云。獨立不懼。遯世無悶。孔子云。人不知而不愠。又云。君子依乎中庸。遯

世不見知而不悔。蓋聖賢豪傑均有躬歷此境之時。此可爲知者道。難爲俗人言也。不佞平生不肯隨人俯仰。辛亥以前已有落落寡合之歎。近二十年閉戶著書。立身行己。幾如昌黎所云。舉世非之。力行而不惑。余亦不自知其何心也。自戊辰都會南移。舊時朋好不之。東北則之。東南其存者僅十之一耳。塊然獨處窮居。不悔。張雙南太史蘭思往歲自津貽函云。前輩豈真欲遺世獨立耶。不佞曾賦絕句云。獨立蒼茫且詠詩。暮鴉終古戀殘枝。滔滔安有容身所。天柱猶傾況地維。海藏樓集中有此七字邵次公和我獨立詩。有倚杵看天誰得見。權將鐵史比東維之句。良朋期許非所敢承。聊志於此。使讀吾文者知之。或不至驚怖其言。誠爲河漢無極乎。

文士好爲標榜。而古文家爲尤甚。嘗見近人文集。師友序跋。累牘連篇。而每篇之末。多載評獎之語。刺刺不休。此迺政黨遊士比周宣傳之習。下至九衢鬻食雙簣賣藝之徒。亦所優爲。儒者詎可尤而效之。此編不錄評語。亦不乞人作序。即卷端題眉亦以劣書自任塗鴉得失決於寸心。定論俟諸百世。目前是非毀譽何足計較哉。

共和紀元二十年。歲在辛未。夏正仲春之月。鑄翁記於西轅胡同之鄭學齋。

舊京文存目錄

卷一

清故戶部尙書協辦大學士翁文恭公別傳

清故贈通奉大夫狄府君暨配徐夫人合祔墓志銘

狄母陸太君墓表

徐孝女月琴墓志銘

無錫唐氏仁莊記

有明義士南漚王蕉雪先生墓表

俞母楊太恭人墓志銘

壯學廬記

奉賢泰日橋朱氏紫陽宗祠碑記

朱遜叟詩集序

清故山東蒲臺縣知縣楊君調甫墓志銘

舊京文存
徐曙岑竹間吟榭集序

黃黎雍千華覓句圖記

卷二

桐鄉青鎮盧氏祠堂記

清故禮部郎中趙君迺唐墓志銘

懷德趙孝子鍾甲墓志銘

懷德趙錫荃壙志銘

楊味雲雲在山房類稿序

族長兄謹丞先生六秩晉三壽序

清河欒氏家訓序

詩史閣圖記

于烈婦潔脩女士徵題事略書後

無錫唐氏二孝女合傳

金母唐太君節孝錄序

銅山張烈婦傳

孫氏宗譜圖詠序

趙迺唐師竹齋叢著序

卷三

顧庸公焚膏補讀圖記

孔壁籀銘

許松甫先生八十壽序

常熟錢君湘圃墓志銘

奉賢朱君杏南墓志銘

泰縣張子和先生墓志銘

榮祉宇雪石齋詩集序

褒揚孝子南通劉公旭初家傳

劉瀨如繼室姚夫人三十初度家宴記
明繆文貞公萬厯癸丑會試朱卷書後

經畚樓圖記

王孝子繼穀齊孝子占魁合傳

清故翰林院編脩沈君北山墓表

庚子殉難五詞臣死事紀略

卷四

施太守雨農家傳

漣水烈婦傅陳氏傳

袁性之杏紅館酬世文鈔三集序

海鹽朱君步青墓志銘

孫藻田侍郎師海日樓詩文集後序

南通孫孝婦墓表 附徵題詩文啟

清故度支部郎中懷德榮君祉宇墓志銘

奉賢朱烈婦傳 附贊

卷五

南通張君伯笙墓表

公祭章曼仙文

武進盛母柳太夫人墓志銘

常熟王君御之墓志銘

休甯率溪程氏六烈婦傳題詞續編序

休甯率溪程氏鄉賢六先生贊

朱粥叟徵君詩集序

常熟徐君似逸墓志銘

常熟王孝子子貞李義婢三妹合傳

武進張季易之母湯太淑人墓志銘

常熟楊孟龍之母龐太夫人墓志銘

卷六

常熟蔣北野先生墓表

常熟沈价藩先生墓表

休甯程韵琴華封兩先生墓表

休甯率溪程氏六烈婦墓表

唐纘伯拯災百事序

休甯黃節母汪太孺人墓表

旌表貞節休甯黃母汪孺人墓表

徐編修少達之繼室張恭人墓志銘

追紀先室楊恭人遺言數則

卷七

常熟蔣君孟谷墓志銘

邱君澥山暨德配何夫人五十雙壽序

清故戶部主事孫君筱川墓表

西磚校經圖記

西磚校經圖後記

徐壬保葬銘

楊无恙拏雲精舍詩稿序

菰里瞿氏四世畫卷題詞序

邱志軒先生六十壽序

卷八

銅山王惺三先生墓表

常熟翁母周太夫人墓志銘

高密鄭叔問先生別傳

農商部清理前清舊案分類目錄序

南通朱右文先生滄海集序

劉敬輿總長五十壽序

崇文節公庚子殉國紀實

清故翰林院編修章君琴若墓志

翰林院侍讀嘉興錢公新甫行狀

鑄翁字說

清故直隸補用道靈川周公虎如墓志銘

裴建誠同年詹詹言序

錢南鐵荔園樓集序

詩史閣叢刊自序

黔縣胡節母孫孺人贊

郟城鄉賢孫德輿先生贊

郟城鄉賢孫幼青先生贊

郟城循吏孫華樓先生贊

南通顧麗生先生贊

黑龍江新建圖書館碑記

無錫唐君慕潮墓志銘

與炳黃論放生茹素

齊震巖同年七十壽序

齊年伯母魏太夫人九秩晉一壽序

休寧黃節母汪太孺人贊

旌表貞節休寧黃母汪孺人贊

休寧程韻琴華封兩先生贊

休寧率溪程氏六烈婦贊

王竹林行氣長生術序

休寧率溪程氏六烈婦傳題詞彙編序

江慎修先生年譜書後

辛亥殉難三總督別傳論贊

松壽傳見禹

端方齋文存

趙爾豐

錄論贊

辛亥殉難二巡撫別傳論贊

陸鍾琦

馮汝駉

新建張忠武公贊

阜陽倪安武將軍贊

嚴子陵管幼安陶淵明合論

讀經救國論自序

再版讀經救國論自序

清授通議大夫升用知府江蘇金壇縣知縣郟城孫君華樓墓表

清授中憲大夫戶部主事加四級郟城孫君幼青墓志銘

常熟孝女瞿藹琴傳略

清封中議大夫選用知府加二級常熟宗君雲鋤墓志銘

李印泉獲芝圖記

吳江許氏壽護圖題詠集書後

名人生日表自序

丹徒吳佑文先生家傳

清封夫人丹徒吳君養臣德配包夫人墓表

顏孺人荔秋墓志銘

亞妻章孺人哀辭

徐水縣知事齊君馨山墓志銘

吳興章藹士封翁暨德配鄭太君贊

吳子鼎竹洲淚點圖記

休寧黃菊隱先生贊

宗伯臯九我堂記

清封一品夫人旌表孝女孝婦言世嫂丁夫人誄
劉健之蜀石經齋記 以上兩篇係駢體文附入舊京文存之末

舊京文存卷一至卷八目錄終鄭學齋文存禹齋文存目錄附錄於後
以便檢尋他日擬分體編次合爲一集

鄭學齋文存目錄文有互見舊京文存者不再列目

禹論

趙受韓上黨論

四皓論

續量錯論

翁文恭公瓶廬詩鈔補遺序

讀經救國論後序

名賢生日詩自序

齊母趙太夫人八秩晉三壽序

邵伯英前輩七秩晉一壽序

錢幹臣同年五十壽序以上卷一

孫貞孝傳

兵部尚書兩廣總督秀水陶勤肅公墓表

署直隸通永兵備道商城張公墓志銘

榮君誼雲墓志銘

楊實甫先生墓志銘

楊心甫先生墓志銘

掌新疆道監察御史莆田江君墓志銘

旌德江譜堂先生墓志銘以上卷二

禹齋文存詩史閣內

目錄文有互見舊京文存者不再列目

張季易疑年錄彙編序

張季易歷代帝王疑年錄序

餘姚高風亭落成詩冊序

張季易明清魏科姓氏錄序

趙乃唐師竹齋吟草甲集序

飲真社雅集圖記

張季易小雙寂庵勸書圖記

遯園記

孫藻田學士師止庵遺書序

沈石友硯譜序

無錫唐桐卿先生哀感錄序

東武劉氏詩萃序

趙乃唐禮部六秩晉一壽序

泰縣張子和先生六秩晉九壽序

張季易清代毘陵名人小傳暨清代毘陵書目序

以上卷一 爲詩史閣叢刊之卷三

望都劉君逢時墓表

清故吏部員外郎錢君耕玉墓志銘

常熟翁文端文恭二公別傳

文恭公別傳互見舊京文存卷一

辛亥殉難三總督傳略

松壽僚友亦就所知姓名事實附列篇末

辛亥殉難二巡撫傳略

陸鍾琦贊均互見舊京文存傳略未錄

茹君澤涵家傳

武進張壽名先生墓表

安武上將軍阜陽倪公神道碑銘

海城馬遯庵生壙志銘

商城張母黃太夫人墓志銘

懷德孔母梁太宜人墓志銘

適陳氏從姑母墓志銘

吳興徐烈婦墓志銘

章乃炯之側室

清苑茹母潘太夫人墓志銘

先府君事略

季弟叔翔墓志銘

仲弟方久哀辭

以上卷二
史閣叢刊之

爲詩
卷四

外姑曾孺人墓表

貞女徐啞姑墓志銘

常熟屈母侯太夫人墓志銘

先妣事略

適吳氏妹墓志銘

舊京文存卷一



常熟孫

雄

原名師鄭同康

清故戶部尙書協辦大學士翁文恭公別傳

公諱同龢。字聲甫。號叔平。又號瓶笙。晚自署松禪老人。文端公幼子也。咸豐丙辰。一甲一名進士。授脩撰。戊午。典陝甘鄉試。在闈中。奉提督陝甘學政之命。時猶未散館也。在任甫一年。以思親引疾歸。丁父憂。服闋。同治四年。以右中允奉命弘德殿授讀。天語褒許。謂宜勉承先人未竟之志。穆宗賓天。光緒元年。復奉毓慶宮授讀之命。固辭不獲。蓋趨承講幄。納誨兩朝者。垂三十年。歷官至戶部侍郎。都察院左都御史。刑部工部戶部尙書。加太子少保銜。協辦大學士。兩入軍機。兼總理各國事務大臣。遇慶典。賜穿帶膝貂褂。賜雙眼翎。紫纁。恩賚有加。公自以世受國恩。當時事艱難。遭逢明聖。投艱遺大。昕夕憂勞。冀得圖報於萬一。其在講帷也。於列聖遺訓。古今治亂。反復陳說。曲盡其理。其調和宮庭。以孝思錫類爲本。其闡明政要。以憂勤惕厲爲先。尤能直言極諫。造膝事秘。世莫得聞。章疏又強半焚稿。所可知者。請止臨幸王府。請罷修圓明園。請省宮禁。一切

工程免外省傳辦各物。光緒甲午。慈聖六旬萬壽。舉行慶典。留吏盛致方物。時茶陵譚文勤方督閩浙。公與文勤爲丙辰同歲生。箋牘往還。論及時事。謂大臣報國在竭忠。盡智不在多儀備物也。甲午中東之役。公鑒於國勢凌夷。外侮侵迫。與高陽李文正力排和議。冀得一勝以挫強敵之鋒。而盡字小之責。迺士不用命。忌公者又陰爲阻扼。而傾陷之時。論不察亦以羣帥喪師之咎歸獄於公。公惇惇蹇蹇。引爲己過。不自明也。嘗與譚文勤書云。徵兵弗至。則弗行。行則無餉。在前敵者驚。奔走鹿。眞兒戲哉。又云。此如弈棋。滿盤皆錯。而吾適在隅坐之列。焉得不憂傷憔悴耶。公立朝數十年。矢誠矢敬。有古大臣風。順以秉性。正直爲小人所忌。卒致遭讒罪廢。光緒二十四年戊戌四月。有詔令開缺回籍。公歸抵里門。省文端公墓。伏地痛哭良久。始起。卽晚自書日記云。同龢默省。獲保首領。從先人於地下。幸矣。又省所以靖獻吾君者。皆堯舜之道。無骭骸之辭。尙不致貽羞先人。也是年九月。又奉嚴旨革職。交地方官嚴加管束。仁和王文勤方在樞府。與剛毅力爭。謂朝廷進退大臣。以禮無編管之理。剛毅詭稱出慈聖意。實非慈聖意也。嚴旨又有力保康有爲。謂其才勝臣十倍之語。公實無此言。皆剛毅輩不愜於公。設

詞以傾公。且以傾德宗。也有爲通籍進謁。公初賞其才。嗣見孔子改制考。力斥其謬。戒
閣者不與通。且曾於入對時言之。謂此人居心叵測。語亦詳日記中。公究心經史。讀書
靡不貫澈。尤邃於性理。論學以躬行實踐爲宗。通經致用爲輔。光緒庚辰壬辰兩典禮
闈。乙酉戊子癸巳三典順天鄉試。所擢多經術淵通之彥。平居延攬人才。虛心下士。一
時歎爲莫及。事親竭終身之慕。憂國之心。時見於辭色。削籍後。廬墓七年。閉門思過。每
念時艱。輒復流涕。吳中士大夫追念忠清。合詞請爲湔雪。恩准開復原官。旋予諡文恭。
所著詩文。清超名雋。不落恒蹊。書法縱橫跌宕。力透紙背。有平原風骨。實兼近代錢南
園何輦叟之長。晚年學隸。兼廻腕作書。力追靜穆。人得片楮。珍若球圖。有瓶廬詩鈔八
卷。日記四十冊。行世。

參用續修常昭志稿及
家述日記與人手札

舊史氏孫雄曰。文恭師薨於光緒甲辰五月。迄今已二十四年矣。公無子。以姪曾翰爲
嗣。早卒。曾翰之子亦已殂謝。公薨時。僅嗣曾孫之廉主持後事。之廉嘗受業余門。實爲
弢甫廉訪前輩斌孫之仲子。今之廉亦逝世久矣。二十年前。余嘗寓書弢甫。及之廉。謂
宜撰次詳核。事略乞于晦若侍郎沈子培。方伯作神道碑。以存信史。于沈二君。皆公庚

舊京文存
辰門下士。且擅龍門史筆也。弢甫父子遷延。濡滯未經脫稿。蓋因世論糾紛。深恐據事直書。或遭時忌。故甯泯泯默默以終。古姑俟百世後之公論而已。共和紀元以後。吾邑續修志乘。自光緒中葉。至宣統三年辛亥爲止。邵伯英前輩松年實主其事。曾以文恭公傳稿與余郵函往來。再四商榷。並屬余爲公撰墓表。謂知師門志事者。今日舍君莫屬。文字千秋之業。無所於讓也。余雖心許之。而逡巡未敢命筆。今伯英與弢甫又均作古人。追懷師友。曷勝人琴之慟。因先成此別傳。俟他日文字稍有進境。或當訛筆以踐夙諾乎。

此文已印入詩史閣叢刊內禹齋文存卷二。今復修正舊稿。冠於舊京文存之簡端。蓋去文恭師騎箕之歲。已二十五年矣。師生於道光十年庚寅。卒於光緒三十年甲辰。壽七十有五。今年己巳四月二十七日。爲百齡冥誕之辰。謹於舊京爛漫胡同常昭會館。設筵致祭。人天胥蠶。家國滄桑。九京有知。其感愴爲何如耶。己巳孟秋之月。師鄭孫雄附記。

清故贈通奉大夫狄府君暨配徐夫人合祔墓志銘

府君姓狄氏。諱嘉麟。字仁甫。號慕劬。江蘇常熟人。狄氏爲武襄後。明季奉嚴府君始由溧陽遷虞山。累葉經商。至六世惇九府君。始昌大其業。惇九府君之長子。曰贈奉直大夫伯泉府君。娶於黃。贈宜人。以孝婦旌門。實爲府君之考妣。府君生而岐嶷。爲王考惇九府君鍾愛。讀書務正學。一以濂洛關閩爲宗。伯泉府君於咸豐庚申。粵寇陷城。罵賊不屈死。府君奉母黃太君避亂窮鄉。甘旨罔缺。冬溫晨省。曲體親心。寇退稟承懿訓。力行善舉。太君棄養。哀毀骨立。喪葬一循古禮。修葺先塋。廣栽封樹。祖遺祭田。僅六十畝。不敷之費。傾囊獨力任之。府君以儒門苦節。堵挫艱難。餓死事小。失節事大。宋儒名論。近世雖多。詆爲迂談。然人禽之判。別家族之興衰。實賴閨門苦節。以維繫之。爰倡捐鉅資。購置田產。別創儒寡局。凡邑中儒寡儒孤之貧乏者。按月依助。以養以教。又以嘉道以來。邑中忠孝節烈。淹沒者多。鳩集同志。博搜廣采。歷數十年。彙案請旌。凡補旌者數千人。別刊虞陽旌表錄。以爲徵信。他如歲飢請賑。施粥授衣。及清查崇善堂荒塚二千餘。勒石編號。以記亡者姓名。擴充城鄉米捐。以裕慈善經費。凡力所能爲。悉視如身心。

性。命。尤。究。心。邑。中。水。利。嘗。手。鈔。璠。水。利。全。書。將。有。所。建。白。宏。願。未。抒。齋。志。以。歿。卒。於。光。緒。二。十。八。年。十。二。月。十。二。日。年。五。十。有。九。配。徐。夫。人。同。邑。蓉。村。先。生。諱。晉。曾。之。長。女。純。孝。性。成。母。趙。太。君。晚。年。得。子。名。曰。文。英。提。抱。滌。垢。悉。代。母。勞。蓉。村。先。生。病。篤。則。割。股。禱。天。乞。代。年。二。十。一。來。歸。府。君。鴻。案。相。莊。事。姑。盡。孝。府。君。有。叔。母。曰。吳。太。君。爲。雪。薌。府。君。之。配。亦。以。節。孝。旌。門。無。所。出。因。命。叔。子。梁。孫。爲。之。後。吳。太。君。生。前。長。齋。奉。佛。歿。後。薦。馨。虔。供。素。品。族。黨。交。口。稱。美。性。儉。約。嘗。經。月。蔬。食。供。客。則。從。豐。遇。貧。苦。解。衣。推。食。無。吝。色。府。君。有。善。舉。時。典。鬻。衣。飾。以。贊。其。成。乙。未。歲。弟。文。英。病。卒。趙。太。君。悲。慟。得。疾。夫。人。中。夜。焚。香。私。誓。曰。願。天。佑。我。老。母。我。代。死。無。遺。憾。母。尋。愈。至。丙。申。年。以。壽。終。夫。人。聞。訃。長。號。矢。以。身。殉。越。七。日。竟。卒。時。光。緒。二。十。二。年。三。月。初。四。日。也。年。四。十。有。九。府。君。手。撰。行。述。追。記。夫。人。遺。言。沈。痛。悽。惻。如。云。余。修。葺。諸。先。塋。夫。人。曰。願。世。世。如。此。則。祖。塋。永。安。矣。襄。理。儒。寡。事。宜。則。曰。夫。子。爲。儒。寡。謀。吾。可。不。作。嫠。婦。矣。今。已。如。願。思。之。慙。然。余。三。復。斯。篇。竊。歎。仁。孝。肫。篤。之。懷。倡。隨。生。死。之。愛。可。以。爲。世。範。矣。府。君。有。子。四。長。詒。孫。次。文。孫。幼。龍。孫。均。前。卒。三。即。梁。孫。附。貢。生。畢。業。日。本。法。政。大。學。宣。統。己。酉。科。舉。人。內。閣。中。書。欽。點。

七品小京官。署杭州府地方檢察長。花翎三品銜。浙江候補道。府君先以官布政司經歷授奉直大夫。又以梁孫貴贈通議大夫。晉贈通奉大夫。夫人於光緒二十四年旌表孝女。以府君階封宜人。又以子貴贈淑人。晉贈夫人。女五。長幼均殤。次適同邑汪宗德。三適郡城徐觀濤。四適太倉陸燿章。孫二。長柔。次九華。孫女一。蓉子。均梁孫出。曾孫二。長恭。柔出。次敬。三忠。均九華出。曾孫女一。穎。柔出。梁孫奉府君命。爲惇九府君仲子雪蕓府君之嗣孫。雪蕓府君有庶子曰雲書。亦早卒。是爲梁孫之嗣考。歲時奉祀。以嗣以續。承先啓後。派別支分。狄氏之興。未有艾也。府君又以長子詒孫。幼子龍孫。均未及十齡而殤。仲子文孫卒時。年已二十有四。因命長孫柔爲文孫後。迨府君易簀時。遺命柔以承重孫主喪。梁孫學行純粹。精研法學。家言有聲於時。辛亥以前。與余同宦京。曹投分深摯。余於光緒己丑庚寅之歲。設帳城南。蔣北野師齋中。爲師課子。府君與蔣師爲累世戚好。時時過從。考德問業。備聞緒論。今已四十。易寒暑矣。府君卒後。於光緒二十九年癸卯某月。與夫人合窆於虞山西麓鵠鵠峯新阡主穴。爲生前親相之吉壤。梁孫具狀乞余追爲銘幽之文。梁孟懿行應乎銘法。余何敢辭。銘曰。

惟善人。惠悃獨褒節義。揚貞淑比肩人。相親睦。敬如賓。幅共轂。貽孫子。頌有穀。奠幽宮。符吉卜。氣佳哉。永葱鬱。

狄母陸太君墓表

虞山狄母陸太君。爲味霞府君諱念祖之德配。同邑陸公諱奎章之女也。吾友巽公之本生考曰仁甫府君。妣曰徐太君。余曾爲作合祔墓誌銘。味霞府君與仁甫府君爲從昆弟。親如同母。陸太君與徐太君爲妯娌。而亦親如同母姊妹。陸太君幼明慧。謹受姆教。于歸後。鹿車偕隱。樂守清貧。有冀鑑梁案之風。味霞府君爲邑名諸生。素性澹靜。不求聞達。以舌耕餬口。啓迪後進。至老不衰。又以嗣續無人。晚年自定四事。戒無立嗣。及損屋作祠諸條。親書十紙。交兩弟八姪存之。迨光緒二十九年癸卯。府君年六十有九。以微疾捐館舍。親族仍有議爲立後者。太君泫然流涕曰。聞之禮。大宗不可絕。所以奉宗廟也。吾夫次房之支也。吾夫存時。既有遺言四則。首云不立嗣子。吾何敢違。今吾有羣從十人。皆爲吾所親愛。若正名立嗣。不特有背遺言。且情分厚薄。易啓爭端。吾不忍爲也。且天旣酷我以無子。奚事逆天爲。吾當擇其賢者而依之。十指辛勤。吾生足以奉

烝嘗。吾死之後。遺有屋椽。悉捐作祠。而塋墓則歸值年祭掃。則吾夫婦雖無後。而有後矣。親族以其言當。遂從其議。且以味霞府君生前預囑爲請。於官注冊勒石焉。異公因太君煢煢無依。迎與同居。異公婦李氏爲名門淑媛。以子婦之禮事太君如威姑。太君則撫愛備至。不啻所生。異公志在四方。家事瑣悉。太君實董理之。光緒甲辰。異公仲子九華生。甫墮地而母病。哺乳維艱。鞠育拊畜。悉太君是賴。稍長。則昂以節用。勤學食舊德。而紹清芬。今九華研習法政。能承家學。已嶄然見頭角矣。九華自言。吾學之粗有成。就皆由舞勺舞象時。太君所誨勉也。辛亥政變。吳越之間。風鶴頻驚。太君與異公眷屬。避居歸政鄉貴涇。事平回里。仍同居。戊午正月。太君逝世。年七十有三。身後事均異公夫婦任之。異公語九華曰。吾於陸太君爲從子。生於吾。乎養死於我。乎殯。今既有不立後之訓。而懿德不彰於吾心。有戚戚焉。汝非陸太君無以至今日。將爲汝築屋名堂曰懷橘。以誌不忘。九華承命繪圖。廣徵詩文。以報太君提携襁褓之恩。飲食教誨之德。余旣爲七律二章以答其意。庚午初春。余適有舊京集之刻。九華乞爲表墓之文。諄囑刊入集中。以傳永永。余之文何足以傳世。而太君之徽音懿範。實有足以紀述者。則余文

迺賴太君以傳。不可謂非幸也。嗟乎。世風澆薄。每況愈下。覬財爭嗣。訟獄繁興。近者更有女子得承遺產之議。譸張變幻。倫紀牴牾。家庭之禍。有不忍言者。巽公飽更世變。人心世道之憂。常與下走有同感焉。如陸太君之仁慈有功。狄氏使劉中壘生於今日。吾知必大書特書。煒茲彤管也。懷橘名堂。流聲千載。巽公與九華之銘心報德。亦有足多者。余故樂得而述之。庚午夏正孟春之月。常熟孫雄表。

徐孝女月琴墓誌銘

徐孝女月琴。江蘇常熟人。候選同知蓉村先生諱晉曾之孫女。候選訓導棣卿先生諱文英之長女。母氏蔡。爲同邑肖樵先生諱鼎培之女。幼以德聞。惟體質素弱。孝女生後。祖母氏趙伯。祖母氏陳均在堂。孝女因慈母多病。侍膳問安。扶持抑搔。均代母氏任之。兩老人亦撫愛備至。非孝女侍側。不歡也。年甫十齡。即明大義。度事二親。怡聲柔色。授以詩禮。過目成誦。執鍼治繭。婉婉聽從。即井臼操作。亦躬任其役。不假手婢媼。年十六。棣卿病亟。又值盛暑。孝女於深夜焚香禱天。誓以身代。旋剖股和藥以進。然卒無效。孝女終天抱恨。泣血椎心。哀毀骨立。棣卿有子三。長錫光。出嗣。次耿光。殤。三銘光。係遺腹。

所生孝女。因弟銘。光甫。呱呱墮地。即錫光。亦尙在稚齡。病母又乏人侍奉。即矢志盡孝。以養親。誨弟報生之恩。孝女有姑氏爲棣卿之長姊。適同邑狄仁甫先生嘉麟。未嫁時撫育弱弟。悉代母勞。蓉村先生病篤。亦曾割股禱天。籲代。光緒二十四年戊戌。以孝女旌表。姑姪同德一脈相承。生有自來。非偶然也。仁甫先生曾爲徐氏教養兩世遺孤。又有賢子曰梁孫。字巽公。能繼先志。爲徐氏兩表弟提携教育。孝女母氏蔡太君深德之。辛亥改革。巽公棄官客居滬江。執行律師職務。兼任江蘇省議會議員。家政乏人佐理。因稟命於蔡太君。迎孝女任之。太君謂孝女曰。狄氏兩世大有造於徐氏。此德不可不報。汝宜速往。毋避小嫌。孝女敬受親命。矢慎矢勤。擘肌分理。贊襄內政。井井有條。客滬幾及十春。心力爲之交瘁。其間巽公頻患沈疴。延醫量藥。殫竭苦心。卒能轉危爲安。巽公追念前塵。輒爲感涕。民國七年戊午。蔡君太棄養。孝女哭泣欲以身殉。坐此得疾。八年己未十月。回里就醫療疾。適次妹病逝。孝女秉性仁愛。復感受疫癘。於夏正十一月初五日。卒於母氏寢舍。距妹氏之逝僅五日耳。是年冬季。邑中採訪局以孝女呈請褒揚。部頒至性過人。樞額。巽公以其有功狄氏。於民國十八年己巳季冬。爲營葬於邑。

城北門外菜園村狄氏菜園新阡。并命子孫歲時祭掃。永舉勿廢。以報其德。孝女生於光緒六年庚辰六月初十日。卒時年四十。庚午孟春。巽公郵書舊京。旣乞爲贈公仁甫先生暨配徐夫人追撰合祔墓志。又述孝女事實。屬爲銘幽之文。余與棣卿廣文總角交也。光緒辛巳壬午間。應試省門。聯牀話雨。星霜荏苒。已將五十年矣。棣卿之外舅。肖樵先生。與余家同居。城東僅隔一水。童時嘗登堂聆誨。先疇舊德。回憶如新。巽公又與余爲文章道義之交。孝女之懿行。復應銘法。余何敢辭。抑余重有感焉。近世風俗。猥薄視孝友睦嫺爲迂談。辜恩背德。反顏猖獗之事。日異月新。而婦德之淪喪。尤有江河日下之歎。如徐孝女之徽音。淑德固足矜式千秋。而巽公之表闡幽潛。綏安宅兆。亦洵能發乎情。止乎禮義。而眞爲以德報德之君子矣。詎可求之近世哉。迺爲銘曰。

北宮養志。中壘播馨。孝乎惟孝。名非常名。彤史炳煒。璇閨典型。長離濁世。游神窈窕。墓鄰齊女。瑟鼓湘靈。娥碑弗泐。萬本書銘。

無錫唐氏仁莊記

大易言體仁足以長人。利物足以和義。孔子云仁者人也。義者宜也。孟子言親親仁敬長義。可以達之天下。又言虞舜察倫明物。由仁義行。蓋仁之與義如車之有兩輪。鳥之有兩翼。人之有兩手兩足。相輔相成。不可偏廢者也。然易乾元之義。首重體仁。元者善之長也。故五常四德皆以仁冠首。良以仁爲元善。儒者中和位育之功。所以能盡人性盡物性。參天地而立人極者。皆以仁德爲肇端。孟子嘗言親親而仁。民仁民而愛物。朱氏祖義釋之云。不以待人者施之物。以其有貴賤之分也。不以待親者施之他人。以其有親疏之殺也。於無所不愛之中。而不失貴賤親疏之差等。此聖人之仁。所以歷萬世而無弊也。眞西山先生亦謂凡生於天地之間者。莫非乾父坤母之子。而吾之同氣者。也是之謂理一。然親者吾之同體。民者吾之同類。而物則異類也。是之謂分殊。兩家推闡孟義。至爲精密。然則仁民之用。根於親親。親擴於愛物。所繫顧不重哉。自宋范文正公以義田贍族。歷史傳爲美談。宋元明清以來。世族舊家。多有義莊之建。合於周官孝友睦婣任恤之旨。其制甚善。惟被其潤澤者。僅以同族爲限。夫使伊者氏親睦。平章時雍。

於變之治歷千百年而無或變。更則人人各瞻其九族而協和。自徧於萬邦。豈不甚善。無如世運不能有醇而無漓。天道不能有舒而無慘。兵戈饑饉。餓殍載途。甚至鳥獸魚鼈咸不能自遂其生。體仁長人之君子。以民吾同胞。物吾同與。爲心對此天災人禍。子遺轉徙之氓。自當推親親睦族之仁。惻然動念。不能自己。而亟思爲之援手。以盡同氣之責。設令先憂後樂之范公。生於今日。吾知亦必將變通盡利。而不存膠柱鼓瑟之成見也。錫山唐氏慕潮。慕汾昆季。紹述其尊人桐卿先生遺教。修仁行善。世濟其美。桐卿先生自光緒乙亥迄宣統辛亥三十七年間。所振災區。凡八行省五十一郡縣。林徵君畏廬爲撰廟碑。稱其以微官具偉力。蘇天下且不避艱險。忍死而爲之。可謂古今之至仁者也。慕潮歟。歷中外所至有聲於振災恤民諸事。視爲身心性命。己巳仲秋。感疾不起。年甫五十有二。易簀時。以遺言授慕汾。大略謂秉承先府君設立義莊之遺志。創建仁莊。舉先府君遺產。盡吾兄弟二人節衣縮食所餘爲基金。師范文正之意。不限於一族一姓。由親及疏。由近及遠。上自祭享祖先。推至周恤羣生。皆取給焉。老弱殘廢。偏於養少壯孤寒。重於教。學校工廠。量力建設。要使足以自立。夙抱此願。已廿餘載。擬俟年

登周甲。成立規模。今恐不及待矣。其細則及說明。所望汾弟本吾素志。詳細規定。昭示後人。慕汾垂涕應命。越四月。以所爲仁莊規條二十二則。又增補桐卿先生親定義田開支條例十七條示余。乞爲審定作記。余惟民生之困久矣。近世政治家當其窮居蠖處。敷陳鴻議。非不惓懷羣衆如周文之視民如傷。仁義之言。藹然動聽。一旦斧柯得假。則言與行違。彼方窮兵縱欲。以圖一逞。其對顛連無告之窮民。有如越人視秦人之肥瘠。忽焉不加喜戚於其心。甚者或持破壞家族之論。以親親長長恤民。贍族爲迂談。淫詖沸騰。遷流靡屆。而慕潮昆季獨能聰聽先人之彝訓。以博施濟衆立人達人爲職志。其施行之序。則又視親疏之分際。定厚薄之異同。推而廣之。利澤可及於無量數之民。生還究其原。仍權輿於至親至近之宗族。按之宋儒理一分殊之旨。釐然有當。是真能宏民胞物與之量。紹察倫明物之功。而無負乾坤宗子之仔肩者矣。余故樂得而記之。唐氏爲襄文公荆川先生之後裔。先生嘗與褚怡閒翁割菜地一區。以瘞城旁枯骨。集中有書瘞枯骨志碑陰云。惻隱怵惕。人人所同。惟無所感則倡之者鮮。使義舉更有大於此者。而有人倡之。人自必翕然趨之矣。君子是以知善俗之有機也。今日仁莊之舉。

其造端至宏。大人之欲善。誰不如我。他日繼起效法者必多。吾讀荆川先生遺文。不啻先知先覺。牖啓後人。慕潮昆季可謂昭茲來許。繩其祖武也已。先生論治有左編右編之輯。蓋取右史記言左史記動之義。集中右編序云。古今宇宙一大棋局也。奏議者奕之譜也。師心者廢譜。拘方者泥譜。其失均也。今日慕潮昆季取范文正公之良法美意。斟酌而損益之。易義莊爲仁莊。可謂不泥譜不廢譜者矣。嗚呼。天下至大事變無窮。湘鄉曾氏嘗謂用兵之道。隨地形時勢而變。決無一定不易之法。百世不敝之制。吾謂凡事皆然。大易繫辭傳所云窮則變變則通通則久。卽此理也。慕汾弱冠之年曾及余門。二十餘載。沈潛無間。數月以前余於書肆得荆川先生遺集持贈慕汾。因刺取集中所言附著於篇。慕汾閱之。吾知必怡然渙然相說以解也已。共和十有八年己巳季冬。常熟孫雄記。

二十年前曾見王葵園祭酒師評王澤寰同年龍文平養堂文稿云。閣下以歐曾之文章。闡程朱之義理。傳世行遠。有同操券。又云我兄每遇表章節義。敦勵名實之作。加倍精神。蓋尊性所嚮往者如此。以爲文之理論之實亦如此。不如此無貴有文也。

雄於文字無能爲役。而葵園師則曾經親炙。澤實同年亦素所服膺。光宣以來。飽更憂患。辛亥後株隱舊京。時有述造。傳世行遠。非所敢望。惟於葵園師所云。以歐曾之文章。闡程朱之義理。竊願請事斯語。誦以終身。庶幾於桐城陽湖。及近代湘鄉侯官諸派以外。闢一古文家大中至正之途徑。惜抱云。必以義理爲質。而後文有所附。攷據有所歸。洵爲至當不易之論。惟所選古文辭類纂。不錄朱子之文。未免囿於門戶之見。文公集中。如壬午戊申甲寅諸封事。固非坡翁荆公所能及。又如答陸子靜呂伯恭諸書。及濂溪上蔡二程先生諸祠記。均極有關係之文。文公與伯恭書。明言文與道不得岐。而爲二日溺於無道之言。敗壞心術。必爲世道深憂。先知先覺之論。固燭照於數千百年後也。往年爲慕汾作壯學廬記。今又作唐氏仁莊記。文雖不足存。而區區扶世翼教之誠。矢諸天日。知我罪我。均所不計。願與慕汾共勉之。己巳嘉平月。師鄭附記。

附錄慕汾謝函。

夫子大人函丈。頃奉手諭。并仁莊記。廻環莊誦。銘感弗諼。先考先兄在天之靈。亦當

含笑稱謝後世觀感興起將見老吾老以及人之老幼吾幼以及人之幼熙熙皞皞
進於大同皆夫子闕文之所玉成也肅伸謝悃恭叩鈞安受業期宗郭謹上己巳嘉
平月既望

有明義士南匯王蕉雪先生墓表 己巳六月作

君臣之義與父子夫婦爲一體均一成而不可變無所逃於天地之間者也。大易坤卦文言謂地道妻道臣道皆無成而代有終而先之以臣弑君子弑父非一朝一夕之故。聖人防微杜漸意至深遠蓋使君而可易置則子之於父婦之與夫何不可以易置者。此大亂之道人也而禽獸之不若矣。明成祖藉口削藩逼兒子而攘其位自以爲以子承父問心無忤。非外臣之所得容喙。故託詞於周公以自文其過不知己身曾一日爲建文之臣即當守臣道無成之義今乃攘其位而自立則竄弑之罪已無所逃。故嚴格論之即弔民伐罪之湯武猶均不能無慙德伯夷之扣馬而諫也。曰以臣弑君可謂仁乎。義正詞嚴洵足懸諸日月矣。方正學惟知此義故麀頂踵醢宗族而不悔。同時若鐵鉉暴昭黃觀景清諸公居大臣之位固宜視死如歸。卽下至補鍋樵乞之民亦赴清流投熾炭而爭先恐後。何其烈也。夫諸公之就死非以沽忠烈之名也實有見於君臣大倫必不可一日廢絕。故寧舍生而取義冀以植萬世之綱常也。有明一代士人咸重氣節而輕利祿。迄乎李闖竊國殉義如林。皆諸公實牖啓之。南匯義士王蕉雪先生名守

信。鶴沙布衣。授徒自活。聞靖難兵破金陵。悲憤不食。里中父老婉勸之。作絕命詩七絕十六首以見志。竟以絕粒死。年方五十。名在明史及上海南匯縣志。今所傳絕命詩僅存二首。有云恨我不能誅篡賊。敢偷殘息立人間。又云爲謝勸餐諸父老。此鄉是我首陽山。五百年後讀之。猶凜凜有生氣。信乎窮天地亘古今足與夷齊芳萬古矣。墓在下沙東康氏牆外。咸同間顧君憲章館於康氏訪得之。欲表墓而未果。光緒季年顧君令子忠宣繼承先志。募資修葺。並建碑亭。秦君榮光爲撰墓碣。于君粵潘君鏐又招集同志。撰啓徵詩。得詩二百餘首。先生之族裔祐孫作絕粒詩徵題紀實。詳載顛末。朱君家駒因撰徵詠輯錄弁言。馳函燕京。乞余爲詩文以旌義烈。于君香草乃余四十年前南菁同學。今則墓草已久宿矣。朱君字遯叟。則余近十年來賡酬篇什志同道合之詩友。且以兄事者也。秦君之文似尙撰於辛亥以前。而已痛心於綱常名教之說不足破禍福利害之私。一編之中三致意焉。朱氏弁言則有海宇騷然萬方一概之悲。蓋士生今日日覩魑魅鬼蜮之橫行。誠有不能已於言者。余故特揭君臣之義爲先生表墓之文。以質九原之靈。竊謂乾坤一日不毀倫紀。必有再造之時。中庸所謂質諸鬼神而

無疑百世以俟聖人而不惑。公是公非之所在。口誅筆伐。無所於讓也。抑余重有感焉。蕉雪先生籍隸南匯。南匯於明代尙爲上海。至有清雍正三年。始析置爲縣。于秦顧朱諸君力任表揚之責。或與先生同里閭。或居華亭上海奉賢青浦諸邑。並爲舊松江府屬。吾聞松江有求忠書院。黃先生之雋曾爲碑記。謂方正學雖遭滅族之慘。而有一子遁於松江。初冒姓余氏。後旣蕃衍。遂復其宗。蓋彼蒼之默佑忠烈。使不至覆宗殄祀。有若此者。然則五茸三泖。柘湖歇浦之間。固爲忠魂毅魄所馮依。名教綱常。今雖墜地而紹承先烈。挽救橫流。亦後起諸君子之責也。雲天萬里。心嚮往之矣。

近年所作表揚忠孝節烈之古近體詩。有二百餘首。文亦有四十餘篇。他日擬別刊一冊。名曰乾坤正氣集。而以此篇冠首。一俟籌得割闕之費。即行付梓。今暫編入此集。就正朋好之憂心世教者。師鄭附記。

俞母楊太恭人墓誌銘

共和紀元十有七載。都會南遷。舊京寥落。同邑世好楊君孟龍。攜眷旋吳。余設餞於城東酒樓。孟龍臨別作而言曰。吾先考妣及世父調甫。心甫兩府君。銘幽之文。均吾丈所撰。今吾適俞氏姑母。又於今年六月逝矣。姑母仁心淵識。實大有造於俞氏。不可無傳。

於後。廐南歸後卽輯事略。郵達吾丈。乞銘其墓。丈其許我。余曰。俞氏與不佞亦累代世好。石庵先生於四十年前。同應省試。聯牀話雨。契合無間。太恭人之懿行。又應銘法。奚敢以不文辭。按狀。太恭人姓楊氏。常熟人。父曰書成府君。諱汝孫。廩貢生候選訓導。母曰龐太君。刑部尙書文恪公之妹也。書成府君有四子二女。太恭人於女居長。幼嫻姆教。端靜溫恭。言笑不苟。父母愛之摯。擇壻甚嚴。年二十九始歸同邑俞石庵先生爲繼室。俞故素封。而太恭人勤儉循禮。法一如在室時。謂守二親。彛訓勿改。吾儒素家風也。石庵先生前室屈恭人生四女。幼者在襁。長者未及十齡。以養以教。以至於成人而嫁。皆太恭人任之。石庵先生年四十無子。納妾王氏生子二。長曰鴻元。次曰鴻仁。太恭人自撫鴻元。而以鴻仁命妾撫之。及長。各爲授室。鴻元娶翁氏。鴻仁娶孫氏。太恭人視子婦如己女。體恤拊循。無微不至。諸婦亦承歡奉教。依戀庭闈。無威姑翼翼之懼。石庵先生嘗與邑中父老贊治地方公益。或爲人排解紛難。太恭人恆勸其持平。折中無任意氣。數十年來。石庵先生鄉望翕然。論者謂悉由太恭人內助之力。石庵先生嘗與人合營商業。晚年頗有損耗。共和七年戊午。遽病中風卒。內外諸事。萬端待理。悉集於太恭

人一身太恭人既念家門之衰殄復遘訟事之糾紛憂患侵尋備嘗困阨棘心劬勞神明瘁矣。鴻元於娶婦之後納一妾已生子猶不令家人知太恭人廉得其情因命去妾留子故鴻元歿而喪祭有主宗祧有承三黨親族咸頌其規畫之得當太恭人於痛夫哭子萬事怫鬱之餘亦藉含飴弄孫稍自解慰太恭人仁慈勤儉出於天性待人接物藹然可親夙興夜寐躬自操作至老不衰脫粟布衣自奉至約而恤貧無吝且秘不語人謂施濟只盡吾心力所能固不望報亦非以求名也年事既高屢更患難追亡撫存神茹形悴思惟釋氏家言可以明心見性故禮佛益虔平居與同懷諸昆季怡怡友愛白首靡間不幸二十年中相繼凋謝歲時歸視顧影子然愀焉不樂嘗語從子孟龍曰人以老壽爲福吾但覺其可悲數十年間人事之變遷如夢如幻曠乎不知其迹之所存惟餘歷歷心影耳又嘗顧其冢媳而歎曰吾有二子爾夫純謹而不壽爾叔樸愿而無文一孫雖稚然爲爾夫所遺吾無孫而有孫爾無子而有子爾其善訓育之吾老矣風燭殘年朝暮難恃其責在爾非吾力之所能庇也其言至爲沈痛蓋惻門祚之凋零盼雛孫之成立期之切不自覺詞之悲也太恭人生於有清咸豐七年丁巳二月初一

日歿於共和紀元戊辰年六月初三日。年七十有二。石庵先生諱鍾果。候選主事。加四級。其世系別詳家傳。子二。長鴻文。前卒。次鴻仁。孫樹麟。女四。適同邑程沈趙曾均士族。孫女二。樹銓。樹銓均早殤。鴻仁將於某年月日。扶太恭人靈櫬。合窆於某所之原。嗚呼。如太恭人之賢。雖漢之嚴。晉之陶。母何以加茲。俞氏今日門祚雖衰。而積善之家。必有餘慶。叔子冢孫頭角嶄然。光大門楣。翹足可俟。維太恭人之德實佑啓之。天人感應之理。固無爽也。乃爲銘曰。

坤道含貞。志可章仁。民濟衆名。弗揚歷屯。遇蹇摧肝。腸鳳雛旁。挺勤扶將。宗支百世。縣烝嘗明德之後。今其昌。九京無憾。斯歸藏。

壯學廬記

錫山唐參事慕汾。潛叟先生之仲子也。潛叟先生。濟急振貧。救民水火。仁惠周浹海內。甲子仲冬。余爲先生作哀感錄。序所稱學紹橫渠。德配伊尹者也。慕汾之族兄郭鄭部郎浩鎮。爲余總角交。同肄業南菁書院。又同捷癸巳秋闈。慕汾舞勺之年。郭鄭已屢稱其賢。光宣之交。余奉朝命監督京師文科大學。慕汾年甫弱冠。肄業上庠。稱高第弟子。辛亥後二年畢業。迭爲當軸。延攬倚重。歷官部院。錚錚有聲。而慕汾歆然不自足。時以德之不脩。學之不講。爲疚懼。應官餘暇。閉戶潛脩。時時從余及舊日文科大學講師林徵君畏廬考德問業。孜孜矻矻。久而不懈。今畏廬歿已五年。慕汾展誦遺牋。輒爲感愴。吾邑道咸間宿儒席蔚孫先生彬。困於場屋。課徒著書。身後蕭條。僅餘朵雲樓詩文集數卷。慕汾因其爲潛叟先生舊交。節縮俸入。手校付刊。丙寅季夏。余曾爲作弁言。蓋其性情肫厚。篤於風義。固有大過人者。而亦由研精墳典。忘食忘憂。饜飫於詩書之道。味深而且久。有以培根而蒞實也。甲子夏間。慕汾於城西府右街。購地若干畝。葺樓屋若干楹。名之曰壯學廬。率眷屬居焉。樓之東。潔治一室。奉潛叟先生暨孫太夫人遺容。晨

夕焚香。歲時蠲祀。懷乎如見。思貽令名。乙丑孟秋。余六十初度之辰。慕汾招同學諸子。置酒於壯學廬中。史承棗參事。薊劉蘊沂僉事。魯曾咸來赴會。談藝賦詩。流連竟日。余既展拜。潛叟先生畫像。肅然起敬。又幸德門之有後欣吾道之孤油。油盡三爵焉。席散。慕汾乞爲壯學廬記。余諾之。而人事卒卒。未有以應。迄今追溯乙丑秋間。又三更裘簾矣。慕汾之齒亦已離壯年而入強仕。世變紛紜。滄桑屢換。未知所屆。都會南移。昔之宦學游息於茲土者。十去其九。而余與慕汾猶淹滯燕郊。商量舊學。相濡相煦於荒涼寂寞之鄉。幾令舉世哂其迂拘而不化。雖然。世運之遷流幻化。而無定者也。而吾中國聖哲儒先。繼往開來。絲延不絕之學業。則俟百世而不惑者也。由此則治。不由此則亂。世局縱有萬變。要又能離聖學以爲治。余嘗謂自古人才。未有不出於學。學者所以盡爲人之道。備萬物之則也。世之治也。則嚮天人之旨趣。擴位育之經綸。推行禹稷飢溺之仁。發堯姬孔制作之業。不幸身丁衰亂。亦當拯生民之陷溺。維聖教之凌夷。遏人欲於橫流。存天理於既滅。無使人紀人綱。自吾身而墜地。凡此皆學者所有事。終身由之而不能盡一息。尙存而不容稍懈者也。余雖無能爲役。竊願與慕汾共勉之。慕汾不日

將有龍江之役。余眷戀不忍言別。因述所見以贈其行。且即以是爲壯學廬記。以踐乙丑秋間之宿諾焉。戊辰孟冬之月。孫雄師鄭氏記。

奉賢泰日橋紫陽宗祠碑記

奉賢朱粥叟遯叟兩先生。孝友文章。人倫師表。十年以來。雖未覲面。而詩文酬和。郵使不絕。所謂文章有神交有道也。粥叟逝於丙寅之歲。鄉人私謚曰貞介。余旣爲詩哭之。又應遯叟之請。爲撰詩文集弁言。遯叟又以書來。屬爲紫陽宗祠碑記。且曰。宗祠之建。我先兄貞介公。與我籌之。有年。以百畝之義田。支應貧族之婚嫁喪葬。讀書經費。此外又銖積寸累。十餘年。計其贏餘。幾經艱難困苦。而始落成。惜貞介公已不及見矣。又曰。吾子所爲桐鄉青鎮盧氏祠堂記。思遠憂深。言中有物。傳作也。吾子之文。多爲人。人。意。中。所。欲。言。而。不。能。言。或。不。敢。言。者。吾子獨奮筆言之。以盡覺世牖民之責。吾朱氏宗祠將賴子文以傳。子其勿辭。余讀函皇恐弗敢應。亦弗能謝也。按奉賢泰日橋朱氏系出南宋吏部侍郎公諱浚。爲贈太師封徽國公謚文公之曾孫。文公季子工部侍郎經筵侍講公諱在之孫。由閩遷浙。由浙遷吳。迄今已三百載。其始遷泰日橋者。爲明賢府君。

遯叟之六世祖也。至四世翼周府君而族始大。科名蔚起。代有聞人。詳見黼山史。枚兩府君所纂紫陽家乘。遯叟自爲宗祠落成記。亦撮要述之。茲不贅陳。夷考紫陽山在安徽歙縣城南。文公讀書其上。其後徙居他所。輒榜所居讀書處曰紫陽書室。文公一生潛瑣性理。繼往開來。集諸儒之大成。發先聖之秘奧。皆於此讀書時肇其始基。宗祠之名冠以紫陽所從來遠矣。文公中年名所居草堂曰晦庵。因號晦翁。晚又自號滄洲病叟。最後箴易得天山。遯遂自號遯翁。正與遯叟相合。祖孫同揆。非偶然也。曾子云。慎終追遠。民德歸厚。余幼時嘗讀文公語類。憶其論追遠之義。大略謂人之一身。推其所自。則必有本。遠祖雖至十世以上。其血脈終是一貫。仁人孝子。寧能無追感之情況。耄耋期頤之叟。每以得見孫曾爲樂。今乃見十世以下之孫曾。羅拜吾前。其欣喜爲何如耶。文公之言。至情至性之言也。宗祠之建。合數十世之栗主並聚一堂。繼繼繩繩。縣延弗絕。雲仍昆耳。合族以食。報本反始。靡遠弗追。民德有不歸厚者乎。推此不忍死其先人之心。則凡先聖先賢之綱維彝訓。自必兢兢捧持而弗使墜地。更由親親而仁民。由仁民而愛物。其不欲使一夫之轉於溝壑。不待言矣。吾又嘗讀文公文集。謂慎終追遠。自

是天理所當然。人心所不能已。春秋之時。世教既衰。民不興行。曾子故發此言。冀在上位者有以倡之也。嗟乎。今之宇宙。殆哉。岌岌矣。人紀人綱。蕩然莫續。較春秋時。世教之衰。蓋什佰倍蓰焉。居高位。享大名者。視天親若路人。毀先墓而弗問。且語人曰。是固理所當然。彼所恣意敷陳。有爲吾口所不忍述。吾筆所不忍紀者。乾坤之毀。殆不遠矣。貞介與遜叟昆季。生此泯棼之世。獨能力挽頽風。收族敬宗。建祠潔祀。紹祖考之彝訓。殆卽剝果蒙泉之所賴。以發生而乾坤或不致終毀之徵乎。昔管幼安生於東漢之季。徒以與子言孝與臣言忠。而論者稱其功比於葛侯。同一救民水火之德。吾始嘗讀而疑之。觀於今日。世變之亟。益信古人言之不吾欺也。因推闡文公解釋論語之說。爲斯記。以質諸遜叟。詞費之譏。知不免焉。己巳孟夏常熟孫雄記。

朱遜叟詩集序

奉賢朱遜叟先生。余於弱冠時。即聞其名。未相識也。先生自辛亥以後。不問世事。惟以吟詠自娛。每一篇出。吳中詩社。轉相傳鈔。洛陽爲之紙貴。近十年間。先生不棄弁陋。時時馳函舊京。以詩文相切磋。余亦頗有庾和之什。郵筒往來。旬月無間。先生之詩。積有

數千首皆附錄於四十年來日記中。高可隱人與越縵堂湘綺樓相伯仲也。己巳春初復將日記中各詩別鈔成冊。刪爲定本。乞余作弁言。久久未應。是年孟秋先生之季子杏南逝世。杏南才高學粹。德藝均冠絕儕輩。世方以大用期之。迺以時疫傳染。不及療治遽殞。其生先生哭之慟。余引南屏集中祭姊文數語以慰之。蓋先生於昨年遭黃門之戚。余於今歲孟春亦遭繼室清河君之喪。南屏先生所云。人之生世。年命長短不齊。其不幸而短者。人莫不悲傷之。幸而長者。則其兄弟夫婦與其子姓之屬。必多有短者。出其間。是長者所贏之歲月。皆爲短者哀傷之歲月也。然則短者不幸而長者可爲幸耶。其言絕悲痛。適爲吾兩人所同感。先生覆函亦嗟嘆不已。先生系出婺源。爲徽國文公之裔。文公之論詩也。嘗欲分古今詩爲三類。附三百篇楚辭後。爲詩之根本。準則自書傳所記。虞夏以來及魏晉爲一類。顏謝以下及唐初爲一類。自沈宋定著律詩。下及宋代爲一類。又謂李杜韓柳詩皆學選。杜韓變多。李柳變少。自其變者而學之。不若先自不變者而學之。故文公於詩尤愛陶徵士。韋左司。柳柳州。謂非研覽三家詩集。無以發其蕭散沖澹之趣。遜叟先生之詩探源騷選。擷秀陶韋。雖不拘拘於一派一格。而蕭

散。沖。澹。詩。乃。似。其。爲。人。知。其。得。力。於。祖。訓。者。深。也。文。公。又。嘗。謂。曲。禮。衣。毋。撥。足。毋。蹶。將。上。堂。聲。必。揚。語。皆。用。韵。此。必。古。人。用。以。教。初。學。如。管。子。所。錄。弟。子。職。之。例。故。所。輯。小。學。並。錄。韓。昌。黎。董。生。行。范。魯。公。戒。從。子。詩。蓋。以。詩。之。爲。教。溫。柔。敦。厚。其。善。者。足。以。感。發。人。之。善。心。而。其。詞。氣。音。節。抑。揚。抗。墜。使。學。者。優。游。涵。泳。而。自。得。之。故。其。感。人。尤。易。入。余。嘗。謂。孔。子。所。云。興。觀。羣。怨。邇。事。父。遠。事。君。實。爲。詩。中。百。世。不。易。之。約。法。風。騷。以。降。詩。體。雖。屢。有。變。遷。而。宗。旨。終。古。不。墜。猶。之。政。體。縱。有。變。化。而。立。國。之。本。要。自。有。不。可。移。易。者。在。此。可。爲。知。者。道。難。爲。俗。人。言。也。邇。叟。深。以。鄙。見。爲。然。嘗。以。有。明。義。士。南。匯。王。蕉。雪。先。生。絕。粒。詞。廣。徵。題。詠。余。旣。爲。蕉。雪。先。生。撰。墓。表。又。作。九。言。長。歌。邇。叟。和。之。冀。以。闡。揚。潛。德。挽。救。橫。流。此。詩。今。存。集。中。其。他。諸。作。亦。多。原。本。忠。孝。貶。斥。奸。邪。發。明。考。亭。纂。輯。小。學。之。深。心。推。衍。尼。山。小。子。學。詩。之。懿。訓。豈。與。夫。尋。常。吟。風。弄。月。之。徒。摘。句。尋。章。之。士。爭。雄。而。角。勝。哉。文。公。讀。書。樂。四。首。大。全。集。不。載。吾。鄉。經。師。陳。亦。韓。先。生。祖。范。謂。此。四。詩。包。涵。天。地。萬。物。之。理。徹。上。徹。下。無。內。無。外。非。文。公。不。能。作。其。釋。迴。然。吾。亦。見。眞。吾。數。點。梅。花。天。地。心。二。句。之。義。云。爲。老。氏。之。學。者。曰。吾。喪。我。此。則。曰。見。眞。吾。喪。我。者。寂。滅。也。眞。吾。者。貞。

固也。刊落浮華。本體乃見。所謂收奇功於一原也。然心如活火。異於死灰。剝於上。旋復於下。闔斯闔矣。靜斯動矣。當窮陰。返寒之時。而數點梅花。早已漏洩春光矣。嗟夫。余與遜叟。今日所處之時。可謂窮陰。返寒矣。剝極而復。天心不遠。惟期葆此貞固之眞。吾而專心致力於一貫之文章。性道以尋孔顏之樂趣而已。先生聞吾言。當必有相說以解者。因書此以爲弁言。且以慰其投杖之悲。己巳夏正九月九日。常熟孫雄序。

清故山東蒲臺縣知縣楊君墓誌銘

有清景廟初元。龍集乙亥。長樂林文恭師奉朝命。視學三吳。在任歷五年之久。得士稱盛。同邑丙子優貢楊君調甫。爲師入室弟子。君之同祖昆弟。同升同愷。與余同補博士。弟子員並爲師所賞契。是在戊寅之秋。泊庚子辛丑以後。余客北洋。辦理學務。君方吏隱津沽。昕夕過從。縞紵互獻。辛亥國變。君棄官歸里。臨行話別。都門語及時事。惻惻垂涕。今雖寒暑十餘。易猶如昨日事也。昨歲君逝。遺孫夔將於某年月日。奉君櫬卜葬於虞山某某之原。具狀來乞銘。余何敢辭。按狀。君諱同櫛。字調甫。一字思重。江蘇常熟人。先世出自宋尙書石林葉公。傳二十餘世。有諱德賢者。撫育於源甫楊公。清康熙初。由

青浦徙居常熟。以孝弟力田起家。是爲君之八世祖。高祖岱。旌表孝子。曾祖景仁。嘉慶戊午舉人。刑部安徽司員外郎。祖希鈞。本生祖希鈺。均國學生。考汝孫。廩貢生。候選訓導。三世均以子貴。贈榮祿大夫。訓導公有子四人。伯曰崇伊。叔曰崇光。季曰崇綸。君其仲也。生而岐嶷。讀書過目成誦。咸豐庚申。粵寇陷邑城。隨訓導公避地南通州。偕諸昆季攻苦勵學。弦誦弗輟。同治己巳。遊邑庠。受知於學使者童薇硯侍郎。光緒丙子。舉優貢。朝考一等。以知縣用。選授山西絳縣。親老告近。改選山東蒲臺縣。在官有聲。歷宰德平。武城。樂陵。商河諸劇邑。所居民愛。所去民思。勤於折獄。不假手幕僚。得一牒必聽兩詞。反覆詳讞。矜愍。明恕。不獲其情。不已。及眞情。旣得。應機立斷。民以無冤。大吏知其能。鄰有疑獄。輒檄君審理。往往一訊而伏。民驚爲神。樂陵民有族人爭產者。歷數任不能決。君以一本之誼。婉切曉諭之。兩造均流涕願息。訟去官之日。有商人曾獲罪被笞者。流涕隨衆相送曰。吾幸遇楊公。方知改行爲善也。其誠意之感人如此。宰武城時。禮敬邑中賢士。有大興革。造門請謁。咨而後行。訓導公聞之。喜曰。吾仲子能得濟臺減明矣。合肥李文忠公。方爲使相。聞君吏才。奏以自隨。因以候補直隸州知州分發直隸。歷任

要職。庚子後。項城袁公由魯撫擢任直督。袁公與君伯兄御史君同爲權相。長白榮文忠公所倚重。後因事微有隙。遷怒於君。置之閒散。君夷然處之。聽鼓應官。不改常度。浮沈十載。從無慍色。亦從未與人私語。但委心任運而已。歸田後。始偶爲所親李君士璵言之。亦仍無怨誹之意。其識量之過人。又如此。此亦足以傳矣。君又精越人術。於黃帝內經素問及張仲景孫思邈諸方書。研究有素。洞見垣方。爲人治病。應手輒愈。有筆記數卷。多論醫術。書以示其從子。夙謂儒門事親之學。不可不注意也。又謂吾先人尙書公遜書錄語云。素問勞逸有常。飲食有節。入語勝於服藥。洵爲千古名言。歐瀛學者。侈語衛生。莫能外也。君生於咸豐元年辛亥某月某日。卒於共和十四年乙丑夏正十二月十七日。年七十有五。娶孫氏。繼娶陳氏。均封恭人。子一朝。廩國學生。陝西布政使經歷。孫一夔。孫女一。適紹興孫氏。君於還山後十餘年間。愛鄉心切。如修城垣。練民團。諸役。均不避疑謗。力任其勞。人以爲難。然於君祇爲末節。不具書。銘曰。

愷悌君子。古循吏也。化行鄒魯。勤撫字也。激波千頃。德不器也。澹泊明志。風有位也。晚遇滄桑。涵涕淚也。我銘幽宮。詞無媿也。

徐曙岑竹間吟榭集序

詩有俚語。經顧寧人筆。輒典詩有庸語。入屈翁山手。便超此繆。天自先生之言。沈確士宗伯采入別裁集。詩話者也。吾於杭縣徐君曙岑之詩。蓋亦云然。曙岑爲吾甲午同歲生。左泉工部之仲子。壬戌歲始相識。甲子春。延君蒨士約入詩社。風雨披吟。樂數晨夕。與論古今事當否。及品藻人物。輒如吾意中所欲言。所爲詩深秀刻露。不落凡近。而又妙造自然。長篇短什。無不工。社中耆俊。如半園澹堪。退舟稼谿諸子。咸斂手推服。曙岑官郎曹有聲。迭爲計相所倚重。而翛然有山野之思。嘗繪西溪夢隱圖。廣徵題詠。以見志。戊辰之夏。都會南移。曙岑挂冠奉母歸。越徜徉於六橋三竺間。託市隱以自娛。且以娛其親焉。嘗以近作寄余。如別舊都云。人前一事差堪慰。歸去依然奉板輿。又云。準備廿年塵事了。綠梅花底掩柴門。又滬杭道中偶成云。道人未了瓊臺劫。貪看山河一局棋。又薄遊湖上晚歸云。錢王錦段今何在。五代殘雲卷綠蕪。其胸襟風趣。可以想見。曙岑有女弟曰鏡芸。學詩於迺兄。寧靜而精進。嘗手寫曙岑十餘年吟稿。次爲十卷。名曰竹間吟榭集。乞序於余。余諾之。而遲遲未應。平生爲文。不假思索。譽我者謂如萬斛泉。

源不擇地而湧。而此文獨遲之又久。負宿諾者逾年。蓋與曙岑契合之深。忽焉離索。不勝惘惘。即曙岑來函。亦云曩者共事硯席。追隨杖履。視若尋常。由今思之。此樂已如天上矣。又何怪余之每一拈毫。輒覺悲從中來。百感交集。遂不能成一字乎。大凡文章得失。惟作者心知之。他人所言。恒不如自述之親切有味。往者當於茗餘酒後。從容詢以得力之所在。曙岑自言行年二十有六。始學韻語。以賦性恬退。頗者王孟。嗣則粗解聲律。兼治杜韓。逆溯騷雅。而於感時傷事之作。輒復擷玉溪之藻。續數協律之恢奇。長歌短詠。夫豈得已。至若記遊諸什。讀史譚言。或忘形於山水。或慨志乎簡書。直抒胸臆。寧待解人。居恒愛誦古人之詩。派無分唐宋。代無分遠近。性所喜者。則把卷反覆。弗忍暫釋。每嗤世上辨門戶者。政如村姑里嫗。踟躕一隅。不識城市之爲何物。年來厭惡塵事。用志漸專。立意惟避凡近。著字懼落平庸。頗欲自躋於翦刻省淨之域。深媿學術膚淺。未能猛進耳。曙岑之言甘苦有得之言也。余故備記之。如右後之讀者。謂爲龍門之自序史記也。可謂爲皇甫之序三都賦也。亦無不可。詩稿斷自戊午。迄於戊辰。惟第一卷爲戊午己未兩年所作。餘皆歲各一卷。迭經曙岑手自刪削。名章俊句。美不勝收。若

題散氏盤拓本。坤寧宮觀新嘉量歌。題雷峯塔寶篋陀羅尼經卷諸作。即亭林集中之
悟溪碑歌。及勞山歌之嗣音也。自題西溪夢隱圖。苦雨落葉諸篇。又若與亭林桃花溪
歌。榜人曲。淮北大雨。秋柳諸作。相賡和也。哀武昌行。鄰翁歎。讀五代史。擬行路難諸篇。
則又與翁山集中弔雪庵和尚望晉恭王園及奈何帝諸樂府。有同聲相應之美。曙岑
春秋方盛。今甫三十有七。鏤而不舍。吾未能測其所至。而今日所作。已可追蹤顧屈兩
先生。若持較其鄉先輩。西泠五布衣。殆亦無多讓焉。吾故以繆天自二語。揭諸簡端。他
日有編選近代別裁集者。必有取於是矣。嗟乎。陵谷滄桑。變幻未已。吾儕身世。未知視
顧屈兩先生。何如今姑不論。然嘗讀亭林與潘次耕書。規以勿比嘖於豪貴之門。謂能
奉母遠行。則縣山之谷。弗獲介推。汶上之疆。堪容閔子。知必有以處此也。今曙岑敝屣
功名。護闡潔養風節。較次耕爲高。吾知必爲前賢所心許。又亭林和陳生芳績詩云。留
得一絲忠孝在三綱。終古不曾淪。翁山贈朱士稚詩云。神虹樂泥蟠。鴻鵠安柴荆。天地
一塵垢。吾心獨太清。又謁杜少陵祠云。一代悲歌成國史。二南風化在詩人。不佞於中
夜不寐時。輒取兩先生詩三復之。願與吾曙岑共勉焉。努力崇明德。皓首以爲期。剝復

貞元天心不遠。請以此文爲左券可乎。

黃黎雍千華覓句圖記

千山舊名千朵蓮花山。又簡呼爲千華山。俗謂共凡九百九十九峰。雄踞松花江上。擅東北巖壑之勝。隱君子多棲遲其間。以之爲碩人之槃澗。松客詩所謂十年心事在千華者也。松客黃君舊字黎雍。名曰式叙。籍隸遼陽。吾友廬江陳子言因其嘗客吉林。地近長白多松。因字之曰松客。且以名其集。集以丁卯季夏印行。海內名流咸稱道之。謂可振其鄉先生陳石閭李鐵君之墜緒。余與松客初未識面。而郵筒唱和不絕於道。自甲子年迄今庚午。已七更裘葛矣。林徵君畏廬工繪事。松客嘗乞繪千華覓句圖。未就而逝。無錫楊令茆女士曾以詩畫請業於畏廬。往歲薄遊東省。松客贈以詩。有云藝兼書畫詩三絕。跡滿東西北九州。爲時傳誦。令茆因爲作此圖。以成畏廬未竟之業。松客徵余題詩。復屬作記。余頻年病廢舊都。時以小詩自遣。懶於作文。久未脫稿。一日松客郵示濱江留別詩五古三章。語似簡澹而意極沈鬱。三復名篇。彌深感愴。易履之九二曰。履道坦坦。幽人貞吉。梁氏寅釋之曰。君子持身守道。不輕自售。故能貞吉。遯之上九

曰。肥遯无不利。王氏弼釋之曰。超然絕塵。心無疑顧。憂患不能累。矰繳不能及。是以肥遯无不利也。今值天地閉。賢人隱之時。考槃之君子。正宜獨寐寤言。彈琴詠風。與世相忘。班孟堅漢書叙傳有云。漁釣於一壑。棲遲於一邱。則萬物不擾。其志天下不易。其樂松客果效淵明之歸隱。惟恐入山之不深。吾知九百九十九峰之山。靈必將含笑相迎。盼我松客。成謝朓驚人之句。以爲巖巒生色也。曩者松客去吉林。賦詩索和。卽有一朝麋鹿返山林之句。今者客濱江五載。又復超然退舉。蓋猶泉石膏肓之初志也。千山最高處。名仙人臺。有二仙對奕之像。際此河山破碎。而中原莽莽。羣雄猶復角勝於楸枰方罫之間。自詩人冷眼觀之。當有不勝其感慨者矣。吾友徐君曙岑。昔歲蜚聲郎署。曾以西谿夢隱圖徵題。戊辰季春。都會南移。曙岑奉母歸隱於六橋三竺間。閉戶沈吟。易夢隱爲真隱。曙岑與松客同在盛年。其詩格亦均磊磊不落凡近。吾嘗貽賤陳伯嚴前輩以南徐北黃如驂之靳爲言。曙岑前以題千華覓句圖七律二章郵示。有云。爛柯一劫成終古。挿頂千華拓片陰。蓋亦有感於二仙對奕之遺蹟而發。吾三人雖天各一方。而結念所及。固有心心相印者。在不知何日能會合聯吟同登仙人之臺。一證橋中樂。

趣也。然余則老矣。世事變幻。未可知。惟願如松客濱江留別詩所云。永保好顏色耳。爰作此記。以爲他年盍簪之左券云。庚午閏六月常熟孫雄師鄭氏記。

舊京文存卷二

常熟孫 雄
原名同康師鄭

桐鄉青鎮盧氏祠堂記

書載放勛之治。極於協和萬邦。黎民於變而必肇端於親睦九族。周禮地官鄉三物以六德。六行。六藝教萬民。六行之目曰孝。友。睦。婣。任。恤。春官所掌於昭穆之位。禴祠之祭。三致意焉。誠以慎終追遠。敬宗收族。足以端治本而弭亂源也。浙中桐鄉盧氏。代有陰德。有清順康之際。思南府君自金華府之東陽縣遷居桐邑之青鎮。世營商業。傳至六世健庵府君。七世菊人府君。始先後食餼於庠。八世小菊府君。同治癸酉舉於鄉。澗泉次長之祖考也。澗泉之考曰蓉裳府君。以小宗入嗣大宗。爲邑名諸生。潛德弗耀。勞玉初尙書曾銘其墓。所謂不磷不緇。一代完人也。澗泉敬承家學。宣勞平準。蔚爲時棟。譽望炳然。以蓉裳府君夙有創建宗祠之志。未克觀成。因於共和紀元之九載。歲在庚申。購置觀塘橋孔氏舊居。葺爲祠宇。凡爲屋若干楹。前堂後寢。尊盥滌濯庖湑之所。咸具。奉思南府君爲不祧之祖。秋霜春露。歲時薦馨。必誠必潔。復以召弓學士爲乾嘉間

經師雖注籍餘姚而與桐鄉盧氏系出一源因額其堂曰抱經以冀耕穫經畝緣延世德焉祠之東舊有孔氏餘屋並加繕治雜蒔花木蔚然深秀澗泉自題曰退補軒取孝經退思補過之義期以他日歸田溫尋舊學效蘧大夫之寡過焉縮版之載百堵之興經始於庚申季春之月落成於辛酉季秋之月凡用國幣一萬餘元別購水田若干畝房屋若干所取所入爲常年經費繼志述事規畫井然可謂賢矣昔張皋文先生撰嘉善陳氏祠堂記謂宗祠之作起於宋之大儒蓋聚百世之主於一堂而合子孫之屬以祀之使俱生其水源木本之思而因進之以敬宗收族之教於以惇化善俗莫近於此澗泉其真知此義矣戊辰仲春之月澗泉校刊勞尙書遺集既竣持以贈予又屬譔祠堂碑記予維近歲邪說暴行紛然竝起欲舉歷代聖賢相傳守之倫常綱紀漸滅以盡甚者或以追祀祖先懸爲厲禁君子有人道之懼焉剝極而復天心不遠如澗泉之善繼善述愛其所親碩果不食之徵其在斯乎日月出而燭火息伊耆協和之治周官孝友之風庶幾重見於今日乎余日望之矣

清故禮部郎中趙君迺唐墓誌銘

君姓趙氏。名晉臣。字迺唐。一字藹棠。奉天懷德人。祖籍直隸永平。曾祖國旺。祖湧。父鑑。清世稱聲遠先生。著有耕禮堂家訓。世仁甫學士。榮稱爲言言金石字字龜鑑。持此一篇。不獨垂訓於家。雖治國平天下可也。祖父均封資政大夫。祖母氏劉。母氏李。均封淑人。君幼承家學。靜穆不好弄。讀書穎悟而勤奮。朝經暮史。口誦心維。孜孜不倦。聲遠先生因以家事委長子晉升。不以煩君。俾得肆力於學。年十九。補學官弟子。中光緒戊子舉人。典試翁文恭協揆。許恭愼尙書。房施鶴笙編修。紀雲均賞異之。君奉聲遠先生之教。謂讀書宜以聖賢爲期。不可以科名自矜炫。仍研求實學。己丑後。五上春官。均以額溢見絀。旋考取咸安宮教習。己亥膺昌圖陳太守濟蒼之聘。主講榆城書院。黜浮崇實。成就宏多。甲辰廷議停廢科舉。因納貲爲禮部郎。時國事多艱。政窳人雜。異說沸騰。君目覩時危。有所感觸。悉寄於詩。辛亥國變。棄官歸里。篇什益富。均寫邱麻離黍之思。項城當國。召集國民會議。邑令以君名應徵。君堅辭不赴。其後應徵者多。被迫脅咸服。君之先見。君退然謝曰。吾實疏嬾。故自辛亥挂冠以後。足跡未入都門。非真能燭照也。君事親怡怡。色養每侍立屏氣婉容。不命之坐不敢坐。一言之命。終身佩之。生平言動。

必以禮造次弗違。五十後涵養尤深。喜怒不形於色。甲子商肆虧折。賠累至十餘萬金。制產以償。無怨言。亦無慍色。天懷冲澹。不喜紛華。家事委之諸子。絕不過問。庭中雜栽花木。手自培壅。興至輒形之於詩。長日手不釋卷。焚膏繼晷。矻矻窮年。書法得鍾王遺意。求者紛如。無論雅俗。有暇靡不應者。著有師竹齋吟草若干卷。詞一卷。雜文若干卷。耕禮堂家乘一卷。虛懷若谷。不欲問世。惟吟草甲集三卷。余於甲子仲秋序而行之。以應海內詩人之求。索非君志也。晚歲研精佛典。淵乎有得。自號蓮石。尤洞澈於生死之際。嘗自作輓聯。又詠表聖生壙詞意。以自況。病中預囑家人於危篤時。勿哭泣。勿詢家事。惟助我誦佛號而已。君生於同治元年壬戌十二月十二日。卒於共和十有八年一月十四日。於夏歷爲戊辰年十二月初四日。年六十有七。配陳恭人溫恭淑慎。內助稱賢。卒於光緒三十年甲辰五月初八日。年四十有五。繼室劉恭人子七人。鍾甲鍾翰鍾興鍾喬。均陳恭人出。鍾翰已前卒。鍾甲遭君大故。哀毀過禮。感疾不起。卒於君葬期前三日。鍾祚鍾彥鍾瀛。均劉恭人出。女四人。長字曲。未嫁。卒。次適王。旣嫁一年卒。均陳恭人出。三四待字。均劉恭人出。孫六人。錫震前卒。錫純錫鈞錫鵬錫博錫倫。陳恭人之卒。

也。殯而未窆。己巳四月八日。鍾輿鍾喬等奉君與陳恭人靈櫬。合葬於懷德縣西秦家屯之原。先期具函幣乞爲銘墓之文。余與君同出翁文恭許恭愼二公之門。交契數十載。親若同氣。深服君之澹泊寧靜。清遠閑放。自媿弗如。遠甚而君謬推余爲直諒。多聞之友。病亟時。猶惓念舊都旅況之艱。爲鍾喬太息言之。往歲余序君詩。謂詩書忠孝之氣。磅礴鬱積於胸中。偶有所觸。輒假不律以宣之。絕無矯揉牽強欺世欺人之語。故讀君詩。卽如見君之爲人。君長余四齡。上年余以自壽詩寄君。有轉瞬重逢辛未年。七秩稱觴。浮綠螳之句。今乃執筆以銘君墓。痛可言耶。銘曰。清廟之器。嶽嶽禮臣。澤畔之吟。矯矯逸民。遯世無悶。躡虛應真。夔乎幽宮。千載勿湮。我銘匪私。疊山之倫。

懷德趙孝子鍾甲墓誌銘

懷德趙禮部乃唐之卒。余旣銘其墓矣。禮部君之安窆也。筮於己巳年夏正四月八日。其宅兆在秦家屯之原。先期三日。其長子鍾甲以毀卒。鄉人異口同聲。僉曰。是真孝子也。悲哉。悲哉。孝子諱鍾甲。字貫亭。幼讀書。穎悟而勤勉。爲文章。援筆立就。弗假思索。童

試不利。納貲爲太學生。光緒甲辰。詔停科舉。改立學校。懷邑小學。華路初啓。孝子實主其事。招生闢舍。昕夕辛勞。辛亥歲。孝子世父葆書先生晉升。復於秦家屯鎮。創設高初兩等小學。校舍落成。鄉人公推孝子爲校長。嚴定課程。嘗以昌黎業精於勤。荒於嬉。爲諸生勸。雖遇房星虛昴之辰。僅許休沐半日。諸生或怨其過嚴。不顧也。諸弟鍾喬等及長子錫震。均入校附讀。逾年。學生來歸者益衆。校舍至不能容。凡畢業諸生。應他校升學考試。成績輒列最優等。鄰邑諸校莫能及也。越四年。本邑教育所所長某君。以事去職。縣知事尹君禮聘繼任。益得發揮所蘊。振興學務。修舉廢墜。不遺餘力。天性孝友。熟誦祖考聲遠。先生耕禮堂。家訓期於身體力行。事禮部君。色養肫肫。先意承志。視於無形。聽於無聲。光緒辛丑。禮部君因事赴懷。馬驚車僨。遂傷其足。孝子晝夜侍疾。滌綸拭穢。不假手婢僕。年餘無倦容。母陳恭人四十後病瘵。臥牀褥者數載。時禮部君趨公。郎署國而忘家。家事悉聽葆書先生主持。而命孝子以家督之責。服勞而輔翼之。孝子拮据。況瘁。出則稽核紛瑣。若網在綱。入則侍膳問安。延醫嘗藥。凡所以曲慰親心者。無微不至。待諸弟以嚴正。雖羣從昆季。咸敬憚焉。偶有疾病。噢咻之如撫嬰兒。諸弟稍長。出

門。求。友。輒。以。親。直。諒。而。遠。便。倭。及。澹。成。甘。壞。之。義。殷。殷。勛。勉。弟。鍾。喬。與。子。錫。震。年。齒。相。同。共。硯。受。學。孝。子。並。撫。育。誨。迪。之。有。過。輒。責。錫。震。若。有。甘。脯。必。先。給。鍾。喬。而。後。錫。震。然。鍾。喬。或。怠。學。則。正。色。呵。之。苦。口。規。之。不。稍。寬。貸。鍾。喬。自。謂。今。日。之。得。以。成。立。皆。長。兄。力。也。禮。部。君。天。懷。冲。澹。晚。歲。尤。研。精。佛。典。家。政。悉。由。孝。子。與。鍾。喬。任。之。禮。部。君。逝。世。孝。子。哀。毀。過。甚。水。漿。不。入。口。觸。發。氣。促。舊。恙。臥。病。百。餘。日。至。四。月。四。日。靈。輶。啓。行。孝。子。椎。胸。大。痛。強。起。號。泣。旋。不。能。支。仆。地。者。再。次。日。遂。卒。越。三。日。隨。禮。部。君。祔。葬。焉。鍾。喬。具。事。略。乞。爲。銘。墓。之。文。余。何。忍。辭。夫。曲。禮。有。五。十。不。致。毀。之。文。又。有。不。勝。喪。之。戒。聖。人。制。禮。所。以。維。中。道。也。孝。子。已。年。逾。及。艾。而。至。性。過。人。如。此。竟。長。侍。厥。考。於。九。京。此。亦。足。以。風。薄。俗。矣。昔。方。望。溪。之。論。魏。孝。婦。也。謂。後。世。人。道。衰。薄。天。地。之。性。有。所。壅。遏。不。流。其。鬱。而。鍾。於。一。二。人。者。往。往。發。爲。絕。特。之。行。而。不。必。軌。於。中。道。然。用。以。矯。枉。扶。衰。則。固。不。可。得。而。議。也。讀。望。溪。先。生。此。言。足。以。定。孝。子。之。生。平。矣。孝。子。生。於。光。緒。四。年。戊。寅。二。月。十。一。日。卒。於。共。和。十。有。八。年。五。月。十。三。日。於。夏。歷。爲。己。巳。年。四。月。五。日。年。五。十。有。二。配。孟。氏。勤。慎。明。決。內。助。稱。賢。早。卒。繼。配。胡。氏。又。繼。胡。氏。均。前。卒。又。繼。配。王。氏。子。四。人。長。錫。震。前。卒。

孟氏出。次錫鵬。錫博。錫倫。均王氏出。女子子四人。長適馬。旣嫁卒。孟氏出。仲叔待字。均胡氏出。季許字潘。王氏出。至先世名諱事實。已具余所爲禮部君墓志中。不復贅述。爰爲銘曰。

烝烝純孝。高行邁倫。友于兄弟。得親順親。死猶孺慕。寧止終身。愧彼梟獍。式此鳳麟。永安窀穸。利其嗣人。

懷德趙錫荃壙誌銘

錫荃。懷德趙禮部迪唐之女孫。友松之第三女也。年十三。患痘瘍。舉家哭之慟。友松函述其事實云。荃女幼端重。不苟言笑。舉止皆如成人。愛讀書。有不解或不熟者。忘寢食以求之。必通曉乃已。塾師愛之。逾於他生。天性孝謹。仁厚不踐蟲蟻。家中諸昆季姊妹。均樂就之。無荃則衆不集。亦不歡也。偶與姊相爭。曰。我必訴於阿父。及余至。則又默默不言。與之新衣及玩具。輒愛惜保存。久仍完好如故。侍膳重闈。能得歡心。事繼母如所生。繼母亦深愛之。人不知其爲前母女也。荃女之卒也。爲共和十八年五月二十七日。於夏歷爲己巳年四月十九日。距禮部公棄養之辰。凡四閱月。距葬期僅旬日耳。卑幼

之。戚。不。敢。乞。文。銘。幽。惟。長。者。憫。焉。或。撰。哀。詞。以。傳。之。余。謂。昌。黎。集。有。女。壻。壻。銘。震。川。集。有。女。二。二。及。如。蘭。壻。志。女。壻。之。年。齒。與。錫。荃。相。等。歸。氏。二。殤。女。則。僅。逾。周。歲。耳。錫。荃。雖。稚。弱。然。固。女。而。有。士。君。子。之。行。應。於。古。銘。法。者。也。孝。友。之。門。尹。姑。之。選。不。幸。短。命。悲。夫。悲。夫。迺。爲。銘。曰。

蓀。芳。而。脆。蘭。馨。而。折。天。道。茫。茫。佛。云。不。可。說。魂。兮。歸。來。松。風。鳴。咽。佐。含。飴。於。九。原。信。孝。思。之。無。斂。

楊味雲雲在山房類稿序

同。社。錫。山。楊。君。味。雲。忠。孝。之。門。瑰。奇。之。彥。也。於。學。無。所。不。通。而。尤。究。心。經。世。之。業。三。十。年。來。迭。爲。秉。鈞。軸。者。所。倚。重。亦。曾。敷。歷。中。外。聲。施。爛。然。而。實。未。竟。其。用。蓋。其。蘊。蓄。者。深。有。如。江。河。之。渾。灝。非。涓。流。一。勺。所。能。盡。也。君。雅。不。欲。以。文。藝。自。見。而。倚。馬。萬。言。著。述。宏。富。儕。輩。咸。斂。手。推。服。庚。申。冬。間。燕。京。城。西。舊。居。遭。鬱。攸。之。厄。詩。文。俱。燼。比。歲。君。蟄。居。津。沽。不。問。世。事。校。錄。師。友。遺。著。十。數。種。付。之。剞。氏。名。曰。雲。在。山。房。叢。書。又。掇。拾。庚。申。燼。餘。著。述。得。十。五。種。曰。思。冲。齋。文。鈔。補。鈔。二。卷。曰。耶。潛。賸。稿。二。卷。曰。藏。園。幸。草。一。卷。曰。雲。蘊。

漫錄二卷。曰滄桑齋筆記四卷。曰貫華叢錄一卷。以及書札鉢吟楹聯詩話若干卷。總名曰雲在山房類稿。戊辰七月。余臥病燕京。又因傾跌傷足。君貽書饋藥。殷殷存問。辱以王深寧馬貴與一流人物相期許。謂宜善自珍攝。留此身以守先後也。又謂思沖齋詩鈔駢文鈔。及滄粟齋筆記。既有樊山閣公芷升諸君分撰弁言。而雲在山房類稿。簡端尙未有總序。序之莫如子宜。余惟君生顧端文高忠憲兩先生之舊鄉。端文倡修東林書院。偕忠憲諸君子講學其間。海內英賢。望風景附。端文嘗言。官輦轂志不在君父。官封疆志不在民生。居水邊林下。志不在世道。君子無取焉。故講習之餘。必究心時事。忠憲爲學。則一本濂洛以靜爲主。操履篤實粹然。一出於正。晚年爲閹黨所誣。陷懷石沈淵。流風遺烈。奮乎百世。當天啓甲子丁卯之交。狂猷彌天。郡縣所在。悉爲魏璫立祠。尼山俎豆。且將退避三舍。高顧諸先生。獨能力持正論。挫折奸鋒。凡閹人種種非義之爲。盡力以抗屹然。不可移易。縱令搢胸伏鑕。莫之能奪。此其定識定力。爲何如者。誠吾輩後生所宜景行而師事也。吾虞顧伯裕太僕大章。亦爲閹黨所誣。盡瘁授命。其弟仲恭先生大韶。以遺民著其風節。足以媲美錫山高顧兩先生。古稱立德立功立言爲

三。不。朽。余。謂。儒。者。但。當。致。力。於。德。德。既。修。矣。達。而。在。上。則。立。功。窮。而。在。下。則。立。言。素。位。而。行。無。入。而。不。自。得。焉。孔。子。曰。有。德。者。必。有。言。仁。者。必。有。勇。又。曰。德。之。不。脩。是。吾。憂。也。卽。是。此。意。吾。儕。生。丁。陽。九。當。以。守。先。待。後。自。任。俾。數。千。年。聖。賢。紹。述。之。學。不。滅。於。秦。燔。一。雪。中。國。無。人。近。代。無。儒。之。恥。此。則。迂。朽。之。身。所。願。與。君。共。相。策。勉。矢。諸。畢。生。而。無。數。百。世。俟。聖。而。不。惑。者。也。類。稿。中。雲。邁。漫。錄。體。似。張。文。端。聰。訓。齋。語。滄。粟。齋。筆。記。多。述。近。代。掌。故。又。與。薛。叔。耘。庸。庵。筆。記。相。似。所。言。均。有。關。於。世。道。人。心。非。以。夸。博。物。廣。異。聞。也。駒。陰。迅。邁。重。九。已。過。舊。都。蕭。條。寒。風。栗。冽。余。足。疾。未。愈。息。偃。在。牀。追。念。弁。言。之。諾。已。逾。兩。月。恐。知。已。疑。其。疏。懶。而。食。言。也。因。將。近。年。方。寸。所。鬱。結。者。拉。雜。書。之。卽。以。爲。序。共。和。紀。元。十。有。七。載。夏。正。戊。辰。季。秋。之。月。常。熟。孫。雄。師。鄭。氏。序。

族長兄謹丞先生六秩晉三壽序

南。通。族。長。兄。謹。丞。先。生。與。余。同。出。自。新。安。同。爲。始。祖。忠。貞。公。三。十。五。世。孫。年。相。若。也。輩。相。符。也。志。相。合。也。四。十。餘。年。以。前。同。肄。業。於。江。陰。南。菁。書。院。遊。定。海。黃。元。同。師。之。門。治。經。史。義。理。攷。據。之。學。兼。及。詞。章。余。材。質。駑。下。進。步。迂。緩。而。吾。兄。蹕。厲。風。發。孟。晉。迨。羣。大。

江。南。北。之。俊。彥。鮮。與。抗。顏。行。者。彼。時。講。舍。切。劘。僅。如。樊。遲。陳。亢。之。服。淵。騫。游。夏。而。已。初。未。嘗。叙。及。先。世。譜。系。也。往。歲。與。南。通。袁。君。性。之。同。膺。國。史。館。載。筆。之。聘。性。之。見。余。所。爲。先。府。君。事。略。諗。其。出。自。新。安。始。爲。介。紹。於。松。濤。先。生。暨。吾。長。兄。松。濤。爲。忠。貞。公。三。十三。世。孫。曾。輯。刊。南。通。孫。氏。宗。譜。哀。然。鉅。冊。吾。兄。爲。作。弁。言。詳。述。金。沙。孫。氏。與。通。城。孫。氏。合。譜。聯。載。之。始。末。余。受。而。讀。之。又。知。吾。兄。勗。建。孫。氏。私。立。小。學。校。爲。一。鄉。倡。爲。一。族。倡。冀。人。才。之。輩。出。正。學。之。昌。明。甚。盛。業。也。宗。譜。卷。十。載。楊。君。體。仁。所。爲。吾。兄。六。十。壽。序。始。知。吾。兄。生。於。同。治。六。年。丁。卯。二。月。十。四。日。夷。攷。古。來。名。儒。碩。彥。每。多。誕。降。於。丁。卯。之。年。東。漢。北。海。鄭。康。成。生。永。建。二。年。丁。卯。唐。李。西。平。晟。袁。公。頤。高。均。生。開。元。十。五。年。丁。卯。李。文。饒。德。裕。孔。至。之。敏。行。均。生。貞。元。三。年。丁。卯。宋。范。堯。夫。純。仁。呂。微。叔。大。防。均。生。天。聖。二。年。丁。卯。陳。少。陽。東。劉。季。高。岑。均。生。元。祐。二。年。丁。卯。元。明。以。來。魁。碩。尤。多。數。其。尤。者。如。湯。潛。庵。斌。葉。星。期。燮。楊。自。西。雍。建。林。同。人。侗。李。中。孚。顥。均。生。萬。歷。二。年。丁。卯。金。壽。門。農。生。康熙。二。十六。年。丁。卯。張。仲。雅。雲。璈。趙。味。辛。懷。玉。均。生。乾。隆。十。二。年。丁。卯。漢。書。云。卯。爲。春。門。萬。物。出。焉。參。同。契。云。二。月。榆。落。魁。臨。於。卯。又。云。人。命。在。卯。解。之。者。曰。日。出。於。卯。而。萬。物。

皆仰之以生。蓋萬物皆備太陽之氣。以立命也。然則古今不世出之才。應運而生。皆以爲生民立命。其多誕降於丁卯之年。宜哉。范書康成傳云。孫小同。以丁卯日生。與玄生歲同故名。祖孫同軌。前史傳爲美談。吾兄肄業南菁。專治毛詩三禮。曾於凌次仲禮經釋例有所補正。其學已入高密鄭君之室。通籍後。服官西蜀。出生平所學。以撫綏氓庶。所之民愛。所去民思。歷權劇邑。神君慈父。頌聲若一。假令得君行政。發抒蘊蓄。西平文饒。堯夫。微叔之偉業。何多讓焉。兄於理學。致力至深。夙以扶持名教爲己任。宦蜀時。見綱紀凌夷。戎莽潛伏。歌北風雨雪之詩。憂禍亂之將至。見幾而作。引疾挂冠。則又於潛庵中。孚之學術。體驗有得焉。晚歲經營實業。瘁心力於墾植之事。冀其孚甲冒莠。大暢生機。以救百族之瘡痍。登斯民於仁壽。仍是古聖賢爲天地立心。爲生民立命之懷抱。而恥以封殖居積自雄。何其仁也。悲憫之餘。間以詩歌酬唱。及校讐彝鼎碑版自遣。而於殷虛書契。尤所篤嗜。抱殘守缺。徵文考獻之盛心。與康成之刪裁繁蕪。刊改漏失。心理相同。蓋其隱居求志。則如唐之孔至之。有清之金壽門。至其味道工文。枕經薛史。則又與清初之葉星期。清中葉之張仲雅。趙味辛。諸子相頡頏焉。仲春本爲建卯之月。吾

兄誕生之年月。皆爲建卯。生生不已。萬物皆春。瑞氣彌綸。宜登耄耄。史載鄭康成年七十四。范堯夫七十五。劉季高八十一。楊自西金壽門均七十八。李中孚七十九。林同人八十八。張仲雅八十三。吾兄延齡。曼壽椿祿八千。且將遠駕諸公而上之。左券之操。可預決也。今年吾兄六十有三。三爲陽數。亦盈數也。凡十百千萬之數。皆可以三綜括之。汪容甫釋三九篇。曾述其義。比歲以來。余與吾兄函札往來。無間旬月。歲時困乏。頻荷存問。分金贈縞之使。不絕於途。天南地北。蹤跡雖睽。而精神道義之契合。金石爲開。非山川兵戈所能間阻。世運縱極。泯琴而吾連枝同氣。怡怡之樂。當盟諸百年。而不渝質諸古賢而相喻。此殆吾始祖忠貞公在天之靈默爲佑啓。非偶然也。行葦之首章曰。戚戚兄弟。莫遠具邇。其卒章曰。黃耇黽背。以引以翼。壽考維祺。以介景福。蓋不啻爲吾兄詠也。抑更有說焉。吾兩人於四十餘年以前。固同治毛詩三禮。而以私淑康成爲職志者也。康成生於東漢永建二年丁卯。試屈指以計。迄於有清同治六年丁卯。爲第三十丁卯。迨至共和紀元十六年丁卯。則爲第三十一丁卯。蓋已一千八百年矣。東瀛耆儒有研究漢學者。曾於是年康成生日。設位於西京大學。具籩豆。潔蘋藻。而祭秀眉明目。

幅巾布衣之鉅儒。先期函來。徵余東游。主持祀事。余因病未能往。曾賦詩以紀之。吾邑徐虹隱編修兆璋。張雙南大令蘭思。與余均爲總角至契。二君均生於同治丁卯。又均能讀高密書者。崇仁黃申甫太守維翰。亦生於同治丁卯。太守經術湛深。文章淵懿。與余同客宣南。唱酬廿載。嚶鳴無間。不知吾兄與三君曾相識否。又不知吾兄之友有同生於丁卯如余與三君之相契者否。前哲之英靈未沫。禮堂之寫定有期。述往聖以埃後賢。拒誠行而息邪。說是皆吾輩所宜奮勉而尤生於丁卯諸君所未遑多讓者也。昨得吾兄書。方以金沙餘西諸鄉伏莽徧野。禍機潛蘖。引爲深憂。余因作此文以慰吾兄。且以祝期頤之上壽焉。是爲序。共和十八年己巳孟夏之月。族弟雄頓首拜撰。

清河欒氏家訓序

家者身之積也。國者家之積也。大學言身修而後家齊。家齊而後國治。又云。君子不出家而成教於國。孝者所以事君也。弟者所以事長也。慈者所以使衆也。孝經云。要君者無上。非聖人者無法。非孝者無親。此大亂之道也。吾國古聖賢之垂訓。世人多目爲老生常談。然惠迪則吉。從逆則凶。治亂之機。歷數千年不爽毫髮。近世新學家多剝破。

壞家族之說。其尤謬者。或竟以非聖非孝爲能。禍變之來。未知所屆。雄恠焉憂之。嘗於拙著讀經救國論中。發其微旨。今讀雨田先生所輯之樂氏家訓若干卷。而益歎家齊而後國治。古聖之言不我欺也。雨田先生好學深思。長於軍事。言行注重道德。暇日以手纂家訓一冊見示。首言立志知恥。次言父慈子孝。兄友弟恭。夫義婦順。次言處世交友之方。君禮臣忠之旨。而以總說附錄終焉。昔顏之推氏有家訓。司馬溫公有家範。當時化之。後世誦之。道咸間。湘鄉曹文正公。序河間紀氏嘉言。謂世風日漓。無所歆而爲善。無所畏而不爲。不善者已不可得。苟有術焉。可以驅民於淳樸。而稍遏其無等之欲。豈非士大夫有世教之責者事哉。雄嘗讀其言而悲之。今之從政者。取于取萬。噬民膏血而不恤。惟日縱恣於無等之欲。家教既蕩。然不修其子弟。甘蹈非彝。陷溺於無上無法。無親之邪說。有爲湘鄉曾氏所夢想不到者。先生此書樸實精純。可與顏氏家訓溫公家範二書相鼎峙。日月出而燭火無光。正氣存而邪說自熄。其功固不在禹下也。先生論君禮臣忠。謂治國職責所在。對於我所統率者。我卽君也。對於統率我者。我卽臣也。一人因地位之所在。當各盡其道。非僅元首一人可以稱君。百官對於元首一人可

以稱臣也。雄謂此說實根於古訓。許叔重說文解字云。君尊也。從尹。發號故從口。臣。象屈服之形。是凡出令者皆有君義。奉令者皆有臣義。漢書王陵傳。陳平對陵曰。面折廷爭。臣不如君。全社稷。安劉氏後。君亦不如臣。可以見古人之稱君臣。不限於百官。對於元首也。近人每謂六經多言君臣不合共和政體。不知者震其持之有故。羣焉附和之。其知者亦互相隱忍。而不敢顯斥其說之謬誤。吾友胡君玉縉。嘗於讀經救國論序中。暢發此旨。今得雨田先生之說。益可證吾道之不孤矣。彼一孔之儒。知二五而不知一十者。庶幾知所返哉。

詩史閣圖記

余於光緒庚子以後。客遊津沽。經嚴範孫前輩之推挽。襄理北洋學務。旋拜監督北洋客籍學堂之命。督課餘閒。有道咸同光四朝詩史之輯。蓋誦詩可聞國政。述史可資鑑戒。今合詩與史爲一事。庶幾學古有獲取。則不遠冀復承平雅頌之盛。並馮民瘼板蕩之思而已。其時樞府疆吏。方以鍊兵興學革故鼎新。相標榜而核其實際。則驕奢淫佚。寵賂滋章。奸民遊士。蘖芽其間。危機亂萌。潛伏暗長。然金甌猶未缺也。宣統元年己酉。

南皮張文襄公創辦京師分科大學。奏派余爲文科大學監督。文襄自公退食。論學譚藝。善鑒忘倦。瀏覽四朝詩史原稿。商榷選事。訂正良多。惜是歲季秋。盡瘁溘逝。人亡國瘁。薄海同悲。親貴攬權。益無顧忌。軍諮府海陸軍所屬將校。隱懷異志。伺隙而動。余於辛亥六月。中央教育會慨乎言之。同人駭以爲狂。當局憐不一省。曾不數月。大難發清社屋矣。四朝詩史。初以鋼筆版印行。未爲定本。宣統己酉。始刊於都門。甲集乙集各二十卷。至辛亥仲冬成書。曾自題七律二首。有金鑑千秋懷聖相。陸沈一月陷神州之句。二首末韻用憂吁二字。海內和者七十餘家。彙刊一冊。名曰憂吁集。以爲紀念。辛亥以前。余不甚爲詩。即有所作。亦不存稿。壬子以後。感傷時事。輒寄之篇什。時局愈變而愈幻。則吾詩亦日出而不窮。戊辰七月。余以六十有三。自壽詩寄範孫前輩。前輩依韻和之。其答函中有云。時事千變萬化。似故爲詩史閣添錦囊材料者。變愈奇而詩亦愈工。其實余詩何能工。不過述民困以籲天。悲兵禍之弗戢。竊附於言者無罪聞者足戒之義。而詩之工拙。非所計也。十八年來。已有五千餘首。亦云多矣。世人遂以杜陵詩史目之。余亦以詩史閣主人自居。不知者或以爲好名而夸。其知者但憫其行邁靡靡中心。

如醉耳。詩史閣已有六圖。爲林畏廬姜穎生賀履之路金坡朱仲璋胡佩衡諸君所繪。林姜二君均已作古人。姜圖極精。繪於巨幅之紙。簞裝潢成卷。題詠頗多。惜於十年前乞朱艾卿前輩題詩。前輩久不見還。後聞於移居時。爲祛篋者盜去。未知何日能珠還合浦也。畏廬一圖。繪於辛亥以前。略師耕煙虞山圖遺意。以寄鄉思。蓋彼時猶望宦成還山。依辛峯石屋之勝。建一高閣。吟嘯其中。以娛暮景。履之穎生諸君繪圖。均在壬子以後。圖中山水風景。初無一定。悉由畫師興到爲之。蓋家國滄桑。舟流靡屆。吾輩迂儒他日。且不知死所。又安有菟裘娛老之計。不過借此圖卷。以寄夢裏家山。畫中樓閣之感。而已。南通族叔祖松濤先生。有族譜圖詠之輯。又乞陳君效韓爲繪詩史閣第七圖。效韓精於繪事。與今楚中畫師蕭屋泉齊名。蓋屋泉客金陵時。效韓虛懷請益。遂有神悟。曩者屋泉嘗畫燕京。余之及門弟子合肥賈君遜。原名德恩。後改名遜。字耽虛。從之學畫。時有文酒之讌。歡若平生。屋泉固曾允余爲畫詩史閣圖者。余因屋泉名高事冗。未敢迫促。今聞已倦遊南歸。不審能否踐諾。然得效韓墨妙。固與屋泉無二也。松濤翁馳函舊都。謂圖必有記。詩史閣主人之名。不特通國皆知。即東瀛士大夫。亦中心藏焉。以得主人

寸牋片什爲榮。彼邦所輯東華月刊。亦有題四朝詩史及詩史閣圖者。而主人二十年來。尙未有圖記之作。今宗譜圖詠。即以效韓所繪之圖。列入補作圖記。不可緩也。爰略述事實。以著於篇。己巳孟秋月朔先立秋三日。常熟孫雄記。

于烈婦潔脩女士徵題事略書後

烈婦姓劉氏。名淑齋。字潔脩。天津大城人。年二十九。適于開來爲繼室。開來爲前黑龍江省長振甫先生長子。體素羸弱。結褵一載。驟中寒疾。氏躬治湯藥。侍疾維謹。開來病歿。哀痛不食者累日。然定省舅姑。則斂其戚容。未改常度。先是開來治墾殖。爲村農購槍自衛。售者欺之。遂成私累。彌留時謂氏曰。爲我求丁丈聘三。必能了此。勿貽老父憂。使我地下不安也。聘三爲氏中表長親。氏於治殯後。親往涕泣懇請。規畫旬日。夙累一清。且以餘金緘付前室子女爲遺念。旋於己巳十一月三十日。中夜仰藥以殉。開來未死前數小時。草遺書三通。一上舅姑。一授子女。一則啓謝丁君書中。或稱名。或稱字。秩然有序。其神明湛然。臨命不亂。如此。錢塘鍾慈庵同年廣生爲撰事略。龍江省府主席萬公福麟。偕僚友七十餘人。聯名撰徵詩文啓。冀海內士大夫闡揚節烈。砥澆俗而發

幽光。同時有韓旅長光第。字斗瞻。吉林雙城人。於己巳冬十月。駐札蘭諾爾。以孤軍千人。與暴俄赤軍數萬奮戰。負傷益進。視死如歸。所部無一生降者。其愛國之誠。赴義之勇。天下高之。萬公徵詩文啓。以韓將軍與于烈婦相提並論。且於近世肇軍權者。習以叛易爲常。張女權者。反以貞一爲辱。深致憤慨。萬公洵有心人哉。吾嘗讀大易文言傳云。地道妻道。臣道皆無成。而代有終。可見家國之廢興。有一定不易之理。婦人必守從一之義。而後家道可昌。人臣必奉在三之節。而後國基可鞏。古今中外。治有萬端。而理無一致。不可得與民變革者也。六經所載如衛共姜。紀叔姬。均爲刪詩修史之聖人。所褒許。方望溪先生謂君臣夫婦之義。至孔子而論定。至宋儒而後大明。程子論娶失節之婦。以爲己亦失節。而餓死事小。失節事大之言。雖村姬市嫗。皆耳熟能詳。奉以爲天經地義。自有宋以迄有清。千年之間。貞孝節烈。史不絕書。十室之邑。必有旌揚貞節之綽楔。表宅里以式人倫。風俗醇厚。人知廉恥。以自媒苟合爲羞。教化之隆。非倖致也。蓋國者家之積也。苟能家知所尊。人知所親。則亂臣賊子。不容於世。天下安有不治者乎。易稱父父子子。夫夫婦婦。而家道正。正家而天下定。此之謂也。慈庵論贊有云。當吾世

閱三十年而一變。又二十年至於今。人紀道喪。所重者已在彼不在此。其言至爲悲切。吾謂世逆縱極。泯然日月。既出燭火自熄。剝極而復。易理昭然。他日盪穢滌瑕。化行俗美。仍當以孔經及宋儒之言爲根據。圖治之本。仍在此不在彼也。如于烈婦之死志。早決。清明在躬。洵有足以矜式末俗者。余旣徇慈庵之請。爲作五古一首。更以未盡之意著於此篇。以答慈庵。且以爲振甫先生慰焉。共和紀元十有九載。歲在庚午仲夏之月。常熟孫雄師鄭謹跋。

無錫唐氏二孝女合傳 民國十九年庚午仲夏作

唐孝女瓊。江蘇無錫人。清故長洲縣教諭桐卿先生諱錫晉第四女也。桐卿先生盡瘁義賑。仁聲徧天下。型家作則一秉禮法。瓊幼嫻姆教。婉婉聽從。純謹敏慧。經籍咸成誦。事父母孝。處兄弟姊妹間。推梨讓棗。利而不爭。父秉鐸漣水。秋來輒患末疾。手足拘攣。坐臥俱艱。孝女扶持抑搔。躬侍湯藥。廢食忘寢。衣不解帶者百有餘日。迨父病稍痊。已積勞致疾。咯血數日不止。光緒二十二年丙申四月十三日卒。年一十有八。

唐孝女珉。桐卿先生之第八女。與姊瓊同以孝稱。幼嗜詩書。工鍼黹。事親先意承志。能

得歡心。宗族鄉黨咸以爲賢。乙巳仲春。母孫太君病咳。珉日侍湯藥。左右扶持無稍懈。至母病篤。禱天願以身代。私割肱肉。燂湯和藥以進。母疾遽瘳。不竟越三日疾復作而殂。女哀痛過甚。暈絕復蘇者再。遂病寒熱。猶復苦塊。殯宮朝夕慟哭。百日竟以毀卒。時光緒三十二年丙午二月十三日也。年二十。桐卿先生有哭瓊女珉女詩七古各一首。沈痛不忍卒讀。共和紀元六載。二孝女伯兄宗愈與其仲弟宗郭追懷同氣。孝行純篤。謂吾兄姊弟妹均愧弗及。具呈內務部請如例褒揚。元首黎公題頒孝闕流芳匾額。復於錫山桐卿先生專祠之右別構二孝女祠。歲時祔祀焉。

舊史氏孫雄曰。無錫唐氏系出荆川先生。世以忠孝傳家。問苑先生諱文源。桐卿先生之尊人也。咸豐庚申之變。舉家殉難。獨遺桐卿先生出走。以縣宗祀明德。之後生有自來。非偶然也。問苑先生暨張太君遺訓均於奉先思孝及孝事舅姑三致意焉。二孝女濡染家學。天性篤厚。本親親敬長之良能。符舍生取義之古訓。豈爲弋身後之榮名計哉。完吾肫誠之天性而已。褒揚祔祀。迺後死者扶植人紀。闡發幽光。應盡之職責。於二孝女初無加損焉。孝女瓊。彌留之夕。鄰里聞空中隱隱有仙樂聲。桐卿先生詩中亦謂

己卯臘月誕生之夕。咳名未定。夢神人以許飛瓊三字示之。夫神仙縹渺之說。儒者不道。而英靈誕降。不昧先機。亦或爲事之所有。附著於篇。以廣異聞。可也。宗愈已於己巳秋間病逝。宗郭乞余爲二孝女補傳。以備家乘之采。章志貞教。固所願也。爰詮次事實如右。嗟乎。二十餘年以來。非儒非孝之謬論。已如羹如沸矣。他日儻有續編孝史。以挽回劫運者。當必有取乎此。

金母唐太君節孝錄序

太君江蘇無錫人。姓唐氏。名琬。爲桐卿先生諱錫晉之女。桐卿先生以盡瘁義賑名海內。任賑務者三十有七年。被澤之地。凡爲行省者八。爲府州縣五十有一。夫人樂安太君以巾幗具痾瘵之志。相夫教子。濟衆載福。古之賢媛莫能過焉。生有賢子二。長曰宗慤。字慕潮。次曰宗郭。字慕汾。並有聲於時。有賢女八。太君其次也。四女曰瓊。八女曰珉。均以孝行旌揚。余別有傳。太君幼聰慧。讀書過目成誦。性純孝。隨侍桐卿先生安東教諭任所。服勞奉養。曲體親心。癸巳歲七月。父病篤。焚香禱天。割股肉和藥以進。翌日疾瘳。乙巳歲某月。母病咳。侍奉湯藥。衣不解帶者數月。庚子丙午。陝湘迭遭水旱鉅災。質

簪珥以助賑。年二十五。適江蘇補用同知山陰金君秉台。時金君方任安東縣署幕職。黽勉同心。規過輔德。時以尙節儉。屏嗜好。箴雞鳴戒旦。戚黨賢之。結縭三載。遽喪所天。哀痛絕粒。誓以身殉。經桐卿先生樂安太君委曲曉譬。始以立嗣撫孤爲重。守節逾二十年。四十七歲而卒。慕潮昆李臚列事實。上內務部。呈請元首徐公世昌特給挽額。暨褒額褒詞。並准予旌表如儀。事在民國十年十一月冬春之交。慕潮既爲營葬建祠。并爲啓徵文。得傳贊若干首。哀爲一集。名曰節孝錄。將刊布行世。會病卒不起。慕汾哀其姊堅苦卓絕之行。又痛其兄未竟之志。校付手民。徵序於余。余嘗讀周易上經首乾坤下經首咸恆。序卦傳釋之曰。夫婦之道。不可以不久也。故受之以恆。恆者久也。下經兌卦與渙節中孚三卦相連。兌爲少女。兌者說也。歸妹之彖辭曰。說以動。所歸妹也。兌而繼以渙。渙而繼以節。謂夫婦不能無離散之時。貴以苦節維繫之。苦節既久。自成甘節矣。序卦傳曰。節而信之。故受之以中孚。異室同穴。信如皦日。風詩之旨。與易相通。是故夫婦之道。必以生死不渝爲歸。禮云一與之齊。終身不改。即生死不渝之義。生死不渝久之至也。即孚之至也。中庸云。君子之道。造端乎夫婦。及其至也。察乎天地。卽易所

謂中孚以利貞。迺應乎天也。程伊川易傳云。天地之道。孚貞而已。信哉斯言。豈惟夫婦。凡關於倫紀之事。未有不以持久。孚貞爲貴者也。近者政府南遷。傳聞重定。褒揚條例。將貞女烈婦節婦各項。變更或刪除之。其意固欲解束縛而杜矯激。然因噎廢食。遂致。焚衆聽而數。彝倫其流弊。有不忍言者。即如振災一事。時流亦以非根本之治。少之忍。使陝豫諸省數百萬顛連無告之窮民。轉於溝壑。坐視而不之救。假令桐卿先生今日猶存。其感愴又當何如耶。如太君之賢明純孝。苦節仁心。求之近世閨媛。實難其選。而慕潮昆季。誼篤友于。旣營葬吳縣之橫塘。立坊以表懿范。更建祠無錫。祔祀桐卿先生。專祠之左。春秋報享。以妥靈爽。其風義亦有足多者。余故樂得而序之。且使有心維持世教之當軸得吾說而存之。或可使周孔之教。勿淪榛莽。乎然世局之幻。愈出愈奇。蓋有非迂儒所能逆覩者矣。庚午季夏之月。常熟孫雄師鄭氏序。

銅山張烈婦傳

烈婦王氏。江蘇蕭縣人。父聖濱。早卒。母葛太君。守節撫女三。婦其仲也。年二十五。適銅山張彬慈。張爲銅山望族。代有聞人。彬慈幼承祖父訓迪。十二歲五經爾雅皆成誦。尤

熟左氏春秋。敦行勵學。勇猛精進。畢業江蘇省立中學校。旋入北京交通大學。試輒冠其曹。戊辰年二十三。烈婦來歸。好合黽勉。翁姑族黨咸稱其賢。夫婦均秉性剛果。平居議論。沈澹無間。彬慈夙患項疽。旋止旋作。己巳冬病劇。庚午夏曆正月十一日卒。烈婦決以身殉。然蘊涵不露。舉止陽陽。如平常。一夕忽仰藥死。家人環救。已無及。去彬華之逝。僅四十有七日。實爲俗例終七前二日。家祭之期。蓋於臨命前固已預定。良辰信可謂從容就義者矣。彬慈之尊人循讓先生。哭之慟。其世父勺圃先生與余同客舊京。爲文字交。以所撰烈婦墓表示余。乞爲題詞。勺圃之言曰。有婦之烈。而彬慈亦以不朽。獨吾季奚堪此哉。其語絕痛。余旣爲小詩以闡幽光。又欽烈婦之信義。明決足以維人紀。而風澆俗也。爰詮次事實而爲之傳。

舊史氏孫雄曰。周易上經冠以乾坤。而緯之以剝與无妄。下經冠以咸恒。而緯之以節與中孚。誠以夫婦之道。貴乎生死不渝。不幸中道分離。剝牀茹痛。爲之婦者。必以眞實无妄之心。守同穴。皦日之信。臨大節而不可奪也。婦之於夫。猶臣之於君。孔子文言傳云。地道妻道。臣道皆無成而代有終。此固不可得與民變革者也。徐州萬年少閭。古

二遺民之風。義千秋矜式。二百年來。都人士女。聰聽。彜訓。流風未艾。今日。蜩蟬沸。澆俗固有不可得而移易者。異時。彜倫再造。將於此乎。肇端所關。豈細故哉。

論婚禮必由媒介及同姓不可爲婚

禮記曲禮篇云。男女非有行媒。不相知名。鄭氏康成注云。男女有媒往來傳婚姻之言。乃相知姓名。重別有禮。乃相纏固。近儒方氏懋釋之云。先王立媒氏以通內外。故謂之行媒。行者往來有所通之謂也。非是而相知名。則爲褻矣。孟子云。不待父母之命。媒妁之言。鑽穴隙相窺。踰牆相從。則父母國人皆賤之。其垂訓之嚴切如此。今人適以自由戀愛爲婚姻之原則。通都大邑之學校。又弛男女同學之禁。青年男女。不以自炫自媒爲醜行。甚矣其惑也。春秋經桓公三年。公會齊侯於贏。左氏傳云。成昏於齊也。杜氏預注云。公不由媒介。自與齊侯會而成昏。非禮也。然則最先發明自由戀愛。不由媒介而成昏者。宜莫如魯桓公矣。其後竟爲文姜所弑。僅歸獄於公子彭生。長貽千秋閭史之恥。殷鑒不遠。可爲寒心。曲禮又云。娶妻不娶同姓。故曲禮曰。買妾不知其姓。則卜之。鄭氏康成云。爲其近禽獸也。朱氏申云。娶同姓。是無別也。方氏懋云。昭公之娶於吳。是失

娶妻之禮矣。晉侯之有四姬。是失卜妾之禮矣。陳司敗鄭子產所以譏之也。今人乃沾染歐西風俗。不以遠族同姓互相結婚爲非。是乃周禮所謂鳥獸行。實爲滅國之徵。左氏傳云。昭夫人孟子卒。死不赴。故不稱夫子。不反哭。故不言葬。小君禮記雜記篇云。夫。人之不命於天子。自魯昭公始也。陳司敗知禮之間。載於魯論第七篇。孔子引爲己過。其隱痛深矣。其後昭公爲三桓所逐。出奔於齊。且不得正首邱焉。潰倫亂宗。不有人禍。必有天刑。吁。可畏哉。禮記經解篇云。婚姻之禮廢。則夫婦之道苦。而淫僻之罪多。聖經之言。非欺我也。今人方以開放藉口。迺不惜廢婚禮。以倡淫風。余故引經訓以垂鑒戒。冀以挽澆漓之末俗。存人道於幾希。明知一傳衆咻。聽者藐藐。姑盡吾心焉耳。

孫氏宗譜圖詠序

吾樂安孫氏子姓。蕃衍皆食新安始祖忠貞公之賜。江左則有南通無錫常熟。遠至於雲南之曲靖源遠流長。絲聯繩貫。萍散復聚。葛藟永綏。皆吾忠貞公之靈實佑相之。南通族叔祖松廬老人纂輯宗譜既竣。又有孫氏宗譜圖詠之輯。以忠貞公朝天待漏圖冠首。仁庵公鯨吹圖次焉。是爲第一第二卷。其第三卷爲老人之松廬校譜圖。第四卷

爲雄之詩史閣及西轅校經二圖。第五卷爲謹丞伯兄之金沙孫氏私立學校圖。而以各譜序附錄於後。爲第六卷。老人旣自爲序。誌其始末。復命雄爲弁言。雄於前年曾爲南通宗譜後序。備述鄙懷。業經錄入此編卷六。凡後序所已言者。無須複述。以免詞費。竊謂萬物本乎天。人本乎祖。經訓昭示。懸日月而不刊。唐書有世系表。又別有元和姓纂。廬陵歐陽氏眉山蘇氏震川歸氏。皆有族譜之作。誠以水有源。木有本。幸爲神明之裔。胄不可不報本而返始也。然所貴乎世族舊家者。非謂以高門列戟。滿牀羅笏。炫耀其遙遙之華。胃赫赫之宗支也。要貴乎代有聞人。合於立德立功立言三不朽之旨。以續祖宗之宏業。而垂休問於無窮也。功業之成否。人事居其半。天命亦居其半。若夫立德立言。原本忠孝。仰跂聖賢。則凡爲人子孫者。皆宜孜孜奮勉。不得以天澤易位。陵谷變遷。遂甘心數典而忘祖也。漢世若武梁祠魯靈光殿。並圖繪古先哲遺蹟。實爲圖畫之最古者。唐代南薰殿畫像。爲世寶貴。厥後洛陽耆英。悉有圖畫。流播藝林。松廬老人宗譜圖詠之輯。意至深厚。而雄之詩史閣西轅校經二圖。迺得附此編以傳永永。今執筆爲弁言。實有不勝其媿慙者。然守先待後。日邁月征。冀挽詩亡迹熄之衰。徐收經正。

民興之效。則固私衷所不敢不勉。小弁之詩云。夙興夜寐。無忝爾所生。竊願終身誦之。矣。抑雄更有進焉。古人著書。如容齋隨筆。數續而未已。老人他年。倘欲賡續斯編。雄願更以數圖進。請畢其說。先本生高高祖潞安太守訥夫公。歷官汴晉蜀三省。均著循聲。乾隆戊申之歲。進討巴勒布。總理軍需局。從將軍出打箭爐。抵第哩。噶古軍營。已酉春。間聞母邵太恭人訃。請奔喪不許。奏留軍營。哀毀勞瘁以卒。事載常昭合志耆舊傳。太守公有佛雲石。爲從征廊爾喀所得。乾隆已酉。與忠骨俱歸。先高祖吉士公天真閣集中。有長歌紀其事。序中述及太守公臨終語。從者勿棄我石。留以示我子孫。故歸骨二萬里一棺外。惟此石。僅存高一尺六寸。寬處九寸。有奇。中空旁小穴三。曰佛雲者。取形似識所從得也。咸豐庚申。石爲兵火所燼。雄曾乞林琴南孝廉紆。李梅庵方伯同年瑞清。補作佛雲石圖各一幀。徵求朋舊題詞。太守公又有雪城轉餉圖。法梧門祭酒式善。曾題五古一首。詩載存素堂集卷二十二。有云。峪岬雪城路。上下絕欹側。輾轉踏寒冰。人馬幾顛蹶。又云。庭護忽告瘁。薨喪竟無術。哀哉孝子心。一慟遂不測。今日讀之。猶爲嗚咽流涕。惜此圖久經遺失矣。他日尙擬乞名畫師補繪之。以示子孫而紀先德焉。曲

靖少元伯兄之先人。平越太守公諱武成。明萬歷庚子應天鄉試舉人。仕至平越府知府。流寇陷平越。闔家殉難。惟幼子思賢。由家人孫興。襁負亡命。以存一線之祀。蓋自思賢公占籍曲靖。九傳而至少元伯兄。伯兄前年客北京時。乞畢節路金坡朝鑾。繪保孤存祀圖。雄爲作記。刊入壘簾酬唱集中。天津嚴範孫侍郎修。及滇中耆宿趙樾村陳小圃王采臣諸公。均有題詠。異時松廬老人倘有續刊宗譜圖詠之舉。當以保孤存祀圖。及雪城轉餉圖。佛雲石圖列入。蓋平越太守公與潞安太守公忠義之氣。仁孝之德。先後同符。實與忠貞公仁庵公默相契合。無愧舊德之名氏。均爲我新安後裔所宜景行表章。吾知松廬老人必深許而預諾之也。爰詳述之以爲弁言。時共相紀元十有八年歲在己巳夏正孟冬之月。樂安七十四世新安三十五世遷虞九世孫雄拜序。

趙迺唐師竹齋叢著序

迺唐禮部逝世已兩易寒暑矣。友松秉承遺訓。篤念先人舊交。時時貽書存問。請業請益。孜孜不倦。案頭積函寸許。余於暇時檢閱。喜其循循然中規中矩。不爲放言高論。書法尤酷肖迺翁一門。義獻媲美古賢。不能不歎趙氏之有子也。禮部晚年多病。與余通

函。草稿既具。多由友松代繕。友松於繕畢。輒潛自錄稿珍藏。其他詩文亦如之。偶爲禮部所見。輒謂平生所作。愜心者鮮。汝等雖錄副備閱。他日勿輕以問世。蓋禮部文章風節冠絕等倫。而虛懷若谷。不自滿。假故以師竹名其齋。曩者甲子之歲。余爲編定師竹齋吟草甲集三卷。作序一篇。代爲付梓。禮部之意亦終歆然。不自足。謂吾詩功力未深。不足以傳世行遠也。庚午閏六月。友松馳函北平。謂先公詩集已於去歲編次若干卷。先以真筆版付印。今夏又檢錄遺稿。得雜文尺牘若干首。略加詮次。付之石印。以文體不一。謹顏曰師竹齋叢著。因寄凡例七則。跋一首。就正於余。凡例中謂尺牘數十通。以寄余者爲多。故別爲一卷。跋語有云。鍾喬今日之爲。非敢有背遺訓。竊有管見。以爲果如先公所言。則韓柳之外無文章。李杜之外無篇什矣。且茲編之付印。非以問世也。不過供不肖兄弟數人。自相觀摩。每一展讀。則先公之聲欸如聞。手澤如見。或可紓孺慕之私忱。檢行爲之放任乎。善哉。友松之言。乃不忍死其親之意。與中庸所謂繼志述事。事亡如事存。若合符節也。禮部謙抑爲懷。不欲以著述問世。然生平規行矩步。言行無不相顧者。與人忠而執事敬。卽函牘雜著。下筆無不矜慎。絕無屋漏懷慚。不可告人之

事自無秘藏之必要。故友松此舉。與禮部之遺訓。迹似不相合。而意則實相成。猶之武王周公伐暴。救民顯庸。創制後世。稱爲聖君賢相。初無損於文王三分服事之至德也。噫嘻。周公作無逸。已致慨於少年。諺誕之風。竟有謂昔之人無聞知者。今則世風日降。青衿佻達。蔑棄老成。有詢以先人遺集。曾否校刊者。彼則悍然答云。此等腐化著述。早宜付之一炬。其人今方服務新都。頗負時譽。吾不忍道其姓氏。以污吾不律。且傷厥考心也。孔孟六經之精義。萬世不可磨滅者也。而今之學校。則土芥視之矣。近者閱牆構兵。竟以曲阜林廟爲喋血之場。彈雨槍林。魂飛肉薄。杏壇檜柏。悉被摧殘。宣聖有知。應以軍旅未學。爲深悔。禮部生前受孔子戒。寅清夙夜。供職容臺。假令親見今日之泯。其感愴又當何如也。庚午閏六月先立秋三日。常熟孫雄師鄭氏序。

舊京文存卷三

常熟孫 雄原名同康師鄭

焚膏補讀圖記

南通顧庸公先生與族叔祖松濤翁爲道義交申以昆季之約松濤翁生於光緒丙子今年五十有五庸公生於光緒乙亥松濤翁以兄事之兩人不特年齒相若性情相契卽其虛衷好學忘食忘寢不知老之將至亦復相同松濤翁盡力譜事二十餘年旁搜博採口沫手胝孜孜不倦宗譜旣成又纂輯圖詠七卷已於今春印行又偕無錫族人志岳翁同仁分修統譜蒐討罔懈其勤如此庸公先生同時亦曾纂輯顧氏宗譜成書之期略後集中題松廬校譜圖詩有云今日齒雁行垂老弟昆似又云歲事間一秋先後略同揆私乘兩家光將以貽百祀皆紀實也已巳孟陬庸公年五十有五製有焚膏補讀圖介松濤翁徵予題詩其自述緣起謂兒時讀書無幾弱冠卽爲童子師爲人而荒於自課壯年奔走衣食亦未能探討載籍擬自今以往懷昔賢夜爲日餘之說焚膏繼晷償始願之所不及並倩畫師繪圖張之座右又自題七律四首以自儆惕噫當此

舉世不說學之時。庸公獨欲皓首窮經。效董生之下帷達摩之面壁。冀以洗不殖荒落之羞。洵可謂篤志於古不隨世俗酸鹹之嗜好者矣。夫吾國孔孟之經訓。馬班之史程朱之書。李杜韓歐之詩文。皆忠臣孝子。悌弟貞媛。節婦至性之所固結。其光耀如日星。其淳蓄如江海。由此則治不由此則亂。凡爲儒者。皆宜終身誦之。固非今日詭奇乖謬之學說所得而代興變革者也。十年前嘗與我友桐城姚叔節言之。拙著讀經救國論亦多採用叔節之說。叔節且爲作弁言於吾國經籍之益人神智三致意焉。昔莊生載輪扁對齊桓公語。謂君所讀書皆古人之糟粕。後世不讀書者輒以是語爲藉口。叔節亦嘗闢之。謂莊生之說所以至今存者。正賴有書在耳。去糟粕而精意奚寓乎。又謂吾國之學大抵窺見至高不能由卑以基之。二十年來不能戰勝萬國而爲萬國絀者。皆莊生糟粕之說誤之也。其言絕精且極。沈痛南通范肯堂先生壻於桐城姚氏。其弟仲林秋門又與余南菁同學。至契。肯堂遺集中南菁書院記及題杭氏鋤經閣均以軌道研經扶世翼教爲職志。與叔節慎宜軒文若針芥符契之合。今通州三范與叔節均先後下世矣。吾爲庸公題焚膏補讀圖追懷舊友之名論不禁觸緒生悲而自念以窮老

不死之身。羈滯舊都。時藉醫文字。以自活。正與庸公少年時爲人而荒於自課其失相同。而身世憔悴之可悲。世變江河之日下。更有不忍形諸楮墨者。庸公倘亦有同感乎。昨歲旣爲題絕句四首。庸公意以爲未足。屢函督促。續爲詩文以闡明斯圖之旨。爰復次韵奉和。自題四律。並作記以答其意。且以質諸松濤翁云。庚午閏六月常熟孫維記。

孔壁籀銘

有序

庚午閏六月作

曩誦庸公題松廬校譜圖詩。有云。我局孔壁籀編纂。差可比。初不知其命名何所取義也。庚午閏六月先立秋三日。得庸公書云。敝廬地近泮宮。在雲程坊之右。後壁與宮牆爲鄰。其面西之老屋。名曰知困室。別有正屋之東。書齋一楹。範圍甚狹。僅十笏而已。平時誦詩讀書。及一二故人班荆話舊。盍簪講習。率居留於此。竊因近聖人之居。擬自署爲孔壁籀。子其爲我書齋榜。且作跋以爲紀念。余素不善塗鴉。勝書尤非所能。勝惟平生受孔子戒。又值舉世非聖無法之時。其烏可以無言。漢世魯恭王壞孔子宅。升堂聞金石絲竹之聲。歷史傳爲美談。此非炫神奇。臧俗聽也。蓋尼山之教。實如日月經天。江河行地。仁者見仁。智者見智。先天弗違。與時消息。確有不可得與民變革者在也。近者

閱牆構兵。尋干曠野。暗啞。嚙。暗。之。將。竟。忍。以。曲。阜。林。廟。爲。喋。血。之。場。傳。聞。杏。壇。手。植。之。
檜。秦。時。藏。經。之。壁。數。千。年。所。兢。兢。保。存。者。均。不。免。於。兵。戈。之。劫。嗚。呼。慘。矣。庸。公。獨。因。卜。
鄰。泮。水。以。孔。壁。名。其。移。其。衛。道。之。勇。憂。世。之。深。洵。可。爲。知。者。道。難。爲。俗。人。言。也。爰。爲。銘。
曰。

巖。巖。孔。壁。與。天。比。崇。大。成。先。覺。牖。啓。顓。蒙。後。生。鑽。仰。覆。簣。程。功。循。牆。饘。粥。一。畝。之。宮。規。
行。矩。步。蹈。和。履。中。宗。廟。百。官。贊。歎。靡。窮。毀。聖。武。叔。問。孔。王。充。日。月。何。傷。沸。天。羣。孽。壁。立。
萬。仞。絕。地。天。通。東。海。西。海。心。理。攸。同。

許松甫先生八十壽序

周易上經始於乾坤而以剝復二卦緯之下經始於咸恒而以鼎革二卦緯之蓋聖人作易於數千萬年之世變實不啻燭照而數計焉剝極而復革故鼎新乃爲世界不可避免之事而乾健坤順咸感恒久之理則百變而不離其宗由此則治不由此則亂中外古今莫能外也乾象傳曰自強不息坤象傳曰德合無疆不息無疆皆壽象也天地感而萬物化生故經曰咸亨利貞取女吉聖人久於其道而天下化成故經曰咸亨无咎利貞利有攸往序卦傳又云夫婦之道不可以不久也故受之以恒恒者久也中庸云不息則久久則徵旨深哉治平之本肇於修齊一家之內爲子弟者誰誰肅肅繼繼繩繩妃匹宜家同心黽勉頤性養福之老人顧而樂之自獲悠久無疆之洪算和氣召祥非倖致也今觀於許松甫先生而益信矣先生世居杭州富陽縣里山尊甫錦村府君經商南通先生與弟秋圃侍養重慈粵亂起由杭至金衢里山當其衝先生年甫十二不幸被匪掠得間遁道遇漁父挈之歸里漁父陸姓失其名至今歲時奉木主以祀焉時里山賊黨多徙南通以避兵禍先生奉重慈命隨戚赴通冀延太岳之一脈越歲

錦村府君始問道返杭。迎親移居城東興仁鄉。先生幼聰穎。博綜經史。尤精繪事。嘗畫大獅馬數幀。爲世珍賞。錦村府君既逝。承外家長親之命。繼續經理商務。遂棄儒就賈。誠信孚浹。展拓所業。益臻閎肆。厥後通州總商會成立。被舉爲會董。自治局成立。又被舉爲議員。其他地方公益慈善之事。靡役不從。先生度量豁達。純任自然。或遇困難事。心氣彌覺和平。晚歲戒殺放生。偶櫻疾。輒誦佛號。不藥而愈。識者以爲壽徵。今年已屆八十矣。有子三。孫六人。十二月廿四日爲攬揆之辰。公子伯明仲德叔良。將先期設家宴。萊衣舞綵。以娛先生。伯明之第三子。又與仲德叔良二君之長子。三人同日行合巹禮。重慶駢喜。甚盛事也。先期由吾族叔祖松濤翁。徵余撰文爲壽。伯明之第三子。娶同邑望族顧氏。未航先生之姪女也。與吾族兄幼渠爲姪姪。休戚相關。聲氣相應。余不可以無言。況如先生之髦壽。給背悠久。無疆。伯明昆季之善事其親。婚姻洽比。有合於大易乾坤。咸恒之義。積善之家。必有餘慶。君子有穀。以貽子孫。閭宮燕喜之頌。箕疇五福之徵。豈倖致哉。抑余重有感焉。嘗讀歸熙甫所爲白庵程翁八十壽序。謂翁故家新安。少而客於吳。吳之士大夫皆喜與之遊。都太僕愛其淳樸。題其所居曰白庵。翁先世

業儒。至翁由士而商。然翁恂恂藹藹。所至樂與士大夫交。則又可云由商而士。客吳既久。吳人咸信愛之。無貴賤均稱爲白庵翁云。今先生以富陽舊家。久客紫琅。經營實業。幾以南通爲第二故鄉。諸郎學成名立。科登拔萃。譽炳上庠。南通賢俊咸樂親先生之渠誨。頗與白庵程翁相似。其以不易堂合浦亭對溪書屋命三子分居。亦與都太僕題所居曰白庵相同。至先生之德量學識。且或遠過於程翁。惜余謫陋無文。不能追蹤熙甫耳。熙甫又謂程翁生長休明全盛之日。迄今百年。風俗世道之升降。上自朝廷下至田野。平日之所見聞。其變不知凡幾。八十老翁。當不能無感於心。今先生幼遭離亂。躬逢同治中興。親見干戈載戢。鐘虞重光之盛軌。迄乎光緒甲午。庚子。危機孽芽。其間辛亥。易社政體變更大同。非一蹴可幾。萬姓方倒懸待解。滄桑陵谷之幻化遷移。先生老懷感觸。當更有百倍於程翁者。觀其語伯明諸子云。當此天下多事之秋。同胞尙未得一日安。於我心有戚戚焉。汝輩爲我舉觴。適增我滿溢之憂。若徵求鴻碩詩文。俾我子孫世世珍藏。知乃祖之辛苦艱難。而奉之勿失。則惠我多矣。其言雖本謙抑之懷。而實有無涯之感。愴吾不知熙甫生於今日。其慨歎又將何如也。董子有言。天下雖亂。吾

心自治。孝經云。孝弟之至。通乎神明。光於四海。如先生之眉壽。錫嘏垂裕。後嗣伯明。暑季之色。養承歡。劬勞報答。諸孫輩之宜家。有慶綿颺。衍祥吾知。刀兵水火。飢饉凶荒。種種乖戾之氣。及非孝非聖。自由戀愛。種種狂悖之論。皆將消弭。感化於無形。十年廿年以後。再爲先生稱九秩。與百歲之觴。宴海之內。必將滌瑕蕩穢。復我堯舜湯禹重熙累洽之治。可預決焉。先生聞之。倘亦莞爾而笑乎。是爲序。

常熟錢君湘圃墓誌銘

府君姓錢氏。諱鍾瑛。字湘圃。晚號蒲塘逸叟。世居常熟鹿苑鎮。後遷蔣家橋。又遷湯家橋。爲武肅王三十八世孫。曾祖諱士美。本生曾祖諱士駿。祖諱桂標。字蘊香。考諱大昌。字震甫。妣陳太君。府君爲震甫先生長子。幼穎悟。從童俊堂姚緝庵。及同族品三緯人諸先生受業。潛研經史。兼工制藝。同時切磋講習。均直諒多聞之彥。如江陰梅笑山黃藜閣許頌慈。無錫姚筱湘姚呂笙范菴卿。同邑曾子唯徐少淵龐季之陳永言。其尤著也。府君學問博通。狀貌尤魁偉。見者羣推爲玉堂人物。厄於時命。屢薦不售。退而課徒。凡經指授。咸有成就。評文以清真雅正爲宗。論學以躬行實踐爲主。聞過則喜。赴義若

渴不微名。不弋利。主鄉政數十年。凡興學浚河賑災防匪。及其他公益事。悉任勞怨。斥
賞財。無宿諾。無德色。有以雀鼠之爭。乞平亭者。爲判其曲直。戒無成訟。謂訟則終凶也。
天性亢爽。嫉惡如仇。里中梟桀少年。偶作越軌事。率相戒斂手曰。無使錢公知也。事二
親能先意承志。陳太君晚年多疾。府君與弟莘庵分侍病牀左右。維持調護。衣不解帶。
累月弗倦。內行純篤。鄉黨交稱。府君多能多藝。文字外。旁涉工程建築水利地理諸書。
尤精岐黃術。病家延請診脈。輒步行卻酬。遇貧病交迫者。或懷金私贈之。事過澹忘。絕
口不言。病者感其德。越數年來。償所贈金。則受母而返。其子曰。吾非以弋利也。嘗以寧
人負我。無我負人。及施恩。慎勿念受恩。慎勿忘。勗其諸子。光宣之交。學校始興。府君與
諸同志鳩集私財。首創崇德小學校。自任校長數載。樂育英才。成績爲一邑冠。府君平
日待人寬厚。而自奉儉嗇。飲食服御。不取精美。一裘之製。恒數十年不易。有晏平仲之
風。晚歲因悼亡伊鬱。目幾失明。爰謝絕塵事。獨居斗室。以吟詠自娛。每成一章。口授兒
孫輩。繕錄成帙。署曰蒲塘吟草。江陰王其元序云。君詩和易平澹。根本性靈。略似隨園
老人。鼎革以後。觀政局之屢變。嗟兵禍之頻仍。其哀感也。如夜猿之啼。月其激越也。如

霜鴻之唳。秋蓋抑塞。翫麟志不自得。多於詩寄之。府君又著里閭紀聞若干卷。雜記鄉閭故事。以備志乘之採擇。今藏家待刊。府君生於有清咸豐九年己未七月初二日。卒於民國十八年己巳夏正九月二十八日。享壽七十有一。配趙宜人溫恭慈惠。內助稱賢。卒於民國四年乙卯六月二十一日。府君哭之慟。子三人。長育仁。次育德。次育任。育德已前卒。女一人。鳳娟。適吳德基。孫九人。育仁所出者。曰人麟。人虎。人俊。人平。人元。育任所出者。曰人麒。人熬。人壽。人麒奉府君命。嗣育德爲後。孫女二。慧芝。薈芳。曾孫一。亮才。曾孫女一。婉初。育仁等既奉府君靈櫬。於己巳夏歷季冬。與趙宜人合窆於南三場十一都二圖湯字號午山子向新阡主穴。又馳函舊京。告於同邑舊史氏孫雄。乞爲府君銘墓。育仁博洽能文。恢張家學。著有荔圓樓文集。雄曾爲序而行之。雄於光緒戊寅科試遊庠。出長樂林文恭師之門。府君則先余一年以丁丑歲試第一人。獲雋爲文。恭師所賞拔。集中所謂親朋爭賀小三元也。嗣又同爲廩膳生員。寸晷風檐。前塵如昨。育仁又於光緒癸巳科試遊庠。與季弟同虞同出宗室溥玉岑年丈之門。累世交情。親若同氣。況府君學行又應古銘法。何敢以不文辭。乃爲銘曰。

彭。發。後。人。食。舊。德。大。鵬。扶。搖。阻。風。翮。匹。夫。興。亡。與。有。責。晚。以。詩。鳴。嗣。元。白。易。名。貞。憲。無。媿。色。弟。子。莘。莘。銘。教。澤。鄉。邦。矜。式。作。之。則。佳。氣。鬱。蔥。封。馬。鬣。綏。佑。後。人。利。無。極。

奉賢朱君杏南墓誌銘

君諱聲濤。字杏南。號昌岐。江蘇奉賢人。系出宋徽國文公之後。曾祖考諱鴻儒。字黼山。祖考諱士璋。字史枚。均爲邑明經。有詩集行世。父名家駒。字昂若。晚自號遯叟。清光緒己卯舉人。江蘇省議員。與兄孝廉方正。粥叟先生家。驍齊名。有二難之目。遯叟先生有賢子四。伯曰聲夏。仲曰聲鳳。叔曰聲樹。君其季也。生而聰穎。能得親懽。六歲入塾。隨伯兄聲夏授讀。四子書。精熟了解。洞明大義。時遯叟主持奉邑學務。公餘假回教。以唐詩聲韻。琅琅上口。若有夙悟。十二歲入開泰小學高等班。課業輒冠儕輩。十五歲畢業。時宣統三年辛亥也。君深憂國勢凌夷。志在學專門。以救國。民國元年壬子。入上海同濟醫工大學肄業。校中主要教科。悉用德文講解。君於課暇。兼習英文。並治國學。雖房星處昂之日。閉戶攻讀如故。窮治五經史漢文選。及唐宋人詩文集。焚膏繼晷。計日程功。所作詩文。見稱耆宿。嘗曰。西學爲輔。國學爲本。吾家世傳儒術。士食舊德。不可自我而

墜也。辛酉夏。同濟大學機械科畢業。稟命庭闈。游學德國。長征萬里。以期深造。道出法京巴黎。登鐵塔。賦詩以弔前法皇拿翁。至德後。入漢那忽爾造車廠實習。日與數千工人伍。菲食垢面。竟日工作。數閱月間。盡窺製造火車汽車電車農車輿窰。壬戌正月。應柏林鮑爾雪工廠之聘。任計畫工程師職務。是廠規模宏遠。工人五萬餘。各種機械。皆由此出。君潛心探討。一載有餘。對於造機技能。無不嫻習。益爲學理之精究。復肄業於特來斯登大學工科。專攻機械及電機等學。暑假期內。自携攝影機。徧歷名城。考察克虜伯等諸大工廠。以擴見聞。丙寅春卒業。考取德國政府特許工程師學位。前後五年。家書絡繹。而於不浪費。不狎邪。不求空名。注重實學。尤三致意焉。德於大戰後。生計艱難。百倍曩昔。君耐苦減食。勇猛精進。鍛鍊身體。寒暑弗輟。自奉雖儉樸。而待友則極肫厚。金山顧君珊臣。游德遭疾。遽卒。君與同學釐泉運櫬。俾正首邱。同學謝君。因蜀中兵阻。游德無貲。君助之成行。與德國同學英俊。交誼尤篤。嘗曰。孔子言忠信篤敬。蠻貊可行。聖人之語。不我欺也。君於丙寅秋初。自德歸國。甫抵里門。驚悉護親棄養。已經三載。一慟幾絕。蓋遜叟先生。以中外懸隔。歸途不易。當時不令諸郎。以噩耗馳告海外也。隨

赴墓所設祭放聲號哭以頭觸墓門曰我負吾母生不嘗湯藥死不親含殮葬不與捧土萬死不能贖吾罪也。遯叟先生命勿過哀以傷老人之心遂含淚離墓返猶復飲泣終宵肌膚柴瘁病根殆已潛伏於此時蓋君天性純孝五內摧傷終天之痛莫能自解也。君以國內機械事業爲用至廣擬糾集同志組織閎鉅之機械製造廠於滬江旋因股款支絀未克觀成引爲深疚。丁卯冬初被任上海兵工廠礮廠主任兼工程師並主持材料研究科事其時軍事方殷後方接濟至關重要君激勵工友增加出品軍用重器遂無匱乏鄰省需要亦多取給當軸與同事皆倚重焉。新都軍政部兵工署當軸知君才復力爲推轂令襄部署事務又聘任兵工研究委員復因中俄邦交決裂邊疆有警軍備亟需不克離廠。戊辰冬遯叟先生患病頗劇君與諸兄輪日侍奉竭誠籲禱禮延學力深遽之西醫診治獲痊仍必以星期歸省依依膝下更深不寐達旦啓行赴滬不以風雪阻也。今年七月自滬至南橋省姊丈陳君曉春疾陳君所患爲時疫至已易簀矣君爲理斂事冒暑焦勞遂患傳染不及醫治而卒。君生於有清光緒二十三年丁酉二月二十一日卒於中華民國十八年八月十五日於夏歷爲己巳年七月十一日。

年僅三十有三。元配張氏。繼配陳氏。均賢淑宜家子。二長彝孫。張氏出。次玉孫。陳氏出。女一。佩琮。陳氏出。余與粥叟。遯叟兩先生。爲文章道誼之交。平生所兄事者也。君之卒也。遯叟哭之慟。有五言絕句三十首寄余。老淚如潮。不忍卒讀。又和余憂吁集韵。爲哭子詩。有精神滿腹如騰虎。疫癘傷心似喘牛之句。君之兩兄。聲鳳聲樹。撰次事略。乞余銘君之墓。余何忍辭。嗚呼。君之死。豈徒其父兄之痛哉。時艱方亟。大厦誰撐。如君之賢孝。仁勇。德成藝成。卓絕類假。以歲年於開國。承家輔世。長民之大業。庶幾勝任愉快。而無難。吾知當世有心人。必有扼腕歎息於人亡國瘁悲痛而不能已者。短命之年。略符顏子爲邦大業。賁志重泉可悲也已。迺爲銘曰。

蘭薰雪白。曾史行孝。思不匱盡。其性善事利器。工倕聖鵬翼。垂天春秋盛。鍛翮須臾。子桑病二豎。乃擅生殺柄。哲人云亡。業誰竟。枯菀修短由天命。我銘幽宮。清淚迸。

秦縣張子先生墓誌銘

共和紀元十有六年。歲在丁卯仲秋之月。秦縣張生錫蕃自里門來京師。衰絰踵門請曰。先君子之歿。已七閱月矣。卜葬有期。銘幽之文。非吾師莫屬。且秦邑方續修志。乘冀

得鴻文。以備耆舊傳之採。庶幾先人懿行。可垂不朽。師其無辭。錫蕃秉性純孝。爲余縷述遺事。涕淚輒涔涔下。矧君言行。皆應銘法。余何敢以不文謝。案狀。君姓張氏。諱裕。登字子和。先世居姑蘇。清初始遷泰州。宣統辛亥。後改州爲縣。故今稱泰縣人。曾祖文貴。祖宜哉。考椿年。有子二人。君其仲也。君天性孝友。事親先意承志。無纖微拂逆。光緒庚寅。椿年府君逝世。君哀毀骨立。明年。母何太夫人患咯血。中夜禱天。誓以身代。尋占勿藥。頤養六載。至孝感神里人。驚歎。先是椿年府君事母史太夫人。至孝。史太夫人晚年患癱瘓。飲食盥洗。悉由椿年府君。夫婦朝夕侍奉。偶因事他適。君輒代任其勞。迄丙申。何太夫人舊疾復發。君侍奉湯藥。衣不解帶。其曲意承歡。一如椿年府君之事。史太夫人也。君與伯兄裕厚。友愛甚篤。乙酉歲。兄猝嬰危疾。不起。遺孤長者甫七齡。幼俱在襁褓。君教誨提携。如己出。諸子咸克成立。平居處理家務。以大禹謨。克勤克儉。二語身體力行。垂爲家訓。對子弟雖愛憐備至。從不稍假詞色。族中無男女長幼。見君至。咸肅然起敬。無敢惰慢。少時貧窶。備歷諸艱。晚年家境稍裕。而刻苦自勵。仍如曩日。嘗勗錫蕃昆季曰。一粥一飯。當思來處不易。汝輩宜時時愛惜物力。不容絲毫暴殄也。辛亥國

變時西倉失業者衆。君與猶子受茲集議。醵田若干畝。略師范文正義莊之意。創設宗祠。附設養和堂粥廠。以時散放。其事具詳邑志。君歆然不自以爲德。而鄰里鄉黨無識不識。異口同聲。謂仁人造福。未有艾也。先是庚戌季夏。秦邑南境大水。田廬淹沒無算。君儲糧餼粟。泛舟濟貧。全活綦衆。至於賑粥施藥。育嬰恤嫠。數十年未嘗或懈。縱或資財不足。無不盡心力而爲之。蓋君之好善。根於天性。非以沽名譽求福利也。清季詔停科舉。君命錫蕃肄業揚州儀董學堂。旋又命入京師法政學堂。共和三年甲寅。應三屆縣知事試驗及格。分發京兆。歷任薊縣民政科科長。暨熱河都統公署秘書。熱河財政廳制用科科長。代理廳長職務。又歷任京師安徽綏遠等處警職。錫蕃每晉一階。君必馳書諄諄告誡。勗以清廉勤慎。并命鐫石章曰修身慎行。鈐之公牘。以資弦佩。其用意深矣。君生於有清咸豐八年戊午十月初四日。卒於共和十六年丁卯正月十九日。年七十。元配氏吳。繼配氏繆。均封宜人。子三。長即錫蕃。次錫爵。先卒。次錫汝。女四。長適錢炳榮。次適洪步莊。幼未字。殤。孫三。葆誠。葆源。葆光。錫蕃等以某年月日。啓吳宜人之靈。與君合窆於秦邑之某鄉某原。銘曰。

是愷悌之君子。亦一國之善士。弭亂施仁。功在桑梓。敦孝友。與任卹。種德以培。後起瞻鬱鬱之佳城。越千春而弗圯。

榮祉字戶部雪石齋詩集序

懷德榮君祉字。可民先生之季弟也。先生爲遼東耆儒。門下士傳其衣鉢。多騰達負時望。有洊至開府秉節鉞者。士論以爲榮。而先生落拓不偶。僅登同治癸酉拔萃科。至光緒癸巳中順天鄉試副榜。與余爲同年生。祉字幼時受業於先生。所爲詩文。悉經指授。有法度可觀。光緒甲午捷秋闈。出楊子勤前輩鍾義之門。厥後獻藝南宮。屢薦不售。服官戶部。鐸鐸有聲。辛亥國變。隱居舊京。以詩文自遣。與余交契垂四十年。志同道合。嚶鳴無間。且有昆季之好。余長於祉字者五年。祉字醕篤謙謹。竭盡兄事之禮。比歲都會南移。干戈俶擾。余蟄伏燕京。繫匏不食。實賴祉字時時存問。分金周急焉。祉字夙豪於飲。己巳秋初驟得半身不遂之疾。余往視之。祉字以新刊陳石園集及遼東三家合集見贈。石園先生與李鐵君戴遂堂以詩鳴乾嘉間。世稱遼東三老。沈歸愚稱其甘老布衣。恥言名利。鐵君序其詩。謂如頌鐘雅瑟。淪淪乎大雅之音。三家合集者。可民先生鹿

萃齊詩文集。及遼陽房仲南隅夢草堂詩草。新民劉東閣看雲聽濤館詩也。子勤前輩
弁言。謂三君子英儒瞻聞。皆所謂琢玉工。射雕手。實爲遼東文獻之巨擘。二書寫刻甚
精。均由祉宇縮衣節食而成。其關心鄉邦文獻表彰耆著述之盛心。至可佩企。祉宇
又命其長公子蘿裳。取書室中所藏手寫雪石齋詩集一冊見示。且鄭重而言曰。余平
生所爲詩多不存稿。蓋不敢自信也。此冊所錄僅一百三十餘首。設不幸溘先朝露。即
此拳石勺水。略見平生志趣大略而已。子其爲我序之。余唯唯受命。庚午春間。余亦爲
病魔所困。未遑握管。且私意祉宇清門懿德。宜享大年。末疾牽纏不足爲患。弁言之作
毋庸汲汲也。不意庚午仲夏之月旬有三日。祉宇已長辭人世矣。蘿裳世兄函來言病
中屢屢詢及詩稿。盼弁言之速成。死別吞聲。負我良友痛可言耶。可民先生與祉宇兩
家之詩。余於辛亥以前已選入四朝詩史甲集。畢節葛霞仙戶部撰可民先生墓誌述
及茲事。稱其昆季濟美輝映。後先祉宇詩筆俊邁。而含意沈鬱。古近體詩頗有學步石
闔先生遺集者。其與可民先生鹿萃齋詩。則壘簾合響。沆瀣流甘。尤如豐城雙劍。可合
而不可分。然在心爲志。發言爲詩。詩之不同。如其面焉。固不必就聲音形貌刻舟以求。

劍也。冊中觀奕六首。落葉四首。均和我之作。落葉集別刊行世。海內已多有傳誦者。今蘿裳將以此冊付刊。附入遼東三家合集之後。因詳述顛末以爲序。且抒余悲詞費之。議明知不免。九京可作。聊償夙諾而已。抑余重有感焉。吉林成竹山太守多祿。懷德趙迺唐。禮部晉臣。皆余與社宇之詩友也。二君均卒於戊辰冬間。竹山有澹堪集。迺唐有師竹齋集。若與雪石齋詩合刻。可稱遼東後三家集。或改稱遼東六家合集。蓋六人年齒雖有長幼。而輩行相同。似無先後之可言也。澹堪集生前已刊行。迺唐社宇兩家遺詩。尙遲付梓。迺唐詩稿。已由其叔子友松編成若干卷。友松名鍾喬。嘗受業余門。其龍傳家學。與蘿裳同。蘿裳與友松。倘以余言爲然。余將合三家之詩。爲之點定。他日流傳藝苑。將與清初六家新城秀水諸公媲美。未始非遼瀋文獻之佳話也。爰附及之。庚午季夏之月。旬有二日。年如小兄常熟孫雄師鄭氏序。

附錄蘿裳世兄來函

師鄭老年伯大人鈞鑒。日昨接奉手諭。並先嚴詩集。暨老伯所撰序文一篇。捧賤拜讀。語摯情真。字字均從肝膈中掬出。再四諷誦。不自知其淚之潸潸下也。先嚴詩雖

無多。一生心血所關。得老伯序而傳之。不獨小姪感德。即先嚴當亦無憾。謹即手錄清稿一通。焚諸靈右。以博九京一笑。惟是小姪學業荒疏。媿難紹述。先嚴身後各事。一切均待整理。而墓誌塋地。尤爲重要。前荷老伯允撰銘幽之文。紹衣等謹百叩以謝。俟將先嚴事略擬就。即行送呈。尙望老伯俯念孤露。時時錫以教言。俾得遵循。有自。是則姪等所含淚切祝者也。專肅奉謝。敬頌鈞祺。棘人榮紹衣謹啓。六月十二日

褒揚孝子南通劉公旭初家傳

公姓劉氏。諱樹森。字旭初。號茂林。江蘇南通人。高祖諱鶴齡。湖北宜昌府知府。曾祖諱宗璧。州學生。本生曾祖諱宗元。祖諱穀詒。父諱承恩。先世居邑東呂四場。以資雄於鄉。有劉百萬之稱。至公之祖。家中微矣。公父晉三先生。又幼孤。以貧故。自呂四遷縣東興仁鎮。先世子遺之田肆租入。多爲戚族所據。晉三先生稟性慈仁。任其乾沒。而遇佃賃之以窮告者。且時時周恤之。歲入益不支。旋又以依外家故。再遷治城之東。時公甫十齡。恒與兄筱坪公。以母命。賣女紅入市。易錢米。嘗晨冒雨。携棉紗出歸。時破屐創趾。血淋漓。印階石上。母大痛。公強笑以慰。慈親母有訶責。斂手旁侍。不敢避杖。俟母霽顏而後。他適。筱坪公以能文。鳴於里黨。迄不得志於有司。公年十七。晉三先生語之曰。汝少讀書。有神悟。仍宜習儒。公對曰。兒聞元儒許魯齋先生言。學者以治生爲急務。今將先治一業。求所以養吾親事吾兄者。晉三先生乃使習商。肆與家近。不十日。必請於肆主。歸省二親。及外王父陳魯東。先數年習業成。肆閉。乃商於滬。越二年。儲蓄數百金。歸即舊肆主屋。營錢肆。歷四十餘年。家業大振。公孝友。根於天性。事晉三先生二十餘年。事

母陳太恭人三十餘年孺慕終身竭誠盡敬晉三先生病亟時侍奉湯藥七十餘日衣不解帶刳木如勺親承穢溺惕息終宵既遭喪則寢息柩側事亡如事存既又移宅近肆每晨必歸進酒肴堂上遇重憂則益和其色惟恐母知陳太恭人棄養公年已近六十朝夕上食猶孺子泣迎養伯姑及從姊恩禮交盡撫兄二子如己出以養以教殫竭心力仁民愛物胞與爲懷戚友困窘量力攸助或以經商虧耗負累不能償亦澹然若忘懽笑如平生從不計較迫促以此數十年間傾囊至累萬金助鄉里公益費亦稱是處卑賤牧豎煦然如春意存矜憫嘗勗勉子姪云吾幼時吾父收田租僅得絢索數束吾兄弟負至學宮前求售購者見吾童稚易與故靳其直弗售則負之返力小弗勝無以易粟與蔬報二親命故吾深知小販苦也公生於有清咸豐元年十一月初五日卒於中華民國八年夏歷九月十六日年六十有九鄉人士以其孝友仁慈合於周禮地官六德六行具牘上政府得褒揚如例葬縣南馬家壩配保夫人賢淑宜家先卒子四長瀚清次滙清均前清優行廩貢生瀚清已前卒滙清今爲通崇海泰總商會監察委員次渭清清優行附生今爲通崇海泰總商會執行委員次瀛清前殤女二長適黃衍

熙次適顧爾鐸。孫男十二。長冠祥。次冠明。國立北京大學經濟系畢業。得法學士學位。次冠世冠。章冠慶冠洪。均畢業南通大學。南通中學及甲種商業諸校。次冠嘉冠中。均肄業南通中學。實驗小學校。次冠蘇冠杭冠開冠順。均幼。孫女四。長齡祥。適孫澤均。次冠芳。適謝大任。次冠鈞冠鎮。肄業南通中學。實驗小學校。曾孫一。啓曾。幼。曾孫女四。公之仲子滙清。與雄爲文字交。所著留園詩存。首列勸孝詩。有句云。舉世未聞無父國。事親竭力有生年。至情至性之語。雄三復之。輒爲泣下。近世方盛行非孝及破壞家族之說。負笈歐瀛之學子。海外歸來。率視其親如路人。而滙清獨能爲此沈痛之語。以喚醒羣生之迷夢。知公詒謀遠矣。雄有族叔祖曰松濤翁。與公家累世戚好。滙清介翁乞雄爲傳。雄之文何足以重公。他日拙集流播。迺賴公之懿行。而使微名附驥。以傳。滋可幸矣。遂不辭而爲之傳。

論曰。雄嘗讀顧亭林先生華陰王氏宗祠記。謂世衰道微。所賴一二賢人君子。躬行孝弟之道。以感發天下之人心。使之惕然知省。而後先王之教可得而興。積汚之俗可得而變。革如劉公之孝。友仁慈殆足以當之矣。抑雄觀於公之幼時。冒雨出售棉紗。破履

舊唐書
傷趾之事。而重有感焉。雄生於同治初年。吾家甫遘粵寇焚掠之禍。室廬蕩然。先考孝子公。課徒以養慈親。夜宿館中。必越旬日始歸。先妣吳太恭人。終夕紡織。至雞鳴而息。雄十齡以前。間日晨起。輒携棉紗至城東市肆求售。售盡則易米蔬以歸。始入塾讀書。偶遇雨雪。着屐赴市。先妣倚閭而望。必俟雄歸。始煑粥以食。彼時童騷若以爲苦。今日追思。劬勞罔極。痛可言耶。而雄於學問事業。百無一成。垂老飄零。久虛祭掃。負疚何窮。以視公之積善餘慶。子孫繩繩。其遭際之枯菴。蓋不可同年而語矣。執筆紀述。又曷禁泫然零涕也。

南通劉君瀨如繼室姚夫人三十初度家宴記

雄觀前史所記國祚當隆盛之時。必有賢后。妃章明婦順。以助化育。而弼成郅治。家之興也亦然。如孔子教小子以學詩。勗伯魚以爲二南。開宗明義。首言好逮之淑女。采蘋之夫人。大雅所載。更上及於太姒之徽音。太任之思媚。而左氏傳首言惠公元妃孟子。孟子卒。繼室以聲子。昭公三年傳。又言齊侯使晏嬰請繼室於晉。謂寡君未有伉儷。不能獨任其社稷之事。誠以妃匹之際。生民之始。於國於家。均不可一日缺位也。劉中壘

之傳列女也。先之以母儀。繼之以賢明。仁智蓋必。賢明仁智而後能相夫以宜其家。故周官四教以婦德。冠於言容功之首。南通劉氏承中壘之華胃。蕃衍於江左。旭初先生懿德摯行。矜式鄉閭。雄曾爲作家傳。瀨如爲先生之仲子。賢而嗜學。所著知非堂文集與留園詩存頗多見道之言。文集中有內子姚淑玉三十生日記。雄讀而善之。其大略謂姬氏姚年十七來歸。性爽直誠篤。居家勤儉。事翁盡禮。侍先室若姆。撫嫡出子及諸姪若己出。年十九生女冠鈞。是年先室逝世。先嚴卽詔余曰。爾無再娶。次年六月又諄諄詔余曰。爾無違吾意。其亟命姚氏正位爲繼室。氏謙不敢承。九月望先嚴見背。氏方娠。事亡如存。十一月朔生子冠嘉。甲子歲余病蠱。備受痛苦。隱有治命。姬氏焚香禱天爲誦大士經萬卷。得慶更生。爰根據禮經妻齊之訓。及一與之齊。終身不改之義。與訂終身不改之約。翌年又生女冠鎮。己巳夏正四月二日。適氏三十生日。卽以是日敦請族黨親朋。置酒如禮。遂定名稱爲繼配云。瀨如又用隨園老人集中賀新婚韵以紀其事。同時紫琅耆耄如劉君受初。顧君未杭。袁君性之。及雄之族叔祖松濤惠春兩先生均作詩以祝其偕老。喁于唱酬。彬彬稱盛。瀨如又嘗以旭初先生家訓手自寫錄郵寄。

舊京言雖淺近而精當樸實皆宜身體力行其論子女嫁娶謂必須慎重選擇又謂娶媳較嫁女爲尤重人苟無賢內助則敗家之根即已潛伏嫁女不慎僅害女一人娶媳不慎不但害及全家甚且延及子孫洵爲不刊之論近世偉人方持破壞家族之議女學雖興婦德益悖離婚自由視爲固然三綱業經潰裂則彝倫之始已乖而大易乾坤順之定理亦遂失其根據邪說橫流厥害殆甚於洪水猛獸旭初先生於十餘年前曠觀世變燭照及此爰於子女嫁娶之事殷殷垂訓三致意焉且於生前諄命瀨如速立淑玉夫人爲繼室蓋深信夫人之賢孝明達備仁智於一身足以承炎劉之宗祧作君子之嘉耦而又深慮瀨如之爲浮議所撼或別娶繼室不得其人致敗家之萌將潛滋而暗長也然則瀨如今日之舉繼志述事無忝所生誠足以衍箕裘而光譜牒矣雄旣和隨園集及顧君未杭之韵成七律二首爲瀨如及夫人賀又爲此記以就正於受初未杭性之諸君暨松濤惠春兩翁或不以爲詞費乎己巳季冬朔日孫雄師鄭氏記

明繆文貞公萬歷癸丑會試朱卷書後

科舉爲世詬病久矣。然明清兩朝用以取士。歷五百餘年之久。凡忠孝節義之魁儒碩彥。氣作山河而光爭日月者。皆出其中。則科舉固無負於人國也。有清光緒季年。袁項城力持廢科舉之議。用意別有所在。南皮張文襄曲徇之。合詞請於朝。毅然改革。仁和王文勤力爭不省。不及十年。清社遽屋。人綱墜地。舉國囂然。民困鋒鏑。莫知死所。識者恫焉。推其致禍之由。若焚絲之萬端。固不盡由科舉之廢。而要亦其重大之一原因。天下後世自有公論。今日無庸喋喋也。嘗閱姚惜抱文集。有武進孫文介公慎行萬歷二十三年乙未殿試對策卷跋尾。謂於嘉慶四年。在公從七世孫淵如觀察處得觀之。因歎賢哲翰墨。雖寸紙足珍。況其身所由始仕。而陳詞慷慨切實。忠藎之志。已可窺見。尤宜寶貴。又無錫顧端文公憲成。萬歷四年丙子鄉試領解朱卷。今猶爲顧氏後人珍藏。邵伯英前輩松年曾加題跋。歎爲不經見之名跡。吾邑繆文貞公昌期。萬歷四十一年癸丑會試朱卷。初藏無錫曹氏械卿家中。嗣爲陶君雪鷗所得。雪鷗爲吾甲午同歲生。端翼兵部世鳳之從子也。械卿曾於光緒辛丑乞翁文恭協揆師題詩。文恭愛不忍釋。

用朱藍墨三色筆。照寫一通。西京廣文。爲文貞公十世族孫。聞之狂喜。亟往錫山。如式摹副。藏於家。文恭師跋語。謂與真本絲毫無異。伯英前輩亦謂雖非原卷。而猶原卷之在繆氏也。文恭師題詩有云。西溪殺我語。定知傳者謾。即使出公口。奚間平生歡。若於臺山葉公之祠。方爲圓。加以諒恕者。夫文恭非有私於臺山也。蓋文恭之事清德宗也。躬任啓沃。輔翼之責正笏垂紳。孑然孤立。彼依附東朝者。百方傾陷齧齕之。文恭沈默容忍。視若無覩。然終不得安於其位。迨伏處田里。韜光匿彩。猶幾蹈不測之禍。文恭蓋深知身膺重任。綢繆調護之不易。其云弗擊必爲妖擊之善類。殘文悵觸有餘慨焉。要之臺山周旋宮府。維持善類。其委蛇歎息。自有難言之隱。而文貞之氣節卓犖信乎磊磊軒天地。炯然與日月爭光。至於師弟之異同。離合皆爲小節。存而不論可也。己巳之夏。余留滯燕京。以文史自遣。距文恭師辛丑五月題詩之辰。已二十九年矣。今年四月十七日。爲師百歲冥誕。余於旅邸設位而祭。檢讀文恭師遺集。及俞荊門世丈鍾鑒昔歲與余酬唱詩篇。感愴不能自已。適西京先生以文貞朱卷印本郵函索題。旣爲七律二首。覺尙有不能已於言者。爰作是跋。以述文恭師微旨。且以見科舉之興廢。其與

人才進退。國運隆污。關繫固若是深且切也。西京先生。方於今春重遊泮水。賦詩誌感。余亦爲長句和之。同於孔祀之廢。三歎息焉。今見下走此文。吾知必更有無涯之戚矣。又考萬歷癸丑科進士榜。狀元爲宜興周延儒。而文貞公甲第已列三甲五十四名。國子監題名碑錄。注明直隸常州府江陰縣籍。蘇州府常熟縣人。可見繆氏實爲吾邑望族。特文貞應試。則注籍澄江耳。又考是科二甲十五名。爲程玉潤。四十五名爲陸化熙。皆常熟縣民籍。三甲四十九名爲陳必謙。係常熟縣匠籍。此三先生皆與文貞同捷癸丑春闈。惜其仕履行誼不詳。未知今日後裔如何。當與西京共訪求之。觀於鵷籠相國之穢行。爲後世所羞稱。有宋新安朱子登科已列五甲進士。可知甲第之高下。無足輕重。所爭者惟在人品之高下耳。臺山評文貞卷云。余不能以科名重子。當令科名以子重耳。洵爲知言。文恭師迭掌文衡。其生平傾賞最摯。託付衣鉢者。未嘗無人。而辛亥國變。夫已氏迺電請遜位。以陰助項城。後又標榜名流。趨踰閣部。若而人者。其出處之是非。無足深論。設使文恭九京有知其感想。又當何如。因見無錫楊君志濂題詩有榜頭不得。文天祥憾遺易代。何能已之句。故附著於篇。俾後之考史論世者。別其黑白焉。西

京先生得毋哂其詞費乎。

經畬樓圖記

己巳七月爲南通族兄謹丞先生作

韓昌黎詩云。文章豈不貴。經訓乃菑畬。范石湖詩云。乃翁力菑畬。畬待子收播。穫古之君子。耕道獵德。守先待後。率於菑畬。三致意焉。稽之雅訓。一歲曰菑。二歲曰新田。三歲曰畬。菑畬者。耕穫對文。見周易无妄六二爻詞。解之者曰。耕穫者種而歛之。菑畬者墾而熟之一歲之農。始於耕。終於穫。三歲之田。始於菑。終於畬。周頌周工之詩。言儲農器。則曰庠。乃錢鏐言祝豐收。則曰迄用康年。而先之以亦又何求。如何新畬。良以新畬難治。故必及時努力也。南通同族伯兄謹丞先生。退隱江鄉。躬耕樂道。築樓藏書。榜曰經畬。冀以扶正學。而縣墜緒。勗後起。而振家聲。意至深摯。族叔祖松廬老人。適有印行宗譜圖詠之舉。謹丞所創建之私立孫氏小學校圖。及經畬樓圖。均列入卷五。函屬余爲作記。余與謹丞伯兄年齒相若。輩行相等。同爲新安始祖忠貞公三十五世孫。又爲四十餘年前舊同學。誼不可以無言。伯兄於弱冠時。肄業江陰南菁書院。與余同出定海黃元同先生之門。元同先生之教士也。融洽漢宋。無門戶之見。謂三代下之經學。以漢鄭

君宋朱子爲最。而漢學宋學之流弊。又均多乖離。聖經尙不合於鄭朱。何論孔孟。顧亭林嘗謂孔子刪述六經。卽伊尹太公救民水火之心。又謂經學卽理學也。經學外之理學爲禪學。故經學理學不能歧而爲二。今之學者。惟當體驗。高密新安之禁訓。以上追孔孟之經學。博文約禮。實事求是而已。伯兄與余均謹識。不敢忘。伯兄在書院時。精研小學訓詁。而治毛詩三禮尤勤。有補正凌次仲禮經釋例。極爲精密。又治公羊學。惟守定海實事求是之訓。不以著述自炫。譬之農夫治田。維序錢鏹。以盡力於菑畲。不急求收效於播穫也。伯兄通籍後。筮仕蜀中。出其所學。甦民疾苦。攝治青神。氓懷吏畏。召父杜母。頌聲翕然。其時蜀中伏莽徧野。長吏貪墨武健。民欲與之偕亡。伯兄燭照幾先。引疾辭職。或疑其高蹈之速。曾不數月。路潮沸騰。煽動全國。星星之火。炎及崑岡。始歎勇退急流。實有過人之識量也。易朔以後。鄉邦人士多以艱鉅相屬。伯兄任勞任怨。擘畫井然。而尤注意於教育。手勑孫氏私立小學校。規制力求完備。圖書儀器。農場校園。其他設備之具。應有盡有。伯兄自爲記一篇。略謂宇內本有無窮事業。吾儕既稍具知識。欲求無負一己當思。所以福己者。福人。又謂古人每云遺子黃金滿籩。不如教子一經。

吾則云遺子黃金滿筐。不如興學一方。伯兄此言實爲千古不朽之偉論。亦即禹稷已溺已飢之心。尼山立人達人之旨也。然則今日之以經畬名斯樓。豈徒若范石湖詩所云望諸郎之播穫哉。伯兄有賢子三人。已嶄然見頭角。固皆肯構肯穫之良材。而伯兄絕不爲一身一家自私自利之計。惟盡力培植鄉里之俊彥。以冀他日人才蔚起。造福地方。徐收經正民興之效。此其功洵足與教民稼穡之后稷比烈矣。張蒿庵先生經正錄自序云。綱常者經世之本。猶恒星不愆。而五行順布。四時序行也。邪慝生於心。則禍亂中於世。極陰生陽。無往不復。有開必先。非經正不爲功。亭林先生謂今之注蟲魚。命艸木者。皆不足言治經。又謂文不關於六經之指。當世之務者。弗作可也。不佞請以蒿庵亭林兩先生治經之宗旨。與吾伯兄互相規勉。終身誦之。庶幾無負定海黃先生之遺誨。而播植嘉種。牖啓後生。勤穡蓁而致豐殷。挽橫流而緜絕學。則吾儕福已。福人之責。或可稍盡於萬一乎。他日南來瞻拜宗祠白頭昆季。話舊於經畬之樓。更於滄園作十日飲眺蓬壺瀛舟之勝。吟池塘春草之詩。其樂曷有極哉。紫琅金沙蒼茫山水。雖不能至。夢寐繫之矣。

王孝子繼穀齊孝子占魁合傳

王孝子繼穀。字子詒。號漱六。浙江會稽人。父某某。字杏泉。官鄞縣教諭。孝子爲其第四子。少好學。善文辭。補紹興府學諸生。光緒五年丁丑。秋七月。杏泉病亟。孝子禱於城隍神。乞以身代。而父竟卒。次年庚辰。春三月。母某氏復病。孝子又以身禱。母病少瘳。遂於四月五日。自投甯波郡城月湖賀公祠前水中。死年二十九。其遺疏有云。晨昏侍奉。尙有諸昆。似續宗祧。已延弱息。塵世名利。固非本懷。身後毀譽。在所不計。得侍嚴親地下。亦有餘歡。惟願老母堂前。從茲無恙。湛湛月湖。寸心可鑒。神聽不遠。哀此愚忱。後之讀者。咸爲隕涕。就死之先。又題祠前衆樂亭柱云。漱六道人歸真處。又有小字二行。記其出處年歲月日。其從容鎮定如此。孝子與兄繼善。同受業於李越縵先生。慈銘之門。而才氣尤過其兄。讀書過目不忘。先生所爲詩文。皆能熟誦於其死也。先生哭之慟。作七律二章弔之。有昌黎已媿非人類。慙說文章是本師之句。都下爭傳誦之。孝子之長嫂孫氏。亦以殉夫絕粒死於某年。得旌其門。後八年而有東安齊孝子之事。

齊孝子占魁。順天東安人。世居留犢村。天性至孝。未習詩書。躬耕以養。光緒十三年三

月。祖母某氏病危。孝子禱於涿州之北塔。乞以身代。數日。祖母果瘳。孝子曰。神不可欺也。乃於三月二十二日。升北塔之顛。下墜於地。死焉。年亦二十九。

論曰。王齊二孝子之行誼。可謂卓絕矣。一孔之儒。動云毀體戕生。不可爲孝。然古來過人之絕行。豈能以常理相繩。若齊孝子秉鋤負耒。未習詩書。固無所謂名之見存。即王孝子禱神之疏。亦云身後毀譽。在所不計。推二孝子之心。蓋惟知有親耳。此身本爲吾親之身。亦旣昭告明神。願以身代。乃猶愛身惜死。是欺明神而危吾親也。則其視死如歸。絕無瞻顧。以求吾心之所安。誰曰不宜。夫古今忠孝節義之事。要皆恃此一念之愚誠。迺能格天地而動鬼神。植綱常而翼名教。孟子所謂人之所以異於禽獸。正在此幾希耳。彼緣飾經術。與標榜理學。以盜名譽者。烏足以語此哉。

清故翰林院編修沈君北山墓表

光緒二十四年戊戌四月。故相翁文恭公。奉嚴旨開缺回籍。天下知與不知。皆以公之去國爲惜。公曷爲而去國。爲榮祿剛毅輩媒孽傾陷而去也。公任戶部尙書二十餘年。意在培養國脈。撙節度支。其於東朝歲時進奉暨慶典點景之需。均主節儉。而杜浮濫。

孝欽。后深憾之。左右近臣日進讒言。巨奄李蓮英挾寵弄權。勢焰尤赫。榮祿剛毅與爲朋比。排擊忠良。公遂不得安於其位矣。沈君北山與翁公同里閭。肄業國子監南學。爲公所賞拔。旋中癸巳順天鄉試。舉人出公門下。甲午聯捷成進士。改庶吉士。散館授編修。夙慕楊忠愍史忠正之爲人。平居目擊時艱。常鬱鬱思有所建。白同邑內閣中書張鴻振奇士也。與君爲總角交。又與翁氏有連。嘗擬彈劾三凶疏稿以示君。君亟稱許。謂適如我意中所欲言。因加點竄於己。亥十月呈乞掌院學士代奏疏中大旨。謂三人行事不同。而不利於皇上則同。且權勢所在。人爭趨之。今日旗員之中。凡掌有兵柄者。卽權不逮榮祿。而亦榮祿之黨援也。凡勢位通顯者。卽悍不若剛毅。而亦剛毅之流亞也。而旗人漢人之嗜進無恥者。日見隨聲附勢而入於三人之黨。時勢至此。人心至此。可爲痛哭流涕長太息。故竊謂不殺三凶以儆其餘。則皇上之安危未可知也。臣伏願皇太后聽曲突徙薪之言。懷滋蔓難圖之義。亟收榮祿之兵權。而擇久任督撫忠懇知兵者分領其衆。懲剛毅之苛暴。而用慈祥仁恕之人。李連英奄豎小人。復何顧恤。除惡務盡。不俟終朝。如此則皇上安於泰山。可以塞天下之望矣。掌院徐相國桐驚怖其言。格

不。上。達。君。流。涕。長。跪。再。三。固。請。仍。不。允。遂。將。摺。匣。置。案。上。拂。衣。出。都。道。出。津。門。有。國。聞。報。館。記。者。來。訪。君。乞。觀。疏。稿。君。坦。然。示。之。次。日。卽。登。報。傳。播。遐。邇。爲。榮。祿。剛。毅。所。聞。徐。桐。恐。禍。及。己。遂。露。章。劾。奏。旋。奉。嚴。譴。奪。職。監。禁。經。年。始。出。獄。然。已。憂。悸。成。心。疾。居。北。郭。家。祠。三。歷。寒。暑。見。人。不。言。時。或。狂。笑。惟。喜。振。筆。疾。書。不。能。得。紙。則。牆。壁。几。案。墨。痕。狼。藉。視。其。所。書。之。語。多。詰。屈。不。可。解。未。幾。疾。卒。當。君。逮。問。時。翁。公。亦。被。嚴。旨。斥。責。并。交。地。方。官。嚴。加。管。束。蓋。榮。剛。諸。人。實。陰。主。之。邪。曲。害。公。方。正。不。容。古。今。同。慨。詩。有。之。曰。人。之。云。亡。邦。國。殄。瘁。厥。後。庚。子。辛。亥。之。禍。未。始。不。由。此。釀。之。而。君。則。直。聲。震。天。下。且。風。義。高。千。古。矣。君。初。名。棣。字。誦。棠。後。更。名。鵬。號。北。山。常。熟。人。父。某。某。官。銅。山。縣。教。諭。少。孤。受。學。於。長。兄。鴻。祥。鴻。祥。早。卒。嫂。氏。趙。守。節。撫。孤。君。終。身。敬。事。之。與。次。兄。鴻。聲。友。愛。尤。篤。都。門。修。脯。所。入。輒。先。寄。其。兄。嫂。已。則。敝。衣。糲。食。非。人。所。堪。鴻。祥。長。子。同。午。幼。聰。穎。君。與。次。兄。共。督。教。之。不。稍。寬。假。今。已。才。兼。文。武。斐。然。有。聲。矣。初。聘。吳。縣。劉。氏。繼。娶。武。進。費。氏。生。於。同。治。九。年。庚。午。某。月。某。日。卒。於。宣。統。元。年。己。酉。七。月。二。十。二。日。年。甫。四。十。無。子。以。姪。同。萱。爲。後。余。與。君。爲。同。年。至。契。又。有。昆。弟。之。約。且。同。出。翁。文。恭。師。之。門。三。十。年。前。鄉。人。以。孫。

沈並稱。今君已成名而去矣。余則遭逢國變。偷息人間。他日身後之名。君在雲霄。我淪
冀壤。寧復可同年而語。惟念君沒已十有三年。尙未有銘幽之文。世運凌夷。道喪文敝。
郢書燕說。輾轉流播。不有紀述。將益混淆。且君之彈劾三凶。實與文恭師之去國隱有
關係。君之毅然奮筆。不畏強禦。忠誠抗夫龍比。勇氣過於賁育。蓋旣以酬報真知。又以
保護聖躬。鞏固國祚。爲公爲私。兩無所憾。異時修信史者。其必有取乎吾說也。爰追述
大略。郵寄君之嗣子同萱。俾勒諸家乘。且即以表君之墓云。以上二文均已於辛酉年
刊入鄭學齋文存卷二中

今因藏置不慎。版已漫漶。久未付印。
爰將舊稿重加點定。附印此編。雄記

庚子殉難五詞臣死事紀略

熙元。字吉甫。正白旗滿洲人。光緒己丑翰林。散館授編修。官至國子監祭酒。庚子歲丁
憂在家。閉門讀禮。聞拳民仇教倡亂。憂憤不已。七月二十一日。又聞洋兵陷城。兩宮出
狩。偕妻費莫氏。嫂富察氏。仰藥以殉。事聞。卹贈侍郎。予諡文貞。

宗室寶豐。字穌年。正藍旗人。光緒己丑翰林。散館授檢討。官至翰林院侍讀。庚子七月
二十一日。城破。隨扈不果行。自題絕命詞云。忠節廉本乎天性。見利思義。見危授命。

舊唐書
嗚呼。寶豐不失其正。書畢。擲筆於地。卽吞金自盡。事聞。卹贈太常寺卿。予諡文潔。
崇壽。字鶴汀。鑲黃旗滿洲人。光緒己丑翰林。散館授編脩。官至翰林院侍講學士。庚子
七月城破。仰藥自盡。事聞。卹贈太常寺卿。予諡文勤。

王懿榮。字廉生。山東福山人。光緒庚辰翰林。散館授編脩。南書房行走。大考一等。洊擢
國子監祭酒。庚子五月。奉命爲京師團練大臣。嘗言受恩愈重。報稱愈難。七月二十日。
洋兵入東便門。猶激厲團勇。齊出抵禦。未幾潰兵塞途。人心惶亂。團勇不能成軍。懿榮
見勢不支。歸顧家人曰。吾身渥受君恩。又膺備禦之責。今城破義不可苟。生。家人環跪
泣勸。輒厲聲訶斥之。遂仰藥。未卽絕。復投井中死。妻謝氏。及已故長子崇燕之妻張氏。
亦同時殉節。八月初二日。吏部右侍郎張英麟。偕魯省同鄉京官。詣東城錫拉胡同。檢
視忠骸。代營殮斂。見案上遺有手書絕命詞云。主憂臣辱。主辱臣死。於止知其所止。此
爲近之末書。團練大臣國子監祭酒王懿榮十二字。事聞。卹贈侍郎。予諡文敏。
宗室壽富。字伯蓆。鑲藍旗人。原任禮部右侍郎寶廷之長子。光緒戊戌翰林。未散館。當
團教滋事之始。卽慮禍及國家。晝夜徬徨。不安寢饋。迨聞津沽失守。憂憤益深。行坐輒

以毒藥自隨。七月某日。聞洋兵已入城。遂與胞弟四品宗室壽蕃。及堂妹原任盛京刑部侍郎寶森之長次二女。同時仰藥。猶恐未及。復相率投繯自盡。其妹之婢隆兒。亦同時殉主事。聞卹贈翰林院侍講學士。

論曰。五詞臣死事烈矣哉。辛亥國變。就義者無聞焉。雖曰政由禪讓。與前史之易代不同。然詞臣風節。亦稍稍凌替矣。王文敏公英風浩氣。尤與文山道鄰。媲美雄與文敏當光緒壬辰癸巳間。由順德李文誠師文田介紹訂交。釀酒論文。捫碑考古。極盍簪傾蓋之歡。及甲午雄入詞館。文敏爲教習師。遂執贄稱弟子。嘗見所爲醇親王位分尊崇。請恪遵御論。收回成命。疏稿義嚴而詞婉。於社稷君父之義。輕重兩全。詢爲古今有數之文。今聞文敏遺集已付梓。人不知曾錄此文否也。甲辰乙巳之歲。曾詣文敏舊邸瞻拜遺像。低徊久之。邇來邪說誠行。如燎方揚。委贄策名之輩。咸以忠於一姓爲恥。硜硜之見。不敢盲從。爰取庚子褒卹錄所載。參以聞見。爲紀略一篇。俾後之修史者有所攷焉。

此文戊辰正月所作。其時清史稿尚未出版也。庚午仲秋師鄭附記。

舊
新
效
在

舊京文存卷四

常熟孫

雄原名師鄭

施太守雨農家傳

君諱啓字雨農號穉桐江蘇崇明人先世自宋淳熙時由句容移居崇明忠孝賢良
縣延奕世曾祖城祖珍父雲鳳皆以君貴贈資政大夫母氏蔡。勲封太夫人君在妊十
四月而生生九年而失怙家道中衰蔡太夫人親授詩書易禮日時時勗之曰汝父天
性孝友口不絕六藝誦徒以赴省試冒寒感疾中道殂謝遺憾無窮汝其善承先志乃
擇賢師昕宵督課學以大成年二十入邑庠光緒乙酉舉順天鄉試壬辰成進士以卽
用知縣分發湖南旋由河工列保補缺後以直隸州候補癸巳至湘吳中丞大澂檄君
清理長沙育嬰堂事堂爲積弊所窟前任謝令與大府同里閤且訂昆季交侵蝕公款
至萬餘千君得左證欲發其奸道員莊某陰受謝賄力爲之援密語君乞寢其事君不
爲威利所屈力持不可大府遂欲引章誣劾賴湘紳剖白始免於禍甲午丁酉壬寅三
充湖南鄉試同考官均得士乙未冬陳中丞寶箴撫湘於衆中見君即獎許曰君育嬰

有勞。宜任劇邑。先檄署瀘溪篆。瀘邑瘠樸。文風素陋。君於聽訟餘閒。親集諸生。評騭文藝。如塾師之誨子弟。不數月。斐然成章。又復窮捕盜賊。廣播穀木。在任將屆兩載。政平訟理。俗化風行。陳中丞嘉之。再檄移署安化篆。安邑處萬山中。民風狡悍難治。邑有奇案。姪弑嬸而謀承其祧。埋尸土中。上植豐草。兩造聚衆數千。械鬥頻歲。令往勸視。輒被毆辱。陳中丞語君。宜率兵卒五百人往捕之。君曰。民敢毆令。威信不行久矣。兵之其謀益急。急必叛。叛必勦。勦必多殺人。且往勿兵。審機而行。中丞韙之。君蒞任後日。坐堂皇。清懸案數十起。洞奸燭隱。民無遁情。四方聞風。畏威懷德。乃乘肩輿。携畚耜。赴鄉跡。勸聞豐草中。貓鳴鳥烏。哀號徹肺腑。因命掘貓棲處。深五尺許。得婦尸。面如生。刀痕六七。爰發健役。懸重賞。三日獲兇殺之姪一。鞠而服。自是政聲鵲起。凡號稱難治之邑。大府輒檄君治之。己亥署道州。庚子補江華。辛丑再權道州。所至平反冤獄。宣導民情。一如前法。江華密毗道州。君旣補江華。民聞道州之治。望君如望歲。及蒞任。江民捧觴歡迎。數十里不絕。乃未及期。月道州父老又籲大府乞還。我使君江華士民爲立去思碑。王君啓原撰文。以達民意。王君篤行君子也。其言也信。篇中有云。施侯所至。奸宄遁藏。必

鈞距以察之。雖越境無弗得者。及振學校。矜善類。靡不懇摯。受治之民。所以舉首以希其久任。而亦弗可卒得也。故侯未至。聞其治而望之。已至。被其澤而戴之。既去。懷其德而思之。至歷久而弗能忘。庶乎尹翁歸趙廣漢之功效。及去已久矣。舊治之民。且星奔而訟。理於新治之庭。迺至粵西富川鄰境之民。聞侯且去。願得一瞻顏色。爭致歌頌者累數百人。此非治履所至。政教且及之。亦豈侯意計之所及哉。王君之言如此。召公勿伐。子產誰嗣。古人之言。非欺我矣。辛丑冬。僉中丞廉三奏保循良。送部引見。有旨以直隸州知州遇缺即補。復以寧遠平匪功。晉階知府。壬寅授郴州直隸州。甲辰署武岡州。丙午署邵陽。岑中丞春藻誤聽人言。訛傳邵陽匪起。守令三日不報。嚴劾奪職。湘人冤之。或曰。道員莊某是時已陳臬事。挾前怨。以聳大府之聽也。君怡然處之。怨憤不形於色。丁未。徐督部世昌檄調赴東省辦安東稅捐。周中丞樹模又檄充黑龍江官鹽總局提調。己酉。錫督部良奏陳創辦江省鹽務功。有旨開復原官。辛亥七月。乞假省墓。後遭國變。遂不復出。卒於共和七年夏正戊午五月十九日。年六十有三。子四。經杰。能傳家學。今官交通部科員。世杰。士杰。文杰。均早卒。女二。學詩。適蔡氏。著有湘痕吟草。及清閨

舊唐書
秀詩人徵略。學禮適孫氏。君與余同出翁文恭師之門。文恭晚年嘗語余曰。吾門多循吏。若陸吾山。觀察襄鉞。施雨農。太守啓宇。均傳人也。乙丑七月。經杰來都門。以行狀乞爲傳。將以上之清史館。雄雖弇陋。義不敢辭。因詮次事實如右。

前史官孫雄曰。梅伯言作劉公清家傳。謂劉公歷官布政使。終總兵。然人皆呼爲劉青天。從其官四川縣令時所稱也。嘉慶八年。劉公因勦撫王三槐羽黨。功成入覲。仁宗睿皇帝賜詩褒寵。取民所呼劉青天者以爲句。朝士誇爲美談。先朝之重視循良如此。百里之宰民命所寄。苟非其人民受剝膚之痛。國本亦隨之而動搖。徒法不能自行。錯節以別利器。親民之官可忽乎哉。君在道州時。有某廩生請屏左右告密。旣而袖鉅金以獻。君怒斥之曰。青天白日之下。汝敢污我耶。某生慙而退。安化道州士民至今猶稱君爲施青天。君殆可與劉公媲美矣。伯言謂劉公復定陶時。專將有功。然不能無中於上官之忌。君亦以被誣去官。所遭尤視劉公爲酷。三代直道之難行。蓋非自今始矣。近世綱紀日替。令長多爲武人所役。使民不堪。命呼籲無門。世變之亟。蓋有不忍言者。悲夫悲夫。

漣水烈婦傳陳氏傳

烈婦傳陳氏。江蘇漣水人。生於光緒二十五年己亥某月。年十二。嫁傅福元。福元爲學文之子。家極貧。以傭力代耕自活。癸亥歲大歉。無以爲生。婦隨學文父子就食江南。十一月抵丹徒。結茅琴園東以蔽風雨。夫婦力作以贍事畜。閒值無米爲炊。仁者施以一飯。婦絕不自食。必先奉翁。次及夫。與子女已則忍飢。無怨。甲子仲春。與女伴渡江。至徵潤洲灘上檢柴。猝遇強暴。曰張業創者。鄉人稱爲張三。畜子。素行無賴。欲加以非禮。婦以死拒。張怒。剜其雙目。剖腹。洞胸。擲之江中。次日尸浮平政橋下。慘不忍視。時爲共和紀元十有三載夏正二月初四日也。烈婦自適傅氏。後生一女。曰富小。甫六齡。又生一子。曰富貴。甫三齡。死時方受孕。三月天乎。慘哉。丹徒士民痛婦之死於義烈。籲請有司窮治。卒獲罪人。如臯。冒君廣生。方任鎮江關監督。賦金縷曲詞弔之。唐宗郭巢念植。許敬業諸君。援據褒揚條例。詳列事實。公呈內務部。乞爲專案特褒。宗郭又乞余爲傳。因詮次之如右。

舊史氏孫雄曰。烈婦生長蓬華。未習詩書。而臨難不苟。大節懷然。若此。此乃名門世族。

閨。澹。賢。媛。之。所。難。洵。足。以。光。彤。史。矣。近。世。競。言。興。女。學。進。文。明。不。知。文。明。愈。甚。道。德。愈。漓。在。上。者。又。爲。揚。波。助。燄。家。庭。之。變。穢。德。之。聞。有。不。忍。言。者。彼。一。字。不。識。之。傳。陳。烈。婦。其。義。烈。迺。足。與。日。月。爭。光。自。命。文。明。之。輩。能。無。媿。汗。欲。死。乎。雖。然。媿。汗。欲。死。者。尙。有。人。心。者。也。今。日。人。心。陷。溺。盡。矣。冠。帶。之。倫。膠。庠。之。秀。覩。然。鼓。吹。解。放。戀。愛。之。說。以。縱。恣。其。無。等。之。欲。吾。知。聞。傳。陳。烈。婦。之。事。方。且。竊。笑。其。愚。鄭。人。飲。狂。泉。之。水。甘。之。如。飴。反。以。不。狂。爲。狂。哀。哉。

袁性之杏紅館酬世文鈔三集序

袁性之先生宦遊山左。歷爲東諸侯上賓。余久聞其名。未相識也。丁卯仲秋。舊都有國史館之設。始相遇於館中。以所著杏紅館酬世文鈔見示。其爲文不拘一格。大率縱橫軼蕩。行乎所不得不行。止乎所不得不止。昌黎所謂氣盛則言之短長與聲之高下皆宜也。余在辛亥以前。所爲酬世文多不存稿。壬子以後。遭逢世變。以鬻文自活。始擇元鈔存篋衍。遂有鄭學齋文存。禹齋文存。及鄭齋壽言存稿之刻。陳伯嚴前輩爲范伯子文集作序。篇末有云。留子遺之軀。懸禍亂之會。老不媿恥。不得不役役於文字。得錢以

求活其所遭身世之可悲莫此爲甚。余嘗三復斯言，竊有無窮之感。喟焉。今世所最崇拜者曰軍人，曰黨人。至政客則隨軍人、黨人爲流轉，已在卑無高論之列。至詩人文士，則更不足齒數矣。往者費君師洪爲性之作文鈔續集序，謂士生於世，不能發行其所學，徒以區區文字役於不可知之人，筆墨澀，不獲少休，其生事已至可憐憫。然則文鈔數卷之流傳，不過表暴其度，此不幸之歲月之迹象已耳。費君此言，沈痛極矣。雖然，素位而行，歷富貴，貧賤，夷狄，患難，無入而不自得，先聖之明訓也。儒者手無斧柯，思託空文以自見，冀盡扶世翼教之責，以挽救未來之劫運，其苦心亦有出於不得已者。初非以文章自炫也。性之爲人，篤厚而溫和，天君泰然，百體從令，其視塵世浮榮有如敝屣。蓋其樂天知命，蘊蓄者深，初不知平生之所歷多爲不幸之歲月也。近雖年逾六十，仍作客大連，以文字自遣。庚午春間，又有續印詩文鈔之舉，文分駢散爲二卷，詩分五卷，俱有集名。曰燕臺，曰遼海，曰舊雨，曰介眉，曰中澤。手自寫定，乞序於余。余竊滯舊京，頻年病廢，遲遲未應。性之貽書敦促，並以六十有二初度自述詩索和，謂敝集若無大著，不足以傳後世也。夫以余之落拓偃蹇，背時好而困窮途，其言何足以重君哉。惟是

吾兩人年齒性情言論遭際無一不相符合。雖訂交僅越四年而於儒行篇所云合志同方。營道同術。及久不相見。聞流言不信。兩人蓋皆能實踐之。較之數十年交契之舊友。無多讓焉。又南通孫氏與吾宗同奉晚唐忠貞公爲始祖。松濤族叔祖修輯宗譜於前歲成書。性之曾爲作序。余在史館以禹齋文存貽性之。性之見余所爲先府君事略始知江南江北異派同源。遂爲介紹於松濤翁及謹丞伯兄。因緣作合。殆有若或使之者。今歲松濤翁又有宗譜圖詠之輯。余之詩史閣圖及西轡校經圖得以附忠貞公朝天待漏圖。仁庵公鯨吹圖之後。與松廬校譜圖同傳不朽。飲水思源。實由性之介紹之力。性之於諸圖均有題詠。悉載燕臺遼海兩集中。則此編之印行。余又安可無言哉。爰拉雜書之。即以爲序。共和十有九年夏止庚午仲夏之月。常熟孫雄師鄭氏撰。

海鹽朱君步青墓誌銘

己巳夏正季夏之月。海鹽朱君步青。以暴疾逝於新都。步青之兄曰芷青。二十年前肄業京師。文科大學。爲余及門根柢。槃深鑽仰。勤篤爲諸生冠。詩筆尤卓爾不羣。余曾錄入四朝詩史。甲集不幸於壬子歲。以消渴疾溘逝。余曾允爲銘墓。因循未踐。宿諾。今步青又逝矣。步青之尊人小汀直學士。暨本生父旭辰比部。哭之慟。並具行略。乞余爲銘墓之文。余何忍辭。按略。君諱聯濤。字步青。世爲海鹽望族。高祖父諱蘭馨。乾隆辛丑進士。吏部稽勛司員外郎。曾祖父諱鳴雷。安徽甯國府知府。祖父諱有齡。兩淮鹽知事。署劉莊場大使。父彭壽。光緒戊戌進士。歷官典禮院直學士。本生父仁壽。光緒甲午舉人。法部編置司員外郎。君承家學。幼而岐嶷。生數歲。奉祖命爲直學士嗣子。時直學士供職京師。君隨侍祖父母。本生父母僑居維揚。從師請業。光緒己亥。知事公就養入都。始舉室北徙。庚子之亂。備嘗艱險。辛丑迴鑾。百度維新。農工商部。創設高等實業學堂。君奉嚴命肄業。殫心精進。課冠其曹。宣統己酉。以優等畢業。獎給舉人。例授外職。適直學士於陸軍部右丞任內。恭遇登極。例得恩蔭。以君名應詔。奉旨以正三品蔭生授七品。

小京官。籤分郵傳部。隸路政司辦事。入民國後。補交通部主事。旋以資深。擢升僉事。歷充總務廳綜核科。路政司計核科科員副科長。科長諸職。戊辰秋。政府南移。充交通部財務委員會委員。尋改鐵道部理財科債務股主任。君敷歷南北。治事精勤。迭爲當軸倚重。國有鐵路負債幾六萬萬元。凡內外借款。商訂合同。以及中間變更條件。一切交涉。經歷情形。君能貫穿始末。並能歷舉其年月不爽。累黍每治公牘。援筆立就。不起草不檢卷。絕無舛誤。與外人交涉。各債欸操縱疾徐。因應曲當。同僚咸服其能。然心力交瘁矣。君服務新都。孑然一身。不携眷屬。與褚君德順賃屋同居。民國十六年己巳夏正六月初九日夕。息燈入寢。忽得危疾。褚君連聲喚之不應。遂卒。醫者謂爲腦出血症。雖有利緩。亦無能爲。君娶同邑張氏。前交通部祕書諱思仁長女。子二。長虎。出嗣本生胞兄聯沅。即芷青也。次鴻。女子子二。昌麟。桂麟。君卒後。直學士君命孫扶櫬還浙。將卜葬於嘉興縣屬王店鎮之某鄉。以君之學純行粹。心細才長。趾美先芬。宣勞國事。假以歲月。無媿棟家幹國之偉才。迺以盡瘁隕身中道。徂折豈徒朱氏之不幸哉。君工書法。又殫精佛學。兼治拳術。與褚君德順有同好。德順述其遺事。津津道之以與君立身本末。

無大關係。故不具論。辛亥以前。芷青示我詩稿。有近緣學佛覺詩。貧及哀雁。不鳴天有霜之句。余亟稱之。今日雁行同折。佛法無靈。追誦芷青遺詩。竟成讖語。痛可言耶。迺爲銘曰。

詩禮之門。食舊德。靖共爾位。無曠職。南溟鵬羽。六月息。二豎折爾垂天翼。人亡國瘁。我心惻。地下壙簾同弄墨。我銘幽宮。詞質直。

孫藻田師海日樓詩文集後序

癸亥冬間。余應瑞安孫君季芑之請。爲先師藻田侍郎作止庵遺書序。刊入禹齋文存卷一。彼時季芑往來燕齊之郊。憔悴多病。至次年以微疾逝世。先師遺著。未能付梓。又越八年。庚午仲夏。余與公達共硯龍江志局。公達爲先師之孫。年甫逾三十。於學無所不窺。英英露爽。不可一世。暇日以手寫侍郎師海日樓遺集十七卷示余。謂此即止庵遺書之文集四卷。詩集二卷。詩補一卷。詞一卷。重行蒐輯編次而成。已由王晉卿方伯作序。更乞吾丈跋之。又以令叔仲容先生所爲侍郎公行述示余。此爲往年季芑所未及示者。其中所言。頗有關於掌故。與侍郎公出處之風節。不可以不紀也。方左文襄之

規復杭州也。檄湘人周開錫攝溫處道。倚以籌餉。周素有能名。治事峻急。於釐捐鹽稅尤苛細。民怨沸騰。時侍郎公方以會辦浙省團練捐輸事竣。回京供職。因疏陳溫處承兵燹後。喘息甫蘇。宜蠲苛法。俾得休養生息。又附片彈劾前時縱匪官吏。如怯懦釀變之溫處道。志助溫州守黃維誥。瑞安令孫杰。及以城從賊之平陽令翟惟本。均請按律嚴懲。章下浙撫。文襄檄周開錫查復。開錫素與侍郎公不愜。見疏益愠。遂盡力爲志黃翟三人彌縫辨護。具文中復文襄。未加深察。據以入告。侍郎公遂因疏奏不實。奉嚴旨休致矣。浙人咸爲公呼屈。公則從容引咎去官。歸里絕無怨尤。旣而曾文正開府兩江。知公素深。數數欲申尉薦。公固謝之。杜門纂述。篤守有宋永嘉諸儒之學。啓迪後進。成就宏多。文襄事後始悉。爲周開錫所蒙蔽。卒嚴劾翟惟本。而志助以戕於海盜孫杰。以病故。免議。摺中尙援侍郎公前後疏函爲證。君子之過。如日月之食。文襄固不失爲賢相也。公初官詞林。即抗疏劾權相穆彰阿。斥爲檜嵩再世。任粵西學政。首以髮匪將成大患上聞。先幾審變。中外歎服。惜疏稿已燬於兵火。集中未能備載。公所爲詩古體法少陵。近體似東坡。詞喜稼軒白石。文則淵懿清雅。出入唐宋諸大家。尤與歐曾爲近。如

公之風節行誼固不必藉詩文以重而詩文之光氣亦實有不可遏抑者在此非門下士之私言也公達學行趾美祖庭鏗而不舍異日所造誠未可量仲容先生承太僕公之學爲同光以來儒林冠冕三十年前曾於楚中張文襄節署相晤文襄謬以江浙二孫相品目實則如雄譎劣何敢望仲容後塵今又與公達聯袂載筆文字因緣縣延三世固有不能已於言者爰覲縷述之以爲後序先師於光緒乙未重宴鹿鳴有旨加三品卿銜辛丑重宴瓊林有旨加侍郎銜此亦爲季芃示我事略所未及者故前撰止庵遺書序仍稱爲學士師云共和紀元十有九年歲在庚午仲秋之月門下士常熟孫雄再拜謹跋

南通孫孝婦墓表

孝婦姓曹氏江蘇南通人庠生福之女庠生衡之妹也年十八歸我族叔廉卿先生汝霖時君舅薪傳先生已逝而重慈宋太君暨孀姑陳太君均在堂孝婦謹事兩太君雞鳴問安起敬起孝供養咸備入暮俟兩太君睡熟復篝鐙治鍼滌宋太君尤篤愛係婦時稱其賢越二年宋太君棄養孝婦哀毀骨立痛悼不已陳太君治家嚴性急量狹意

有不嫌。譙訶無已。孝婦晨夕絜膳馨饌。問寢侍疾。有愉色而無倦容。姑意所需。語未及宣。孝婦默揣冥契。必曲副意之所至。牖闥堂室。庖廩閒纖。悉畢治。姑患目疾。劇。孝婦齋栗。察視。竭誠禱天。冀垂佑去疾。已而果瘳。孝婦事姑二十餘年。怡婉誠敬。如一日。姑亦深感之。起居偃仰。非孝婦侍側扶持。抑搔心輒弗怡。孝婦體素羸弱。心血耗竭。年四十三。逝世。姑哭之慟。謂天胡奪吾孝婦如是速耶。宗族鄉黨異口同聲。謂孝婦能視無形。聽無聲也。孝婦相夫教子。悉有法度。人無閒言。金沙孫氏薄有田產。廉卿先生應童子試。爲籍貫事被訟累。典質過半。洎捷光緒辛卯秋闈。屢赴計偕。困於資斧。舊產虧闕。幾盡。孝婦縮積針黹之資。購置十數畝。所謂鶴頸灣祭田是也。孝婦讀書通大義。四子毛詩均能背誦。所生三子。幼時悉親自督課。長子曰儼。字謹丞。光緒癸卯舉人。四川知縣。次倬。增生。次儻。早卒。雄與謹丞同爲新安始祖忠貞公三十五世孫。弱冠時同肄業南菁書院。夙聞母氏聖善。又讀謹丞所爲先妣事略。沈痛哀感。追步熙甫。謹丞屬雄爲表墓之文。再四督促。礪石以待。余何敢辭。嗚呼。雄與謹丞。今已均逾杖鄉之年矣。孟子所云。居中國。去人倫。無君子。不幸於垂老。迺親睹之。世變遷流。未知所屆。孝道之寢衰。婦

德之淪喪。有非楮墨所能達者。如孝婦之謹事孀姑。致誠致慤。今之人方且哂爲天下之大愚。詎知孝弟之至。通於神明。光於四海。古人治亂之源。人禽幾希之辨。所關甚鉅。有國家者。不可忽也。孝婦生於有清道光二十七年丁未十月十三日。卒於光緒十五年己丑六月二十九日。墓在金沙市南鶴頸灣西阡。與廉卿先生合祔。江蘇通志及南通孫氏宗譜。均有傳。其他懿行。不復縷及。共和紀元十有九年。歲在庚午。夏正仲秋之月。族姪常熟孫雄再拜撰表。

附錄謹承族兄所爲先妣事略篇中要語及雄所爲徵詩文啓 先妣少府君一歲

十八歲來歸時。先曾王母及王母在堂。先妣事先曾王母及王母。恒雞鳴而起。侍奉供養。纖悉罔不備。伺先曾王母及王母安睡。輒篝燈事針黹。至夜深始就寢。以是先妣最得先曾王母歡心。先曾王母於先妣來歸之二年逝世。先妣尤傷悼不能已。先王母素性偏狹。待先妣尤苛細。先妣則以爲吾婦職有未盡。其不能使吾姑愉快也。於是加意奉養。王母意所需未及發。先妣嘿揣冥契。必曲副意之所至。牖闥階席。堂室庖廐。間無留事。先妣之意。無論先王母如何不滿。先妣竭誠侍奉。初無絲毫怨尤。

之意稍形諸語。言蓋必俟先王母顏色稍霽也。以爲乃吾盡婦職之一日。先王母患目疾劇。先妣祇栗察視。祈天相佑。甘以身代。如是者數年。待少瘥。迺始慰實。則王母患目疾時。已倚先妣如左右手。若非先妣扶持服侍。心亦不怡。以是知吾母之精誠其足以回天也。以上皆事略原文。惟前後均從略。師鄭附記。

婦者之模範。昔賈誼論秦俗云。婦姑不相說。則反唇而相譏。慈子嗜利。同於禽獸。而推其致此之由。則歸獄於商鞅之遺禮。義棄仁恩。並心於進取。洵爲探源之論。吾國數十年來。濡染歐風。殫心力於謀利計功。而於董子所云正誼明道。視若弁髦。家庭之間。箕帚詬誶。習爲故常。婦之視姑。有同陌路。故孝子孝女。雖如麟鳳之可珍。然千百人中。或尙有一二人焉。至孝婦則無聞矣。自命文明之輩。且謂父母之與子女。但有教養之義務。故孝之一字。爲歐洲字典所無。舅姑之與子婦。本不宜同居。更有何盡孝之可言。郢說流傳。自戕根本。視賈長沙所論秦俗。殆有過之。若而人者。恐禽獸亦不食其餘矣。不佞憂心世變。冀挽狂瀾。敬求海內有心人。褒錫詩文。同扶世教。無任感幸。庚午孟冬。常熟孫雄師鄭氏謹啓。

清故度支部郎中懷德榮府君墓志銘

君諱文祚。字祉宇。號澤磐。遼寧省懷德縣人。始祖希程。由魯省移居遼東。高祖理。曾祖玉彥。祖俊。本生祖傑。均以孝弟力田世其家。考諱錫齡。字子壽。妣時太君。子壽封翁博通經史。廣教生徒。學以躬行實踐爲主。門牆之盛。追蹤安定。有子六人。長曰文達。次文和。文煥。文昭。文枋。君爲最幼。生有至性。童稚時不事遊戲。端嚴儼恪如成人。子壽封翁愛之甚。嘗語長子文達曰。此吾家千里駒。汝爲家督。宜善教之。文達字可民。紹述庭聞。學養深邃。三省俊彥。多出其門。遼左諸郡邑。無不知有可民先生者。君幼從長兄暨四兄誼雲徵。君文昭受業。所爲詩文。經兩兄指授。悉有法度。超越流俗。光緒二十年甲午。應順天鄉試中式。舉人。出楊子勤太守鍾義房內。正考官薛尙書允升。徐協揆。郝深加器賞。乙未戊戌。應禮部試。薦而不售。庚子時。太君棄養。君哀毀盡禮。守制家居。值燕冀拳民肇亂。懷德地處邊陲。民俗强悍。不逞之徒。因緣煽惑。萑苻四起。君與邑宰會商。創辦團練。手定規章。保衛桑梓。匕鬯無驚。君又以懷邑草萊初闢。文化未興。因創辦輔翼書院。首捐巨資。以爲倡率。規畫區處。卒底於成。並禮聘宿儒督課。四境學子。蔚爲譽髦。

春誦夏弦。至今弗絕。光緒三十一年乙巳。君以科舉停廢。納資爲戶部郎中。旋改官制。更易戶部爲度支部。尙書載澤知公才倚如左右手。君在部中。與周子蓉參事蘊華。有膠漆之契。周君爲通阜司總核。君爲坐辦司中。公牘均由君主稿。周君受成而已。同曹稱爲一臺。二妙如唐時韋維宋之問之在戶部焉。東三省總督錫良以省欸支絀。奏請地畝加捐。事在必行。君力駁之以紓民困。尙書載澤意頗游移。君於部中集議時。偕周君反覆陳說。剖析利害。卒從君議。君自奉儉約。而篤於友朋。信於然諾。遇有緩急。推解不吝。人有負者。亦大度容之。辛亥國變。隱居舊京。惟與二三知己。以詩酒遣日。著有雪石齋詩二卷。君於病中乞余爲撰弁言。又有隨筆及駢文若干卷。均未刊行。近年校刊遼東耆舊陳石閭先生遺集。石閭與戴遂堂李鐵君並稱遼東三老。沈歸愚嘗以甘老布衣。恥言名利。褒之遺稿爲子勤太守所藏。君節縮衣食。勒成精本。以廣流傳。又以可民先生鹿萃齋詩文集。及房仲南隅夢草堂詩草。劉東閣看雲聽濤館詩。同付梓人。名曰遼東三家合集。書甫刊成。而君於乙巳秋初。驟得半身不遂之疾。至庚午夏至。竟謝賓客。余與君交契垂四十年。又與可民先生爲癸巳同歲生。庚申正月。誼雲徵君溘逝。

君乞余爲銘。幽之文。不意今日。又銘君之墓。哲人云亡。知音不作。痛可言耶。君娶同邑孫氏。有賢德。子六人。紹衣紹鉞紹魯紹策紹甸紹燧。紹鉞出爲誼雲徵君後。紹策早逝。女三人。孫某某。君生於有清同治十年辛未九月初七日。卒於中華民國十九年庚午夏正五月十三日。年六十。紹衣等營擇吉壤。將於某年月日。卜葬於某所某原。先期縗經踵門。以行略見示。乞余爲文誌墓。余何敢辭。紹衣性情肫篤。能承家學。年逾三十。恂恂似不能言。紹鉞紹魯紹甸紹燧諸昆季。亦均能自樹立。值此世運湮淪。早凋爲福。君雖長逝。其可無憾。迺爲銘曰。

君子之德。闡然日章。表裏如一。令聞珪璋。詰奸敷教。澤被維桑。遁世蠖屈。行吟引觴。劍南遺山詩卷琳瑯。教成諸子。肯構肯堂。佳城鬱鬱。其歸其藏。


奉賢朱烈婦傳 附贊

烈婦陸氏。江蘇南匯縣人。適奉賢朱翰如。茂才家驥。烈婦之母周氏。適陸。與翰如之母爲昆季行。烈婦幼卽有賢淑名。于歸後。謹事尊嫜。和睦妯娌。中饋之事。爭先恐後。絕無詬誶聲。翰如應童子試。見擯於有司。烈婦篝燈佐讀。敦勉攻苦。再試得雋。翰如體弱。患

水癰之疾。醫者謂必須剖解皮膚。暢洩溼毒。詎知洞洩以後。體益不支。光緒五年己卯八月二十九日卒。烈婦於翰如病中。侍奉湯藥。衣不解帶。已數月矣。及見病篤。矢以身殉。易簀前。即潛行服毒。距翰如之歿。僅刻許耳。卒時年三十六。翰如無子。以弟家驥長子聲揚爲後。江蘇學政夏子松侍郎案臨松郡。以皦日盟忱。楸額旌之。後五十一年歲在庚午。爲共和紀元之十有九載。翰如之季弟遯叟。與雄爲文字交。一日馳書北平云。世變方激。新說沸騰。忠孝節烈之行。視爲腐化久矣。吾子以扶植人紀爲己任。近讀所爲于烈婦張烈婦唐孝女諸傳。登高一呼。頑聾立振。韓子所謂功不在禹下者也。嫂氏之義烈。雖蒙宗師旌揚。名登邑乘。而流播不廣。敢乞吾子爲鴻文以章之。雄得書皇悚。義不敢辭。爰詮次而爲之傳。並熏盥而作贊曰。

摩笄爲山。翦金成字。匹婦精誠。不可奪志。生死相從。天日弗墜。徽國清門。誕毓令器。同穴。唐詩。崩城。洒淚。越五十年。淪胥淫說。彝倫攸斁。聖教委地。我表潛德。從一無二人紀。重扶並風。有位。

舊京文存卷四終



卷之六
七

